

# सुजुनाय बिजाब

( गोजौसिन गेजेरारि सेथि बोसोरनि थाखाय )

(For Higher Secondary 1st Year)



आसाम गोजौसिन गेजेरारि सोलोंथाइ गथुम

किताप समलय

पानबाजार : गुवाहाटी-1

**SUJUNAI BIJAB** : A text book of Bodo MIL for class H.S. 1st Year (New Syllabus) prepared according to National Curriculam Framework (NCF) 2005, edited by the Editorial Board (Bodo), AHSEC and published by Kitap Samalaya, Panbazar, Guwahati-1 on behalf of Assam Higher Secondary Education Council.

**फोसावगिरि :**

आसाम गोजौसिन गेजेरारि सोलोंथाइ गथुमनि जानानै

किताप समलय

पानबाजार, गुवाहाटी-1

जुलाई, 2010 इं

जुन, 2011 इं

जुलाई, 2014 इं

मे, 2016 इं

मे, 2018 इं

मे, 2019 इं

अक्टूबर, 2020 इं

आगष्ट, 2021 इं

साफायफिननाय : जुन, 2022 इं

© A.H.S.E.C.

**डि. टि. पि. :** गुमुर पाब्लिकेसन

गड़चुक, गुवाहाटी-35

बेसेन : 80.00 रां

**साफायसालि :**

आङ्गिक प्रेस

आमबारी, गुवाहाटी-1

**गासै मोनथाम बेंखननाय**

\* दिहुनगिरिनि गनायथिनि अनगायै बे दिहुनथाइनि जायखि-जाया बाहागोनि साफायनाय हाबा एबा इलेक्ट्र'निक बिजों, जुन्थियारि बिजों, जेरक्स, रेकर्ड एबा गुबुन माबा राहाजों फिन दिहुननाय खान्थिनि महरजों बेखौ बुथुमनाय एबा अरसिन होनाया आयेन बेरेखा।

\* बे बिजाबनि फाननायखौ रादाय खानायनि गेजेरजों बानायनाय जादों दि फोसावगिरिनि सिगांनो गनायथिनि अनगा बे बिजाबनि मोखां बिलाइ 'बाइण्ड'नि अनगायै गुबुन माबा राहायै फालांगि खालामनाय हावलाद हरनाय, फिन फानफिननाय एबा भारा होनो हानाय नडा।

\* बे बिजाबनि गनायथाव बेसेन बे बिलाइयावनो साफायनो नांगोन। राबारनि प्टाम, प्टिकार लगायनाय एबा गुबुन माबा राहायै आखिनाय जायखि जाया फोसाबनाय बेसेना गोरौन्थि जागोन आरो गनायजानाय नडा।

**फरा बिजाब सुजुग्रा आफाद**

**मुस्री मधुराम बर'**

बारग' प्रफेसार,  
गुवाहाटी मुलुग सोलोंसालि

**मुस्री बिरुपाक्ष गिरि बसुमातारी**

बिबुंगिरि, बर' बिफान  
कटन कलेज, गुवाहाटी

**मुस्री उमेश बर'**

बिबुंगिरि, बर' बिफान  
ग'रेश्वर कलेज, ग'रेश्वर

## भारतारि संबिजिर

### रायफोरथि

जों भारतारि फोरजा सुबुंआ भारतखौ गंसे जारखुंथाइ समाजबादी दोहोरोम खनालायै सुबुंखान्थियारि फोरजा राइजो महरै दानो थाखाय, लोगोसे बेनि गासैबो नोगोरारिनि थाखाय, समाजारि, रांखान्थियारि आरो राजखान्थियारि नियाय, सानथाइ, फोरमायनाय, फोरमायथि, दोहोरोम आरो सिबिनायनि उदांमि, गायसंनाय आरो खाबुनि समानथाइ मोननो थाखाय आरो बिसोर गासैनिबो गेजेराव सुबुंनि मान आरो हारियारि खौसेथि आरो गोरोबथि थि खालामारि बिदा-फंबाय साननायखौ बांहोनो गोथौ फोथायनायजों रादाय लानानै जोंनि बे संबिजिर आफादाव दिनै 1949 मायथाइनि नवेम्बर दाननि नैजिद' सानाव बे संबिजिरखौ नाजावबाय, आयेन बानायबाय आरो गावखौनो गथायना होबाय।

## बुंफोरथि

गियान-बिगियाननि गासै बिथिंआवनो जा सोमोनांथाव दावगादों, बे जाउनाव सोलोंथाइ खान्थि आरो फराफारिखौ थाब थाब सोलायाब्ला जोंनि फरायसानि सोलोंथाइयारि जौगानायनि बेलायाव बेखाबुनि मोगामोगि जानांनाया जाथावसिन जाबोदों। बे नोजोरजों बिजिरनानै भारतनि गुबुन गुबुन खनायाव जानाय सोलोंथाइयारि सोलायनायजों सोमोन्दो लाखिनानै आसामावबो फराफारिनि गोनां सोलाय-सोल' खालामनायनि नाजानायखौ आखाइयाव लानाय जादों।

'सुजुनाय बिजाब'आबो बिब्दि नाजनायनि मोनसे बाहागो। गुबुन गुबुन आयदाजों लोगोसे 'सुजुनाय बिजाब'नि फराफारिखौबो गोदान नोजोर आरो गोदान सानथौजों साजायनाय जादों। बे फराफारिखौ आबुथियै फरायसाफोरा फरायसंनो हानाय बादियै बिजाबखौ बानायनाय जादों।

बे फरा बिजाबखौ जथायना होनायनि थाखाय सुजुगिरिफोरनिसिम आंनि गोबां साबायखर थाबाय। साफायना दिहुननायनि थाखाय **किताप समलयनि** मावथिफोरनिसिम गोजोननाय थाबाय। बे हाबाजों लोब्बा गोनां गासैबो गाहाम हामब्लायथि बाउबाय। फराबिजाबखौ इयुनाव साबसिन-हामसिन खालामनो गोरोंफोरनि सुबुरन हास्थायबाय।

जों मिजिं खालामो दि बे बिजाबा बे आयदानि सोलोंथाइनि थांखिफोरखौ जाफुंसार होनो हागोन।

गोजोनथों,

बामुणीमैदाम  
गुवाहाटी-21

नेहाथारि  
आसाम गोजौसिन गेजेरारि सोलोंथाइ गथुम

## नायखां बिलाड़

### खोन्दो-I ( रायथाइ आयदा )

1. हारियारि मेथाइ	ईशान चन्द्र मोसाहारी	...	1-7
2. बर' हारिनिस्सिम फंनैसो	करीन्द्र नारायण ब्रह्म रा: सो: उमेश बर'	...	8-16
3. बैसागु आरो बर' माहारि	लक्षेश्वर ब्रह्म	...	17-24
4. बर'फोरनि गोदोनि खेला	चाणक्य ब्रह्म	...	25-33
5. सुबुं माहारियाव खाना फोथायनाय	ब्रजेन्द्र कुमार ब्रह्म	...	34-41
6. जोहोलाव सम्बुधन फंल'	मन'रन्जन लाहारी	...	42-49
7. बर' फावथाइ : बेनि मोनथिगोनां आखुफोर	कमल कुमार ब्रह्म	...	50-54
8. आखल	कमलेश्वर ब्रह्म	...	55-59

### खोन्दो-II

1. जों आरो जोंनि आबहावा	ड० लक्ष्मीनन्दन बरा रा: सो: मधुराम बर'	...	60-72
2. खैफोद राहा	ड० मदन महन शइकीया रा: सो: मधुराम बर'	...	73-94

### खोन्दो-III ( खन्थाइ आयदा )

1. सरखौ नंसर मालाय नंदं	रुपनाथ ब्रह्म	...	95-97
2. मोनाबिलि	ईशान चन्द्र मोसाहारी	...	98-100
3. दै बाज्रुम	प्रम'द चन्द्र ब्रह्म	...	101-104
4. थार	कमल कुमार ब्रह्म	...	105-109
5. सुबुंनि धोरोम	ब्रजेन्द्र कुमार ब्रह्म	...	110-112
6. जिउ फैंसालि	शचीन्द्र बसुमतारी	...	113-115
7. लामा	मन'रन्जन लाहारी	...	116-117
8. भावथिना	डम्बरुधर ब्रह्म	...	118-120

### खोन्दो-IV ( फावथाइ )

1. फोजाखांगिरि	ड० जनक झंकार नार्जारी	...	121-137
----------------	-----------------------	-----	---------

## हारियारि मेथाइ

ईशान चन्द्र मोसाहारी

### फराखौ सायख'नायनि थांखि :

मेथाइखौ मानसिनो मानो नांगौ आरो हारियारि मेथाइखौ मोनसे हारिनो मानो गोनां जायो बेबादि खोथाखौनो रायथाइयाव सावरायनाय जादों। मेथाइ खोनाब्ला गोसोआ रंजाखाडे। ईशान चन्द्र मोसाहारीनि बिदि सानस्रिजों सिनायथि होनो थाखाय बे रायथाइखौ सायख'नाय जादों।

### गुबै फरा :

मेथाइ बुडोब्ला बेवहाय गुबुन रावनि मेथाइखौ बुजायाबालानो हारियारि एबा बिमानि रावनि मेथाइखौसो बुजायगोन। हारियारि मेथाइया मोनफोमबो हारिनि सायाव मा रोखोमनि गोहोम खोख्लैनो हागौ बेनिनो इसे बुंनाय जागोन।

मेथाइया खन्थाइनि महरसाल'। खन्थाइया देंखोआव महर गुस्तीयहैब्लाबो मेथाइ मुं मोनहैयो। मेथाइखौ जिउनि सावरायनाय बुडो। पारि-पार्षिक जिउआव जा इन्द्रियजों मोन्दांनो हायो बेनो मेथाइयाव फोरमायथि मोनो। जिउ सुखु-दुखुनि जाथाइफ्रा मोनफा मोनफा फारियै नुनो मोनाजासे मानसिनि गोसोआव थाखोमायो। उनाव बेफोरनो मेथाइ महरै फोर्मायथि मोनो समायना आरो रैसुमै महरै। बुहुमनि गिदिर गिदिर सुबुंफ्रा बुंलांदोदि— “जाय बुहुम मेथाइ आबुं जिउ सोलेरानो मेथाइ, जेब्लाबो मेथाइया जोबहैगोन अब्लानो सोलेरा जोबहैयो।” बुहुमआव जोनोम मोननाय लोगो लोगो जिब जिउआ मेथाइजों आबुं जायो। जों नुनो मोनो गथ'आ बिमाजों बामजानानै गेलेनानै अनजिमा गैयै सुखु मोननानै गावखौनो बावो आरो दुखुनि समाव गावनि गोसोजों दाहागोनां आर'ज बियो। बाथ्रा बुंनो गोहो मोननाय उनाव खुगा सिडाववो फुथिहां फुथियाहां ल'-ल' ला-ला सोदोब बोयो आरो बैसो बारायनाय लोगो लोगो बेयो मेथाइ महरै खुगायाव फोरमायथि होयो। थार बाथ्राया बेनो— गथ'नि गासिबो नुथाइयानो मेथाइ।

दाउसिन-दाउला, एमफौ-एनला, मा जिउ गोनां, मा जिउ गैयि गासिबो गावनि बिमानि रावजों देंखोजों गाव गावनि जिउनि सुखु-दुखुनि मेथाइ खन्थाइ थायो। दाउथु जो-जोलानि दुखु-दाहा, फानफिवालिनि दै गांनाय दाहा, अनजालु-अनजालिफ्रा गावसोरनि सुखुखौ रायथिनो थाखाय बायदिसिना देंखोजों, बायदिसिना खबामजों मेथाइ खनो जों बेखौ खोनासंनो मोनो। बिसोरनि मेथाइयाव बिसोरनि सुखु-दुखु, दाहा फोरमायबाय थायो। थार बाश्राया बेनो जिबफ्रा बिदिनो खालामो। बेनिखायनो मेथाइया सुबुं जिउनि मायाव माबादि गोहोम गोग्लैनो हागौ बेखौ गोरलैयैनो हमना लानो हायो। बेथिडै हमना ला बिमानि गोरबोआव जोनोम मोननानै जों बिमाजों खांजानानै देरो आरो बिमानि खुगायावनो बिमानि राव सोलोडो। बिमानि रावनि अनगायै जों जि राव मोननो हायो, जाय रावजों जों गावनि गोसोनि गासिबो बाश्रा आरो गोसो फोरमायनो हायो आरो गोसोआव सोनानै लानो हायो। बेनिखायनो बिमानि रावानो बयनिखुइबो देरसिन राव, मानोना जोंनि जिआव बिमानि रावजों आबुं। मिनिनाय-गाबनाय, रंजानाय, दुखु-दाहा, गियान, खास्रि-बिस्रि राग आरो दाहा गोनां गासिबो गोसो जिउखौ जों बिमानि रावजों फोरमायनो हायो आरो मोनदांनो हायो, नाथाय गुबुननि रावजों हाया। बेनिखायनो हारियारि मेथाइया मोनफ्रोमबो हारिनि माबोरै गोनां बेखौ बुडाब्लाबो जासै। सिगांआवनो बुंनाय जादों मेथाइया खन्थाइनि आरो गुबुन मोनसे महर। बेथिडै खन्थाइया गोसो खावग्रा। मानोना, जों जायखौ खोनानो मोनो, नुनो मोनो एबा हमनानै मोनदांनो हाया बेखौ खन्थाइया जोंनि सिगांडाव लाबोयो। बेनिखायनो जों खन्थाइखौ एफाग्राब मोजां मोनो। खन्थाइयानो गोसो खावग्रा, बिदि नड। खन्थाइया गोथौथिजों आबुं। जाय जौगाथिनि थाखाय मानसिनि जिउआ गलियो। नाथाय मेथाइया खन्थाइनिनो देंखो बोनाय। बेनिखायनो मेथाइया आरोबाव गोसो खावग्रा। बेनिखायनो हारियारि रावनि मेथाइया बयनिखुइबो गोसो बोदोर खालामो। मेथाइनि गोहोआ एफाग्राब गोरदि, बेयो दुखुखौ भिखा होनानै बिदाय होयो, रागखौ क्रोसाव सोनानै होनानै संहार खालामो, हिंसा, मुगैनायखौ जोगार हरो, सुथुरखौ बिसुखे खालामो, थामहिनबा, थैरि बुहुमखौ अमर बुहुमाव गुस्लाय होनो हायो। जिउनि बिखानि रोदाफोरा मेथाइनि देंखोजों खानाय। मेथाइनि देंखोआव हाबनानै बिखानि रोदाफ्रा जांखिखाडो। बे जांखिखांनयाव बिखाया 'उंकार' सोदोब

रिखाडो। बेवहायनो जों सिरि मोनो आरो सुथि मोनखांनानै सुखु-दुखुआव बाग्रायलाबायो। मिजिं, हाथासा, गिहां थुलुंगा अब्लानो जों हमनो हायो। अब्ला जों बुंनंगौखौ नागिरनानै लानो हायो। थैजासिम समहालागै बे मेथाइया जोंनि लोगो। सोर्गो सुखु मोनहोयो बेनो, दुखुआव खुसि होयो बेनो, मावनांगौ हाबानि गुदुं लामाखौ बारनो बोलो होयो। बेसेबां साधु, मुणि-ऋषि बे मेथाइयाव सोर्गो भ'ग मोन्दों बेखौ माबोरै सानखांनो ? बेसेबां राजा-महाराजाफोरा बे मेथाइयाव सौदावलाय, गोग्लैलाय जादों बेनि सोर हिसाब लाखिनो ? सिफुंनि देंखोआव मुहनाय जिबौबादि बे बुहुमा मुहिहाबनाय।

दानिया हारियारि मेथाइया हारिनि मा मोजां हाबा होयो बेनि सोमोन्दै इसे बुंगोन। हारियारि मेथाइया हारियारि जौगानायनि गाहाइ गोहो। जाय हारिया, जेसेबां मेथाइ सर्सा खालामनाय नुनो मोनो बे हारिया बुहुमाव जेसेबां जौगा, बे हारिनि महत्विनि आफादाबो एसेबां मोजां। आमेरिकान, फरासि, इटालियान, इंराज, र'मान, ग्रीकफोरनि हारियारि देरगानायखौ जों खोनाबाय थायो। जोबोर मिहियै नोजोर थिब्ला नुनो मोनो सिगांडावनो बिसोर मेथाइ सर्सायाव सिगांग्रोदोंमोन। बेसेबा मुगानि सिगां बिसोर हारियारि मेथाइखौ सर्सा खालामबोदोंमोन बेखौ बिसोरनि रनसायनाय खन्थाइमाफोराव मोनो। मोदाइ मोदाइजोफोरखौ सिबिनाय समाव सिख्लाफ्रा 'देवदासि' महरै आर'ज मेथाइयाव अन्जलि होयोमोन बेखौ जों रोखायै नुनो मोनो। गोदोनि बाश्राखौ गारनानै आथिखालनि फारसे दिथा होब्ला नुनो मोनो। आमेरिकान Lady एबा हलिउडआ सोर्गोनि सिख्रि-सिख्लाफोरबादि दाबो मेथाइनि रैसुमै बिलाइया हादरखौ बोदोरिया खालामो। फारसि, इंलेण्डाव रंजासालियाव सेंग्रा-सिख्लाफ्रा मेथाइ सर्सा खालामनानै दुलाराय हादरआवनो मेथाइजों बुंहोबाय। बिसोर दाबो गोदान जिउ लानानै गोदान थुलुंगाजों मेथाइखौ रैसुमै खालामनो थियारि। बुहुमा सिनायनो हाबाय बिसोरनो 'गौरब'नि जौसिन थिखिनीयाव गाखोनो हानाय फिसाफोर। सेक्सपीयेर, मिल्टन, बाइरन, मेयनेलबादि मुंदांखा खन्थाइगिरिफोरनि रनसायनाय गोथौथि गोनां, ख'बाम गोनां मेथाइयाव दिनै बिसोरनि हारियारि फंबाय बिनानावफोरनि जिउआ बाज्ल'खांबाय। बिसोरो हादर आरो हादरनि सुबुंफोरनि थाखाय जिउ बुलि होनो थियारि। बिसोरनि गोसोआव हिंसायनाय गैया। फंबाइबादि गोबालायनाय बे मेथाइयाव गाव गावनि सार्थखौ

बावनानै बिसोर जौगा-दावगा आरो गोर्बोनि जौसिन थिखिनियाव गाखोआब्ला, सोर गाखोनो ? जौनि हादराव नुनो मोनोदि जाय जाथियाव जेसेबां मेथाइ ससी खालामदों एसेबां जौगानि लामाथिडै सिगां लांदों । बारा मा, बांगालिफोरनि बाथ्राखौनो बुं । बिसोर सिगां मेथाइ मुंनि माबा सोलोंनांगौ आयदा दि दं बेखौ मिथियामोन । बिसोर सिगां समाव हारियारि दाबि खालामनो जेबो गोहो गैयामोन । बिसोर अब्ला 'असभ्य' हारि होननानै सिनायथि मोनोमोन । बे हारिखौ दिनै नायदो माबोरै बिसोर दा हारियारि दाबिखौ सिनायथि होनो हाखो । बेनि जाहोना मा ? थार बाथ्राखौ बुडोब्ला बेनो, मेथाइयानो बिसोरनि जौगानाय-दावगानायनि गाहाइ गुदि । बिसोर मेथाइखौ लानानै दिनै बहुमाव खर' दिखानानै बिखा फोर्दाननानै बुंनो हाबायदि बिसोरो मोनसे हारि । बेनिफ्राय बेखौ बुजिनो हायोदि हारियारि मेथाइया हारियारि जौगानि गाहाइ 'सम्बल' । बेनो जायोब्ला जों मावनांगौ हाबाया मा ? जौनि मावनांगौ हाबाया हारियारि मेथाइखौ रैखा खालामनाय । जौनि रावनि मेथाइखौ सोर खोनासंनो आरो खोनासंनानै सोर बाख्यायनो ? बे गोसोज्लिदखौ गोसोआव जायगा होवाब्ला दायनि हाबा जागोन । मानोना राव बुंनो रोडै दाउसिन-दाउलाफोरनि मेथाइयावबो मानसिनि जिउआव फाग्ला जायो । उदां बोथोरनि दाउ खौऔनि देंखो बोनायाव खन्थाइगिरिया बहुमनि खन्थाइयारि गोसोआ बाज्जखाडो, बिदैजों आबुं थायो आरो बेयावनो खन्थाइगिरिया बहुमनि खन्थाइयारि बिदै बिलायनो हायो । बिसोरनि रावखौखि मानसिया बुजियो । थेवबोदि बिखौ बाख्यायो ? उदां बोथोराव दाउ खौऔनि सिनायथि मोनो । बेबादि जौनि रावआ रावजों बुजिनो हाखायाब्लाबो दाब दाब हादराव बर' हारि बुंनायदि मोनसे हारि दं, बे सिनायथि होनाय जागोन । निग्र'-आफ्रिदि, चीना, जापानि, नेपालीफोरनि रावखौ साबेसेया बुजिनो हायो ? थेवबो बिसोरनि मेथाइया बहुमाव सिनायथि मोनो । बेबादिनो जौनि मेथाइयाबो आदर आरो सिनायथि मोनगोन । हाथासा जानो जेबो जाहोन गैया । हारियारि मेथाइखौ माबोरै बुरखानांगौ बेनि लामाखौ बुंख'नानै माखासे बिदिन्थि होनानै सावरायनाय जागोन ।

गाहाइयै आं बुंनो सानो जोंहा जौनि माबा हारियारि मेथाइ दंमोन ना एबा दड' नामा ? फिननायाबो दंमोन आरो दं जागोन । बेनि सिनायथिया बेनोदि गोदोनि समाव जौनि उत्सब फोरबोफ्राव जेरै— खेराइ-माराय बायदिसिनायाव दौदिनि

एबा गुबुन गुबुन 'बिर-बिरांगना' आरो 'नायक-नायिका'फोरनि मेथाइ खननाय आरो मोसानाय जायोमोन, जायफ्रा दाबो सोलिबोदों । जौनि जेराव हाबा-हुखाफ्राव सेंग्रा-सिख्लाफ्रा हान्जायै मोसानाय, मेथाइ खननाय खान्थि दंमोन । आथिखालाव गोबां जायगायाव बे गैलियाब्लाबो बे खान्थिखौ दाबो इडर'प हादरआव नुनो मोनो । नाथाय बिसोरनि रंजानाया मार्जित । जौनिबादि सिखोन-साखोन गैया नडा । जौनि बोराइ-बुरैफोरनि बुंथिनाय मथे जायखौ जों सल' बुडे । बेयावहाय लावखारफोरनि मेथाइखौ बुंथिनाय जायो एबा सिफुं दामना दाउदै मागिनाय आरो माइरं खिन्दा बिबायनाय बायदिसिनाफोरनि मोजां बर्नायनाय मोनो । बेफोरनिफ्राय जोंहा गोदो मेथाइ दंना गैयामोन बेखौ मोन्थिनो मोनो । बेनि सिनायथिया बेनोदि लावखार गथ'फ्रा कदम बिफांनि दालाइयाव जिरायनानै श्रीकृष्णबादि गावसोरनि मोजां मोननायखौ सिफुंनि देंखोजों आरो रैसुमै मेथाइजों बर्नायो । लेखा रोडै गथ'-गथ'साफ्रा, सेंग्रा-सिख्लाफोरा आरो बोराइ बुरैआबो खाम, गंग'ना, सेर्जा, खावां, सुफिन, बेंबु आरो गुबुन गुबुन हारियारि बाद्य-बाजोना दामनानै उत्सब फोर्बोआव रंजानाय जों दाबो नुनो मोनो । मेथाइ बुंनाय जिरादा थायामोनब्ला बेबादि लेखा रोडे हिन्जावफोरनि खुगायाव मेथाइनि मेखौनो खोनानो मोननाय नडामोन । बेनिखायनो जोंहाबो जौनि होननानै दाबि खालामनो गोहो दं नाथाय जोहां अमार्जित आरो माधुर्ज गैया । गावनि आखाइनि दौलतखौ जों नस्थ खालामनानै लाबाय । बेनो दुखुनि बाथ्रा । गुबुन हारिया मान्जिनानै फुननानै गावनि जिरादखौ फोसाबनानै लाबाय, नाथाय जों साफाखौनो मैला खालामनो गोसो लादों । जौनि मेथाइया बिदि बिशुंखल जानायनि जाहोना मा ? बेनि जाहोना जादों मेथाइ ससी खालामै । मेथाइनि थिडै जों हेव नोजोर होयो । जौनि मेथाइहा गावनिनो देंखो दं नाथाय बे जिउ होनाय खेमता जोंहा गैया । बे गोसोखौ मोननो बबेयाव ।

गिबियाव ससी आरो सोलोंनायाव मेथाइ फरायसालियाव सोलोंहैनो गोनां, जाहाथे जौनि गावनि देंखोनि 'स्वरलिपि' रनसायनानै दोननो हायो । बिदि नडाब्ला देंखोनि थासारियाव माबोरै थानो ? दारेन्द्र नाथ बसुमतारी आरो गुबुन गुबुन माखासेफ्रा बर' मेथाइ मोजां मोनग्रा सुबुंफ्रा गाव गावनि मेलेमजों हारियारि मेथाइ रनसायनानै बेसेबांदि मेथाइनि जिउ होदों बेनि अनजिमा गैया । नाथाय दुखुनि बाथ्रादि स्वरलिपि गैयिआव बिसोरो रुंसारि जानाय लोगो लोगो गासिबो देंखोआ

जोबस्रांगोन। बेनिखायनो गुबुननि रावावब्लाबो 'मिउजिक' स्कुलाव सोलोंथाइ लानो गोनं। हारियारि मेथाइ, फावथाइ, सल'माफोर रनसायनांगोन। बेखौ गोसोआव लानो नाडादि इसेल' लेखा फराजों फावथाइ, सल'मा रनसाइनो हाया। सर' खालामब्लानो गासिबो हायो। बिश्व कबि रबिन्द्रनाथ, श्रेष्ठ फावथाइगिरि सेक्सपीयेरमोननि बाश्राखौ साननानै नाय, बिसोरहाबो लेखा फराया इसेलमोन। बेनिखायनो हाथास जानाया गिदिर इनाय। नेपलीय'ना बुंदोंमोन— "Impossible is only the word that can found in the Dictionary of fools". थामहिनबा असम्भव खोथाया जाम्बानि सोदोब बिहुंआवसो दं बे खोथाखौ गोसोआव लानानै हाबायाव नांनानै थानांगोन।

*ईशान चन्द्र मोसाहारिनि बांला रावाव लिरनाय 'जातीय संगीत' मुंनि रायथाइनि बर' महर।*

#### सोदोबथि :

पारि-पार्षिक- सोरगिदिनि आबहावा  
 संहार- फोजोबनाय  
 सर्सा- सर'  
 गौरब- गोग्गानाय  
 असभ्य- सोद्रोम नडि  
 सम्बल- बिथा  
 बिशुंखल- गुलाय गुजाय  
 क्र'स- सिथारग्रा सोरनि जं (cross)  
 उंकार- अंकार, इसोरनि रिसार मुं  
 बोदोरिया- बोदोर  
 आदर- अननाय  
 हाथास- गोसो बायनाय  
 माधुर्य- गोदै

खेमता- गोहो  
 श्रेष्ठ - साबसिन

#### सोंथि :

1. हारियारि मेथाइ माखौ बुडो ?
2. बयनिखुइबो देरसिन रावआ मा ? मानो ?
3. मेथाइनि गोहोआ माबादि ?
4. हारियारि मेथाइया हारिनि मा मोजां हाबा मावो ?
5. बर'फोरनि मोनबा हारियारि दामग्रा-देग्रा आगजुनि मुं लिर।
6. नेपलिय'नआ मा बुंदोंमोन ?

#### बेखेवथि :

1. सिफुं देखोआव मुहिनाय जिबोबादि बे बुहुमा मुहिहाबबाय।
2. गावनि आखाइनि दौलतखौ जों नस्थ खालामनानै लाबाय।

#### फरा गियान :

खन्थाइखौ देखोआव महर होब्लानो मेथाइ जायो। मेथाइ गैयाब्ला जोंनि गोसोआव गोजोन गैयि जागौमोन, जिउआ जागौमोन मोन्दांथि गैयि गोथैबादि। हारियारि मेथाइया हारि मोनसेखौ गावनि हारिनि सिनायथि होनायनि लोगोसे हारिखौ गाव हारिनि फारसे सांग्रां थानो फोरोडो। मेथाइया गोसोखौ गोजोन होयो। बेनिखायनो खोनानायनि अनगायैबो गावनो मेथाइ खननो सोलोंनांगौ।

#### फोरोंगिरिनिस्मि :

मेथाइया मा आरो बेखौ मानो सोलोंनो एबा सर' खालामनांगौ बेनि सोमोन्दै बे रायथाइखौ फोरोंनाय समाव फोरोंगिरिया फरायसाफोरखौ सावरायनो हागोन।

## बर' हारिनिस्मि फंनैसो

करीन्द्र नारायण ब्रह्म

रा: सो: उमेश बर'

### फराखौ सायख' नायनि थांखि :

जायखि जाया हारिया जौगानोब्ला-सोलोंथाइनि गोनांथि दं। सोलोंथाइनि आंखालाव संसार जानाय, न'खर फोसाबनाय, फिसा-फिसौफोरखौ लेखा फोरोंनाय एबा गियान होनाय, आब्रुथि गोनां समाज दानाय बायदि खामानियाव फेलें जानांगौ जायो। बुहुमनि जाय हारिफोरा जौगानो हादों, गासैबो सोलोंथाइनि गेजेरजोंसो हादों। गाव हारिनि गेजेराव खौसेथिनि आंखालावबो जौगासारनो हाया। बर' हारिनि बेलायावबो बेखौ गोरुबनाय नुनो मोनो। मानोना, दासिम बर' हारिनि गेजेराव खौसेथि फोथायज्जायनाय गैज्जाया। जायनि जाहोनाव बर' हारिया दासिम जौगानो हायाखै। आइजोफोरा नखर बेंनाय खामानियाव रोंखा राखा, आखा-फाखा जानो रोंनाया सोलोंथाइनि सायाव सोनारो। बर' आइजोफोरा सोलोंथाइयाव जोबोर उन जानानै दड'। बेखायनो आइजो-सोलोंथाइनि गोनांथि जानानै फैदों।

हारि जौगानो थाखाय दोहोननि गोनांथि दं। नाथाय बर' हारिनि गोबां दोहोनगोनां सुबुं दड'ब्लाबो सोलोंथाइ गैयिनि थाखाय मोजां खामानियाव, हारि जौगानायाव दोहोननि बाहायनांगौखौ रोखायै एबा हमदांस' हायाखै। जौ लोंनाया एबा बाहायनाया बर' हारिखौ जौगानायनि हेंथा। बे गाज्जि हुदाखौ जेब्लासिम नागारनो हाया, बे समसिम बर' हारिखौ जौगानो हागोन होनना मिज्जिथिनो हाया। बेफोर गासै बाथाखौ मिथिहोनो थाखाय बे फराखौ सायख'नाय जादों।

### लिरगिरिनि सिनायथि :

बिबार मुगायाव दोंफा दोंनै रायथाइ लिरनानै बर' थुनलाइ सोर्जिनायाव

फुंखा, थुलुंगा होग्राफोरनि मादाव बिथां करीन्द्र नारायण ब्रह्मआबो सासे। बै समनि बिबार लाइसियाव सेबखां जानाय— “बड' जातिलै दु-आषारमान” (असमीया रावजों लिरनाय) मुंनि रायथाइयानो बिथांनि थुनलाइ सोर्जिनि नेरसोन। बै रायथाइनि गेजेरजों बिथां ब्रह्मआ— जौगानो हायि बर' सुबुंफोरा मिथिनो गोनां गोबां बेसेनथियारि बाथाखौ बिदिन्थिजों फोरमायथिदों। गाव हारिखौ जौगाखांहोनायनि थांखियै गोबां बोसोन खान्थि आरो बिदिन्थिजों फोरमायना लिरग्रा बिथां ब्रह्मनि थुनलाइयारि बिहोमाखौ जों जेब्लाबो बावनो हानाय नड।

### गुबै फरा :

आलायारण समाव दिनै भारतनि गासैबो जिउआरिया सिरि मोनबाय। नाथाय बे सिडाव गोलैना थानाय बर' हारिया दासिमबो उन्दुनायनिफ्राय सिरि मोनखाडाखै। बिसोर साव नांजानाय अहल्यानि बादियै जिउगैयि बेसादिनि महर जाना दड'। बुंनो हाया बेसेबां सानाव बिसोरनि सावआ उदां जागोन, बेसेबां सानाव सिरि मोननानै एम नागारनो हागोन।

दिनै भारतनि गासै हारिया खामानि मावनायनि जाहोनाव जौगानाय लामायाव दावखोलानो हमदोंसै। जाबादि जों सिगां नागा, कुकि बायदि हाजोआरि हारिफोरखौ मुगैदोंमोन, बैफोर हारिया दिनै खौसेथि आरो खामानि मावनायनि जाहोनाव जौगानाय लामा सिनायनो हादों। इराज, चीन, जापान बायदि हारियाबो खामानि मावनाय आरो खौसेथिनि गोहोमाव जौगानाय हारि होनना बुंजादों। बिथांमोना गाव-हारि आरो गाव-हादरनि थाखाय गोबां मोजां मोजां खामानि मावदों। बिथांमोना साफ्रोमबो मोनसे नड मोनसे खामानियाव आखा-फाखा (एबा रोंखा-राखा)। गार'फोरा पादुरी साहाबनि बिबुंसार खोनासंन बिथांनि बिथोन बादियै खामानि मावनो हमदों। राजबंशीफोरा हारियारि जौगानायनि थाखाय मिथिं-दावथिं खालामना बिथांमोनादि क्षत्रिय बंश बेनि फोरमान महरै बर्मा, सिंह बादि बिमुं लिरनो हमदों।

समाजनि गेजेराव बेबादि खौसेथि साननाय थायाब्ला रावबो हारियानो जौगानाय लामायाव आवगायलानो हाया। दिनै बुहुमनि गासैबो सोद्रोम नडे (असभ्य) हारिया जौगानायनि लामायाव स'हैनो हाबाय, नाथाय बर' हारिया



दिनैसिमबो उन्दुनायनिफ्राय सिरि मोनाखै।

जोबोर दुखु आरो लाजिथाव बाश्रा दि जॉनि बर'हारिया दाबो जौगानायनि लामा सिनायना लानो हायाखै। बेनि जाहोना सोलोंथाइनि फारसे गोसो गैयियाव जॉनि हारिनि गोबां बाहागोनि सुबुंआ अगियान, जाम्बा आरो हमदांथि गोहो गैयि जाना गासैबो आयदायावनो रोंसारे महराव दड'। हमदांथि गोहो गैयिनि थाखाय मोजां गाजि बिजिरनो रोडैयाव जायखौ मोनो बेखौनो मावो, गावजों-गाव गोरोबना जायखि जाया मोनसे खामानि मावनायबो नुनो मोना। जाय हारिया खौसेथि साननाय गैया बै हारिया जेब्लाबो जौगानो हाया। बुहुमआव जेसेबां हारिया खौसेथि साननाय गैया बै हारिया जेब्लाबो जौगानो हाया। बुहुमाव जेसेबां हारिया जौगानो हादों, गासैबो गावजों-गाव गोरोबनाय आरो खौसेथि साननाय नडब्ला हारिसंयै रावबो जौगासारनायखौ जाफुं होनो हायाखै। मासे मैदेरखौ दोंसे दुरुंजों खाना लाखिनो हाया, नाथाय रोजा रोजा खुन्दुंजों ज' खालामना खानाय जायोब्ला गोबां मैदेरखौबो गोरलैयै खाना लाखिनो हायो। "राइजोआ आसि सोमावब्ला दैमा बोहैयो", "दैहुनि मोखाड मैजाखौ लोमसावोल", नाथाय अनजिमा गैयै (गोबां) अ'खानि दाहारा लैथोखौ लोमसावो। गेदेमा सुबुंनि खामानिया लामा दिन्थियोल' राइजोनि जथाय गोहोआसो लामा बानायो (खोयो)।" (आखल सोलोंथाइ जोबथा बाहागो) थामहिनबा दैहुनि दैखौ हायाव लुना होयोब्ला मैजानि सिडव हाबोल' नाथाय आसि सोमावना दै सारफावोब्ला बेनिनो मोनसे बाना महर मोनो आरो अखानि नेहाद दै थरथिनि ज'थाया लैथोखौबो बुंसार होयो। फिन गेदेमा सुबुंफोरा जायखि जाया मोनसे खामानि मावोब्ला बेनि फुंखाखौल' मोनो हायो, नाथाय राइजोआ बै खामानियाव हमोब्ला खामानिया आबुं महरै जाफुंसारो। बेबादि जों खौसेथि बुंफुरलुआव नांथाबनानै जौगानाय समाजनि फोरोंखान्थि लाना खामानि मावोब्ला, थारैनो साननैसोआवनो जौगासार खालामनो हागोन।

नैथियाव : जॉनि हारिनि गेजेराव सोलोंथाइ गोसरैनि थाखाय हारिनि जौगानाया जाफुंआखै। जोबोर गोमोथाव बाश्रा दि ग'वालपारा जिलायाव गासै हारिनिखुइ जॉनि हारिनि अनजिमायानो बांसिन। खमैब्लाबो सा 60-70 जौखोन्दोआनो जॉनि हारिनि सुबुं। नाथाय, थायोब्ला मा जानो, साफ्रोमबो भेरानि बादि। जॉनि बर' माहारिनि गेजेराव दाबो सोलोंथाइ माखौ बुडे मिथिया। गोबां सुबुंआ सानो दि लिरनो आरो फरायनो हाब्लानो एबा इराजीजों फनैसो बाश्रा बुंनो रोंब्लानो

सोलोंथाइया आबुं जायो। नाथाय बेयो गोरोन्थि। मानोना लिरनो फरायनो एबा इराजीजों बाश्रा बुंनो हाब्लानो नंगुबै गियान मोननो हाया। बै सोलोंथाइजों आं गिदिर साननायसो फोरमायथि मोननो हायो। बेखायनो जाय सुबुंआ माबादि जिउनि समखौ बारग'लांहोने नांगौ, माबादि संसारनि मावनंगौखौ मोजांयै मावफुंना गथ'फोरखौ फेदेरनो-फोलाउनो नांगौ आरो सोलोंथाइ होनांगौ, माबादि सोलिब्ला नंगुबै सुखु-गोजोनथि मोननो हायो आरो माबादि गोसोथियारि खामानि मावोब्ला गावनि आरो गुबुननि मोजां जानो हायो, बेफोर आयदानि सोलोंथाइ मोननो हादों, बिथांमोनासो नंगुबै सोलोंथाइ गोनां होनना बुंनो हायो। सोलोंथाइ गोनां जायाब्ला दोहोरोम आयदानि सानथौखौ बुजिनो हाया। दोहोरोम सानथौखौ बुजिनो हायाब्ला समाजखौ थियै (गद-गोनाडै) लाखिनो हाया। बे संसारा देरसिन सुबुं हारि जानानैबो समाज दानो हायाब्ला सुबुं आरो जुनारनि मादाव जेबो फारागानो थाया। जाय हारिया समाज गैया बै हारिया माबादि जौगानो हानो? जॉनि हारिया सोलोंथाइ गैयैखायनो दाबो दोहोरोम सान्थाइखौ गोखों खालामना लानो हायाखै, बैनि जाहोनावनो समाज दानाय, सोलेरारि, गोसोथियारि, गोसोन्थियारि जेबो आयदानिनो जौगानायनि लामा सिनायना लानो हायाखै।

आइजो सोलोंथाइनि आंखालाव जॉनि हारिनि आइजोफोरनि गेजेराव दाबो सतीनि (फिसाय सिबिसुलि दोहोरोमारि गुन गोनां आइजो) सान्थाइया सोमजियाखै (नुजाथियाखै)। सतीया मा आरो माखौ बुडे बेखौनो मिथिया। आथिखालाव जेसेबां आइजो नुनो मोनो साफ्रोमबो लाजिनाय गैयि, संसार जानायाव नांज्लाय-खमज्लाय खालामनो मोजां मोनग्रा, गुबुननि मोजां मोनै (एबा सानै) खांखिनि आरो देलाय मांग्रि। सोलोंथाइनि आंखाल खायनो न'नि खामानि सामब्लायनाय, दाहोना-रुवाथि जोथोन लानाय, फिसा जोथोन लानाय, बिमा-बिफानि फारसे सिबिनाय, आलासि सिबिनाय, जानाय-लॉनाय आरो नखरनि खामानि बायदि गासै आयदायावनो रोंसारथाइ नड। बेखायनो जों हारिखौ जौगासार खालामना दैखानोब्ला आइजो सोलोंथाइ होनाया जॉनि थाखाय जोबोर गोनांथि। मानोना जोनोम जानायनि इयुनावनो फरायसालिसिम हगार हरनो नांगौ रोखोम बैसो जायैसिम, गथ'आ (हौवा-हिनजावसा) बिमाजों जोथोन लाजायो। बेखायनो बिमाया सोलोंथाइ गोनां नडब्ला बे बैसोआव गथ'खौ माबादि सोलोंथाइ होनो?

इयुन समाव गथ'खौ मोजां खालामनाय बिथिंआव बिमायासो सोलोंथाइ होनांगौ जानानै फैयो। बेखायनो जाहाथे आइजो सोलोंथाइ गोसार होनो हायो, बेनि थाखाय जोथोन लानाया जॉनि मावनांगौ खामानि। जों हौवा हारिया लासै लासै जॉनि सोलोंथाइ गोसार होनो हमदोंब्लाबो नाथाय “आइजो-सोलोंथाइ'खौ गोसार होनो थाखाय दासिम जों राहा खालामना होनो हायाखै। टिपकाइयाव गंसे ( Technical M.E. School) टेकनिक्याल गेजेर फरायसालि गायसनना बैयाव हौवासा-हिनजावसाफोरखौ लिरनाय फरायनायनि लोगो लोगो दंफां मिस्त्रिनि खामानि, सि दानाय, सावगारि बायदि बोनानै दिन्थिदोंमोन। नाथाय जोबोर दुखु आरो लाजिनायनि बाथ्रा, जॉनि समाजनिफ्राय गोबां रां बाहायना फरायसालिखौ लुना सोलोंथाइनि न', हौवा-हिनजावसानि थाग्रा न' आरो संग्रा न बायदि लुफुंन होनानैबो गावनि सम्फति (दौलत)खौ गावनो लाखिनो थाखाय जोथोन लायाब्लासिनो बिब्दियैनो खोमानांबाय।

फरायग्राफोर, नोंथांमोना हमदां हादोंदा, जॉनि हारिया मानि थाखाय गावनि सम्फथिखौ गावनो फोजोबलांनो हमदों ?

बेखौ सिगांनो मुंख'थिनाय जादोंदि जॉनि हारिनि गेजेराव दाबो गावजों गाव फोथायखेबस' आरो मावनांगौखौ मावफुंनायाव गिनो रोंयै। बेनि थाखायनो जों एसेबां सान जौगानो हायाखै आरो जेसेबां सानसिम जों बे सानथाइखौ जायखार होनो हाया बै सानसिम जॉनि हारिया जौगानो हानाय नड होनना फोथायो। बेखायनो बैफोरखौ जानगार (जायखार) होनो जाहाथे आइजो-सोलोंथाइखौ गोसार होनो हायो बेनि थाखाय मोजांयै नोजोर होनाया गोनां। अब्लासो जों संसाराव जौगानो हागोन।

थामथि : दोहोननि मोजां बाहायथिनो रोडिनि थाखाय जॉनि हारिया दाबो (दासिमबो) मोजांयै जौगानाय लामायाव दावखोनो हायाखै। बर' माहारिनि गेजेराव खावसेनि बांसिन सुबुंआनो दोहोनि। नाथाय दोहोनि जाब्ला मा जानो ? दोहोन थाब्लाबो गोबां सुबुंआनो दोहोननि मोजां बाहायथिनो रोड। ओरैबादि गोबां सुबुं दड' जाय दोहोनगोनां जानानैबो रांखौ इसेबो खरसा खालामनो लुबैया।

बिफोरबादि सुबुंखौ सरासनस्रा (साधारण) बाथ्रायाव खिरफिन बुंनो हायो। खिरफिनखौ दोहोन गैयि (गैजायि) होनना बुंब्लाबो नंखाय बुंनाय जाया।

मानोना जाय सुबुंआ दोहोन थासेयावबो दोहोननि मोजां बाहायथिया बिखौ दोहोन गैयि होनना बुंब्लाबो जुक्तिनि जेबो दाय गैया। मानिजाथाव सत्यनाथ बराया 'धनर व्यवहार'आव खिरफिननि बाथ्राखौ मोजाडै फुवारना लिरदों। बिथानि जुक्तिजों लोगोसे जॉनि माहारिनि खिरफिनफोरखौ रुजुना नायोब्ला गोबां आयदायाव गोरोबथाइ नुनो मोनो। बेनि थाखायनो बिथानि फंनैसो बाथ्राखौ बेयाव दैखांन होनाय जाबाय— खिरफिननि सानखांथियाव दोहोननि बेसेना गोबां, खामानिनि (हाबानि) बेसेना एसे, बेनि थाखायनो गोबां खामानियाव एसे दोहोन दोनथुमो। सोरबा सुबुंआ गिदिर थांखि लाना गोबां बिबानि दोहोन बाहायनो ओंखारब्ला (एबा खरसा खालामनो ओंखारब्ला), बियो बेयाव हेंथा होयो आरो गोबां गाज्रि आखुथाइ दिन्थियो। आरो बेफोरबादि राहाजों खामानियाव हेंथा होनो हायाब्ला, मोनसे (फंसे) नंखाय बाथ्रा दिहुननानै बिनि गाज्रि-फाव फान्दायो। मानिफ्राय सुबुंनि खिरफिनथिया जोनोम जायो बेखौ थियै बुंनो हाया। खिरफिनफोरनि जिउ सोलिखांथिखौ मोजाडै नायबिजिरोब्ला नुनो मोनो दि बिसोरनि खायफाया गोबां दोहोन-बाखि खालामना बुहुमनि गेजेराव मोनसे गावनि मुं लाखिनायनि गोसो थियै खिरफिनारि खालामो। आरो खायफाया फिसा-फिसौफोरनि थाखाय दोहोननि मोनसे जोबनो गैयि बाखि दोननायनि गोसो थियै खिरफिनारि खालामो। आरो मोनसे थाखोनि खिरफिन दड', बिसोरो दोहोननि थाखायल' दोहोन खामायो, गुबुन जेबो लुबैनाय (हाबिला) गैया, दोहोननि बिबाड बाडोब्ला बिसोरनि रंजानायनि बिबाड बाडे। बिसोरनि गोसोआव दोहोना सुखु-गोजोननि राहा, दोहोनानो सुखु। बिसोरबादि खिरफिननि अनगायै आरो मोनसे थाखोनि सुबुं दड', बिसोरो जायखि जाया मोनसे थिरां खालामना दोननाय गिदिर खामानियाव खरसा खालामनो थाखाय खिरफिननि आखु दिन्थिनानै दोहोन खामायो आरो दोहोनआ थुबुर जायोब्ला इयुनाव बेखौ उदाडै खरसा खालामो, थारैनो बिसोरखौ खिरफिन होनना बुंनो हाया। खिरफिन जानाया जेरै मुगैनायनि बाथ्रा, उदाडै खरसा खालामनायाबो बिब्दि मुगैथाव बाथ्रा। खिरफिनआबो दोहोननि मोजां बाहायथिनो रोड, उदाडै खरसा खालामग्रायाबो दोहोननि मोजां बाहायथि मिथिया, आय (खामाय) बादियै (लेखायै) खरसा खालामनायानो दोहोन बाहायथिनायनि गुबै मोन्थोर।

दोहोननि मोजां बाहायथिया मोननै रोखोमनि जानो हागौ।

(i) दोहोनजों सुखु सम्फदनि आइजें-आइलाफोरखौ बुधुमना लानो हायो। जानायनि-लौनायनि मोजां बेसाद-मुवा (मुवा-बेसाद), गाननाय-जोमनायनि मोजां सि-जोम, थानायनि मोजां न' आरो मैदेर, गराइ, गारि, दोला दाहोना-रुवाथि बायदि लानानै संसारनि सुखुनि आइजें-आइलाफोरखौ दोहोन जायोब्ला बुधुमना लाबोना भ'ग खालामनो हायो।

(ii) दोहोनजों गुबुननि मोजां खालामनो हायो, ओंखाम गैयैनो ओखाम, सि-जोम गैयैनो सि-जोम, दोहोनजों थोहोयो, सुबुंआ खैफोदाव गोलैयोब्ला दोहोनजों रैखा खालामनो हायो। आरो सोलोंसालि, देहा-फाहामसालि बायदि लुनानै (गायसननानै) गासै सुबुंनि मोजां खालामनो हायो।

बर' हारिया जौगायैनि गुबुन मोनसे गाहाइ जाहोना जादों जौनि बाहायनाय। जायनि जाहोनाव देहा, गोसो आरो रांखान्थि ख'हा जादों। जौनि थाखायनो गोबां बर'फोरा अबथिरायै जिउ थुंगिनो गोनां जानादों, हा-हु, बारि-बागान गासैबो जोबस्रालांदों। थारैनो जौआ जौनि मा खहा खालामो? (i) समनि खहा : जौ लौनायाव नांथाबोब्ला समनि खहा जायो। (ii) रांनि खहा : जौ संनायाव माइरंनि खरसा जायो आरो फेनानै गुबुनखौ जाथावै एबा गज्रि बाथ्रा बुंब्ला एबा खहा खालामोब्ला बिजिरसालियाव जरिमाना होनांगौ जायो। आरो (iii) देहानि खहा : जौ लोडेब्ला हरआव मोजाडै उन्दुनो हाया। थि समाव खाजा जानो हाया। आरो जोबोर लोबां जानानै बेरामी बादि देहाया रानज्रंलाडे। बेखायनो जौ लौनाय हुदाखौ फोसाबनो हायाब्ला बर' हारिखौ जौगानो हागोन होनना मिजिं थिनो हाया।

सुबुंआ सानफ्रोमबो मोनसे महराव थानो हाया। दिनै जों जेसेबां जौगानाय हारि नुनो मोनो बिथांमोननि रावबो सानसेयैनो (सानसेयावनो) जौगानाय हारि जानो हायाखै। दिनै एसे, गाबोन एसे खामानि मावनानैसो गोबां साननि उनाव बिब्दि जौगासारनायनि जांखलायाव उथिनो हादों। बेनि थाखायनो बुंनि फंबायमोन। गाज्रि-खान्थिखौ नागारना मोजां-खान्थिखौ नाजावना ला। हिंसा, गाज्रि सान्थाइखौ बावगारना हारियारि जिउ दानो थाखाय नांथाब। बेखौ खालामोब्ला नौनि जिउआ जाफुंसारगोन। बर' हारिनि बराद-आंखालाव सुखुनि सान नुजागोन।

**सोदोबथि :**

आलायारण - सान नुजाजेननाय, फुंबिलि सम  
जिउआरि - जिउगोनां, प्राणी  
हाजोआरि - हाजो ओनसोलाव थानाय सुबुंफोर, हारिफोर  
सोद्रोम नडै - सोदोमस्रि मोनै सुबुं, गियाननि सोरां मोनि सुबुं  
हमदांथि गोहो - हमनो हानाय, मिथिनो हानाय गोहो  
रोंसारै - जायखि जाया खामानि मावनायनि गियान गैयै  
गोसोन्थियारि - आध्यात्मिक  
सती - गोथार, दोहोरोम सिबिसुलि आइजो  
खिरफिन - रां थानानैबो खरसा खालामि सुबुं  
आय - खामाय (Income)  
गाज्रि खान्थि - गाज्रि नेम खान्थि  
दोला- राजा-महाराजा, राणी, राजखुंग्रि, गोरा गाहाइ, हिन्जाव गोदानखौ  
रोगानो थाखाय बाहायनाय सात्रै सुबुंजों बानजाग्रा मोनसे आगजु, दला।

**सोंथि :**

1. क) बर'फोरखौ मानि बादि जाना दड' होनना फोरमायदों।  
ख) गार'फोरा सोरनि बिबुंसार आरो बिथोन बादियै खामानि मावनो हमदों ?  
ग) माबादि सानथाइया जायखि-जाया हारिखौ जौगानाय लामायाव आवगायलांहोयो ?  
घ) बर' हारिनि थाखाय जोबोर दुखु आरो लाजिथाव बाथ्राया मा ?  
ङ) बर' हारिया जौगानाय लामाखौ सिनायनो हायिनि गुबै जाहोना मा ?  
च) मानि थाखाय बहुमनि खायफा हारिया जौगानो हादों ?  
छ) गोबां सुबुंआ माब्ला सोलोंथाइखौ आबुं जायो होनना सानो ?  
ज) समाजखौ थियै लाखिनो थाखाय मानि गोनांथि दड' ?  
झ) बर' आइजोफोरनि गेजेराव मानि थाखाय दाबो सतीनि सान्थाइया सोमजियाखै ?  
ञ) टिपकाइयाव गायसननाय फरायसालिया मामोन ?
2. बर' हारिया जौगानो हायिनि जाहोनफोरखौ बिदिन्थिजों फोरमाय।
3. “बर' हारिखौ जौगाहोने थाखाय सोलोंथाइया जोबोर गोनां” — बे बाथ्राखौ फरानि हेफाजाबै सावरायना लिर।

4. जायखि जाया मोनफा हारिखौ जौगाहोनोब्ला दोहोननि गोनांथिया माबादि ? फरानि हेफाजाबैसावरायना लिर ।
5. बेखेवना लिर :
  - क) “दिने भारतनि गासै हारिया खामानि मावनायनि जाहोनाव जौगानाय लामायाव दावखोलांनो हमदोंसै ।”
  - ख) “जोबोर दुखु आरो लाजिथाव बाथ्रा दि जौनि बर’ हारिया दाबो जौगानायनि लामा सिनायना लानो हायाखै ।”
  - ग) “जौनि हारिनि गेजेराव सोलोंथाइ गोसारैनि थाखाय हारिनि जौगानाय जाफुडखै ।”
  - घ) “दोहोननि मोजां बाहायथिनो रोडैनि थाखाय जौनि हारिया दाबो मोजाडै जौगानाय लामायाव दावखोनो हायाखै ।”
  - ङ) “बर’ हारिया जौगायिनि गुबुन मोनसे गाहाइ जाहोना जादों जौनि बाहायनाय ।”
  - च) “खिरफिनखौ दोहोन गयि (जौगायि) होनना बुंब्लाबो नंखाय बुंनाय जाया ।”

#### फरा गियान :

बुहुमनि जौगानो हायि हारिफोरनि मादाव बर’ हारियाबो मोनसे। खौसेथि सानथाइ, सोलोंथाइनि आंखाल, दोहोन बाहायनो रोडै, जौनि बाहायनाय बायदिफोरानो बर’ हारिया जौगानो हायैनि गुबै जाहोन होनना बुंजायो। आइजो-सोलोंथाइयावबो बर’फोरा जोबोर उन जानानै दड’। जायनि जाहोनाव गावनि फिसा-फिसौफोरखौ मोजां गियान होनायाव फेलें जानो गोनां जादों। बर’ हारि जौगानायनि थाखाय गोनांथि जानाय गासै बोसोन्थियारि बाथ्राखौ बे रायथाइनिफ्राय मिथिनाय जायो।

#### फोरोंगिरिनिस्मि :

बर’ हारिया जौगानो हायिनि जाहोनफोरखौ गोलेँयै मिथिनो हानाय बादि फोरोंगिरिया फरायसाफोरनो बिदिन्थिजों फोरोंनांगोन। नांगौ बादिदै जौगानाय, जौगाफुनाय आरो जौगायै हारिफोरनि आखुथाइफोरखौ रुजुथाइयारि आदबै बिदिन्थि होना फोरमायनांगोन। बेनि लोगोसे गावनि सुबुरन आरो फरायसाफोरखौ बेनि बागै साखा-फारा जानो थाखाय थुलुंगा होनाया मोजां। सोलोंथाइनि सोरांआ बर’ हारिनि गासै सुबुंफोरनि गोसो-मेगनखौ माबादि गेवहोनो हायो, बेनि सोमोन्दै फोरमायथिनाया गोनां।

## बैसागु आरो बर’ माहारि

लक्षेश्वर ब्रह्म

#### फराखौ सायख’ नायनि थांखि :

बैसागुआ बर’फोरनि गाहाइ रंजानाय फोरबो। बैसागु रंजानाय-फालिनायनि गेजेरजों हारिमुनि सोमखोर सावगारि बेरखाडो।

नाथाय आथिखाल मुगायाव गोदान जोलैया बैसागु रंजानो बावलांबाय। हारिमुखौ बावगार लांनो हमबाय। गोदान जोलैया माहारिनि सोमोन्दै मोजाडै मिथिनायनि थांखियै बे रायथाइखौ होनाय जादों।

#### लिरगिरिनि सिनायथि :

सानजारां लक्षेश्वर ब्रह्मआ 1941 मायथाइनि 1 मे खालि बिजनी ओनसोलनि पानबारि बाथ’फारा गामियाव जोनोम मोनो। बिनि बिफानि मुडल दामसु ब्रह्म आरो बिमानि मुडल हाम्फे ब्रह्ममोन। गामिनि गुदि फरायसालियाव सोलोंथाइ लाजेनानाँ गुवाहाटी मुलुग सोलोंसालिनिफ्राय जारिमिन आयदायाव एम. ए. आनजाद उथ्रियो। गुवाहाटीयाव रेलवे बिफानाव साखि मावजेनानाँ उनाव बिजनी कलेजनि गायसन गिरि बिबुंगिरि महरै जिउ खानो हमदोंमोन। गुवाहाटीयाव साखि मावनाय समाव ‘सिफु’ मुनि लाइसि सुजुदोंमोन। 1978-80 मायथाइयाव बियो बर’ थुनलाइ आफादनि आफादगिरिबो जादोंमोन। बिनि ‘बैसागु आरो हारिमु’ (1993)आ गांसे मख’जाथाव बिजाब।

#### गुबै फरा :

बैसागुआ बर’ हारिनि मोनसे गेदेर रंजानाय (उत्सब)। मिथिंगा सिबियारि बर’फ्रा गोसो मोदोम-जिउ होनाँ मोजां मोनो। बे रंजानाया बर’ हारिमुनि फैलाउ दिहिनि हासारगोनां हायाव रज’फैनाय बहा मोदोमफ्रु हाइना गोनां बारसे फामि बिबार। हाजो हायेनाव थानाय बर’ हारिफ्रा आरो बर’ फोलेरआ बे रंजानायखौ अरायबो खुंबोगासिनो दं गावनि हारिनि आंगो होनानाँ। बैसागुआ बेखायनो बर’ हारिनि आमय थख्ल’— बिखानि खावसे।

गोदो-गोदाय बर'फोरा हारिनि गोनां बे रंजालि बैसागुखौ दानसेहालागै खुडोमोन होननानै खोनायो। नाथाय बोथोरा थाडो हालो दैलो, समआ थाडो खोन्दो खोन्दो। सम थांनायनि लोगो लोगो मिथिंगानि महराबो द्दलाम गुरस्लायबाय। लोगोसे बोथोराबो गुरस्लायबाय। गोदो दानसेहालागै खुडोमोनब्लाबो दा सान स्निहालागैल' खुंनाय नुयो। सिगां मोसौनि, साननैयाव मानसिनि, सानथामाव सैमानि, सानब्रैआव अमानि, सानबायाव दाउनि, सानद'आव हांसो-फारौ आरो गुबुन दाउमा-अमाफोरनि, सान स्निआव खुरमा, बाय-बाहागिफोरखौ लोगो हमनायनि।

बर'आ हालेवनानै जाग्रा हारि गोदो-गोदायनिफ्रायनो बर'आ मोसौखौ माइनाव महरै सानबोदोंमोन। मोसौ नडाब्ला हालेवना जानो राहा गैया। जायनि न'आव मोसौ गैया, बिनि न'आव माइनावबो गैया होननानै सानो। मोसौजों हालेवनानैसो माइ गायनो हायो। बेनिखायनो हालेवनानै जाया बर' हारिनि गेजेराव मोसौआ गोथार। बेखायनो मोसौनि गाहामनि थाखाय आनान ग'साइनियाव आर 'ज गाबनानै बैसागुआव बर'फोरा सिगां-सिगां मोसौखौ थुखैग्रोयो। मोसौ थुखैनाय समाव बर'फोरा दाउज्ला दाउ गिसिरबानो सिखारो आरो दुगैसाडो। सोरां जासे उन्दुब्ला थाप्ला जायो होननानै बर'फोरा फोथायो। दैमा दैसायाव थुखैनो लांनायनि सिगाडावनो माफ्रोमबो मोसौनि गं आसुगुरखौ थाव गोथां (गुबैजों) नानानै होयो। बेनि उनाव खेंह'नि हांगार नडाब्ला ओंखाम दोनि हांगारखौ थालिर बिलाइयाव सैहना बहननानै थावजों लागायनानै लानाय जायो। बेखौ इन्दि थाराखौ सथाम सथाम खालामनानै ज' खाजाबना मोसौनि गासैबो मोदोमावनो फाखा-सिखा दागो होजोबनाय जायो। बेनिफ्राय लाव-फान्थाव आरो हाल्दै गोथांखौ साखा-साखा हानानै माखासेमानि लो बिदां सुनाय जायो औवानि थेवोलजों। सानसे सिगाडावनो नागेर नागेर बुथुमना दोननाय, दिगिलेवा, बाब्रिख'ब, गोरलै गोरलै गाली (राइदों) जिबौ, मोखोना बिबार, बारगोदान जारौजारौ खाश्रि बिबार माखासेखौ मोनफा मोनफा खनसायनानै बेसेबा मुथा खानानै गंफ्रोमबो ननि उखुम बेसानि खनायावनो लो दांफा मुथाफा थुनाय जायो। इसानसालि गलि लांगोनायावबो बिब्दिनो थुनाय जायो। बेनिफ्राय सान्द्रि एबा दनायाव लाव-फान्थाव हाल्दै हाफ्लेना लानानै (खायसे खायसे) आरखारै आरो सबाइ एवनानैबो लादेरो। आरो

मोखोना एबा थाराइ गाज्लिनि लावथि लानानै गलिनिफ्राय हगारनानै दैमा एबा दैसायाव लाडो। मोसौफोरखौ होलांनायाव हाफ्लेखाना लानाय लाव फान्थाव, हाल्दै आरो आरखारैखौ मोसौफोरनियाव सारस्रि सारस्रि दिगिलेवा एबा थाराइ गाज्लि एबा मोखोनानि लावथिजों बुयै बुयै मेथाइ खनो—

लाव जा फान्थाव जा  
बोसोर बोसोर एर हान्जा हान्जा।  
बिमानि खिथेर बिफानि खिथेर,  
नोंसोर जागोन हालुवा गेदेर।  
बिमा गायदे बादि दाजा,  
बिफा बलद बादि जा।  
बारि ख'नायाव दं एम्बु बंगोला,  
बिब्दि जा गिदिर जांगिला।

दिघलति मोसौनि मुलि,  
दुदालि जागोन गाइ खुखिलि,  
दिघलति लावथि, खि खि गान्थि,  
जोंनि मोसौआ जागोन बलद जाति।  
जानाय नडा गायदे-थेफ्रा,  
मारखा जागोन फालोनि बेह्रा।

गाव-गावनि नखरनि मोसौफोरखौ बिब्दिनो गामिनि सेंग्रा, सेंग्रासा आरो मोसौ लावखारफ्रा रंजा बाजा दैयाव थुखैहैयो। बर'आ फोथायोदि बैसागु मोसौ थुखैनायाव दिगिलेवाजों बुयोब्लानो मोसौनि सानाय-सुनाय, बात बेराम, दुमाल जानायफोरा खारो।

मोसौ थुखैखालि गामिनि राइजो-राजाफ्रा लोमजानाय-साजानाय बेराम, गुबुन गामिनिफ्राय मागिनो फैनायफोरजों फैफानायफोरखौ एबा गोदान बोसोरआव लोमजानाय-साजानाय बेरामफ्रा जाहाथे फैया बेफोरखौ दानगार हरनो थाखाय “लामा दानथेनाय” हुयो। गामिनि गेजेरजों सिंखावलांनाय एबा सेरजों थांनाय गामिनि गाहाइ लामायाव (गामिनि सेराव) बे लामा दानथेनाय हुनायखौ होयो। अजाया अजा रायो, मोदाइ-दाउदाय आरो बाथौ बोराइखौ हांखायहरनानै—

“नाहा मैहा थांब्ला इनाय खालामनो मोननाय नडा होननाय। बेनिफ्राय दैयाव (दैमा एबा दैसा) दिंग्रा मोनथाम खालामनानै मोननै गेदेर दिंग्रायाव दाउसा माफा फारेव माफा आरो मोनसेयाव खालि फारेवल’-गासैबो गोथांयै गोमोनै जाग्रानो गोमोन गोमोन थालिर होनानै मोदाइफोरनो बाउहरनाय जायो।

बिब्दिनो गोजाम मायथाइखौ हगारहरनानै गोदान मायथाइखौ हांखायनो थाखाय गलिनिफ्राय इसिं खनाहालागै फोथारस्राडो। बोराइ-बेन्थ हिन्जावसा-हौवासा, हौवा-हिन्जाव गासैनोबो गोदान सि-जोम सिगांनाय जायो। गामिनि रंजालि सिख्लाफोरा गोमो गोथां बाथगां बायदि मैया गाबनि, बायदि मैया आगरनि दानाय फाम्ना लानानै ज’ जथुमलाय हैयो गाव-गावनि मेगन खेबनाय जिउनि जोहोलावनो बैसागुनि आगर फालि हरनो नाजायो।

बेनि अनगायै बैसागुनि सेथि (सिगां) साना मानसि बैसागु। फुंआव दुगैसां-लोबसां गोथार बाथौ महाराजाखौ सिबिग्रोनाय जायो। बेनि उनाव थैलांनाय न’खरनि फोलेरफोरखौ गोसोखांनानै मायथाइयाव मावै-दाडै मोननाय बेसादफोरजों जाहोनाय-लोंहोनाय जायो। बावयैसो थैलांनायफोरनो ना-बेदर एवनानै बाउनाय जायो। गोथैफोरनि मुं लिंनानै (गाबजि) बाउओ— “फिसा-फिसौ नाहा-मैहा थांब्ला अरायबो इनाय खालामनो मोननाय नडा” होननानै। आइलां आग्रां, खैला खाजि, मुसा राजा, बिसहरि गासैनोबो बोथोरा गाहामै थांथों होननानै बाउनाय जायो। दाउ बेदरजों खुंखा गोखाखौ ओजोंहाय न’सिडव संनानै न’आव थानाय आरो नुजाफैनाय मानसिफोरनो एफा एफा जाहोनाय जायो। गामिनि बोराइ बेन्थफोरखौ साननो थाखायबो बे इसे नागारनाय जायो।

रंजालि बैसागुआव जुलि-गोदानफोरा फिसाइखौ लानानै बिमा-बिफानि न’आव आलासि जाहैनाया जोंनि गोदो-गोदायनि खान्थि। बिजामादैयाबो गावखौ गुबै बिजामादै महरै दिन्थिनो नाजायो। गामिनि बोराइ-बुरैफोरा बिब्दिनो न’-न’ गिदिंनानै बेदर खुंखाजों संनाय ओंखैजों जौ लोडो। बैखालिनि बेलासे समनिफ्रायनो खायसे खायसे मोसाग्लांबायो। बोराइया-बोराइ, बुरैफोरा बुरै, सेंग्रा सिख्ला गावबा गाव हान्जा हान्जा जालायनानै ज’-ज’ मागिलायो।

बेनि अखानायैनो सैमानि बैसागु। बैसागु बहर। जोहोलाव सेंग्राफोरा खाम-सिफुं, जथा, बिडि, थरखा आरो सिख्लाफोरा गंगोना, जाबखिं लानानै बैसागुनि बायदिमैया मेथाइ खननानै ज’-ज’ ओंखारो।

बिब्दिनो बर’फोरा सिगां मोसौनि, बेनिफ्राय मानसिनि, अमानि, दाउनि आरो गुबुन दाउमा अमाफोरनि बेनिफ्राय बाइ-बाहागि खुरमाफोरजों नुजालायनाय, सानलायनाय हलायनाय बैसागु खुडो। बिब्दिनो गुबुन गुबुन मुनि महरै बैसागुखौ खुंनाय जायो। सान स्निआव बैसागुखौ फोजोबनाय जायो। रंजालि बैसागुआ जोबो सान स्नियाव बर’फोरा स्नि तिथि थामहिनबा गोखा गोखै, गोबाब, बाइदिमैया रोखोमनि मैगं खानानै संजायो। बेफोर जादों— खेरादाफिनि (माथि गालदाब), (2) बेसर दाबा (सेरा), (3) थाराइ गाज्जि, (4) रायदों बिजौ, (5) लाफा साइख’, (6) खार’ खान्दाइ बिजौ (दिंदिडा), (7) बुरै थखन, (8) माइसुन्दि, (9) सिबु थारा, (10) दौस्रेम, (11) दिंखिया, बेफोर मैगंनि गेजेरनिफ्राय रोखोम स्नि खानानै संजानांगौ।

स्नि मैगंखौ मानो जायो? बेनि जाहोना जादों मायथाइयाव जाथे बेराम जाया बेनि थाखायनो बेफोर मैगंखौ संना जायो।

जायगा लानानै बर’फोरा गुबुन गुबुन आखुयै बैसागु जानायखौ नुयो। कामरूप जिल्लायाव दमासिनि बेलासेनिफ्रायनो साफ्रोमबो बर’आ बाथौ आरो गुबुन मोदाइ दाउदायनि मुडै बाउनानै सिबियो आरो फोलेरनि थैना थांनायफोरनि मुडै गोथारै बाउयो। गोजामखौ नागारनानै गोदान बोसोरखौ गाहामै मोननो हास्थायो। बेनि उनावनो गामिनि बोराइ-बेन्थ गासैबो दौरिनि न’आव ज’ जायो। बेवहायनो जयै थांनाय बोसोरखौ बिदाय होनानै गोदान बोसोरखौ मोजाडै मोननो अबंलाउरि आनान ग’साइनियाव बोर बिना लायो। गोदान बोसोराव अननानै-बिनानै ग्रोम ग्रोम राइजो मोनजानो थाखाय आर’ज गाबनाय जायो। दौरिया ओजोंहाय न’मा न’निफ्राय दरखं मोखांसिम साद्रि बनानै बैसागु जाग्राफोरनो दान होनो थाखाय दनसे माइरं, हाजासे रां-खाउरि बाउनानै दोनो। खाम, सिफुं-जथा, थरखा, दामै मोसायै गेजेरनि सासे मानसिया बिखौ ग्रोब दिखानानै लायो। बिब्दिनो दसे मोसाग्लांनानै बाथौखौ खनबा गिदिंनानै हानाय मानि न’नि मानसिखौ बोर सारसिनानै होयो। बेनिफ्राय दान होनायखौ नाजावो। ननि बिगोमायाबो हान्थु खेरायनानै बोर सारसिनायखौ नाजावो। न’नि बिगोमाया नाथाय गावनि आखाइजों दानखौ होआ। हान्जानि सासेया बेखौ दैखानानै लायनांगौ। दौरिनि दान होनायनि उनावसो बोराइया-बोराइ, सेंग्राया-सेंग्रा, सिख्लाया-सिख्लानि हान्जा जानानै गामिनि न’खरफ्रोमनिफ्राय दान लायै लायै फैंयो। बिब्दिनो बैसागुआ सान स्निहालागै सोलियो। कामरूपाव बैसागु दानाव “बरमानि थान” फुजा खालामनाय नुयो।

हादरनि खैदां खैफोद, लोमजानाय-साजानाय, गात्रि मोदाइनिफ्राय बार'गनो थाखाय आरो लोगोसे रांखाउरि, मानसि-दुमसि आरो फिसा-फिसौनि थाखाय हांखायनानै बैसागु दानाव बायदि बायदि मोन्थोर आरो गुबुन गुबुन आसार-खान्थिजों बरमानि थान फुजाखौ जयै एबा हारसिंयै होनाय जायो।

बैसागुनि सान स्न्याव बयबो ग'साइ थानाय (गारजासालियाव) ज' जायो आरो बेयावहाय फुथलि हाबा होयो। फुथलि हाबाया जादों सिब्राइ-सिबुरै एबा रावना-रावनिजों गोदान हाबा होनाय आरो बिसोरनि थांखियै बाउनाय-रायनाय। बर'फोरा फोथायोदि सिब्राइ-सिबुरै बोर सारसिनायावसो बे बहुमाव बार दै जायो आरो बेनि थाखायसो बहुमआव माइ-दै नाजों बुंफबो। बहुमाव जेन अरायबो नाजों मैजों ग्रोम ग्रोम रोहो-रोहो जानानै थायो बेनि थाखायनो आर'ज गाबनाय जायो। बर'फोरा फोथायोदि बे सिबिनायाव खुसि जानानै सिब्राइ-सिबुरैया बार-दै-अखानि महरै 'बारदै-सिख्ला'खौ लोगोफोरजों बे बहुमाव थिनहरो आरो बेनि जाउनावनो बे बहुमाव गोदानै फिथाइ-सामथाइयै मिथिंगाया गोथां गाबनि महर-मुस्री लाफिनो। बारदै-सिख्ला फैब्ला सि दाग्रा गनसा-गनसि सिथ्लायवा दिहुननानै हरनाया बर'फोरनि खान्थि। मानोना सिमब्रि सिमब्रा आइलि-जाइलि खानाइजों बैसोनि गोदौखानाय महर मुस्रियै फैनानै बारदै-सिख्लाया खुसि जालाडो होननानै बर'फोरा फोथायो। सिब्राइ-सिबुरैया अनोबोला फिसा-फिसौ जाजारोडिफ्राबो फिसा-फिसौ मोनो होननानै बर'फोरा फोथायो। रावना रावनि एबा फुथलि हाबा होनानै सान स्न्याव स्नि बैसागु खुंनानै रंजा-बाजा जायै लोडै बोथोरनि बैसागुखौ फोजोबनाय जायो।

बर'फोरा फोथायोदि सिगां दानाव एबा सिगां सानाव (मानसि बैसागुआव) नांलायनो खमलायनो मोना। नांलाय खमलायोब्ला बोसोरनि अराय सानावनो नांलाय-खमलायै थाडे होननानै फोथायो। बेखायनो बे गोथार सानाव रावजोंबो नांलायनो-बोराबलायनो हामा।

बैसागुनि सानाव खमप्लाइयाव जनोबो हामा होननानै बर'फोरा फोथायो। मानोना बे सानाव खामप्लाइयाव जयोब्लानो बिमा-बिफानि खर'आव ज'नाय जायो।

बैसागुआव बोर लानाय नेमा एरै : बाथौ गुदियाव आरो जायहा बाथौसालि गैया बिसोरहा सिथ्लानि सानजा सेराव जायगा दाबसे लानानै लिरना लानांगौ।

थालिर बिलाइ गांसे बनानै जरासे जेवारि फोनांनानै ज'रासे थुलुन्सि बिलाइ आरो गय फाथै जरासे होयो। ल'थासे दैयाव थुलुन्सि दालाइसे, दुब्रि हाग्रा, स'नानि, आस्थाम होनानै गोथार खालामना लायो। थालिर बिलाइयाव माइरं इसे होनानै सिब्राइ आरो आइ कामाख्यानो माइसा होनाय जायो। बेनिफ्राय बैसागु जाग्राफ्रा सिब्राइ आरो कामाख्यानिफ्राय ज'यै आर'ज गाबनानै उनाव बयबो देरहानाय रिसारहोयो।

थालिर बिलाइयाव दोननाय माइरंखौ फिसा गैजारोडि बिमा-बिफाफोरनो आरो जिउ गोलाउ बिनायफोरनो बोर होनानै जाहोनाय जायो। बेनि उनाव जेवारिखौ बोखारनानै थालिर बिलाइखौ थप्ला जुनानै बिसोरखौ खेब स्नि गिदिनानै बिसोरनि आफादफोरखौ जोबस्रानाय हास्थायनानै गोजानाव गारहरो।

#### सोदोबथि :

हालो-दैलो - लासै लासै  
गाइ खुखिलि - जारें गाबनि गाइ  
दौरि - पुर'हित  
बार दै सिख्ला - बार दैन मोदाइ  
सिमब्रि-सिमब्रा- साफ्रे सुफ्रे

#### सोंथि :

1. बैसागुआ मानो "बर' हारिनि आमाय थख्ल' बिखानि खावसे" होनना लिंगिरिया बुंदों ?
2. आथिखालाव बैसागुखौ सानबेसे खुडो ? माबोरै खुडो ?
3. जायनि न'आव मोसौ गैया बिनि न'आव मा गैया होननानै सानो ?
4. मोसौ थुखैनायाव बर'फोरा मा मेथाइ खनो ?
5. बैसागु रंजानायाव दामनाय-देनाय आगजुनि मुं लिर।
6. बर'फोरा बैसागुनि स्नि सानाव मा मा मैगं खानानै जायो ?
7. स्नि मैगंखौ बर'फोरा मानो जायो ?

8. 'बरमानि थान' फुजाखौ मानो होयो ?
9. बार-दै-सिख्लाखौ लाना बर'फोरनि गेजेराव मा फोथायनाय दं ?
10. फुथलि हाबाया मा ?
11. बैसागु बोथोराव बर'फोरा मा बादि बोर लायो ?
12. 'लामा दानथेनाय' हुनाया मा ?

### फरानि गियान :

गोदो गोदायनिफ्रायनो बरफोरा बैसागु खुंबोदों। बोथोर सोलायनायजों बर' माहारिनि गेजेराव सफैयो रंजालि बैसागु। रंजालि बैसागुआ गाजा गोमजायै बर' माहारिजों खुंजाबौदों। बैसागु फालिनायनि गेजेरजों बर' माहारिनि मावनाय दांनाय, साननाय-हनाय, मोसानाय-मुसुरनाय मोन्दांथि गासैबो बेरखाडो।

### फोरोंगिरिनिसिम :

फोरोंगिरिफोरा आथिखालनि बैसागुनि सोमोन्दै सावरायनांगोन। लोगोसे आसामनि गुबुन माहारिया फालिनाय बैसागु फोरबोनि सोमोन्दै फरायसाफोरनो मिथि होनांगोन।

## बर'फोरनि गोदोनि खेला

चाणक्य ब्रह्म

### फराखौ सायख'नायनि थांखि :

बर'फोरा गोजाम हारि। बिसोरहा गावनिनो गोजाम हारिमु आरो सोदोमसि दं। बेबादियाव बिसोरहा माखासे आंगो गेलेनायबो दं। बर'फोरनि गेजेराव गिला गेलेनाया मोनसे गोजाम गेलेनाय। बे गेलेनायनि सोमोन्दै बर' सल'बाथा फोरावबो दं। दानि बर'फोरनि गोदान जोलैफोराबो गावसोरनि आंगो गेलेनायनि सोमोन्दै मिथिनांगौ। बेनिखायनो बे रायथाइखौ सायख'नाय जादों।

### लिरगिरिनि सिनायथि :

चाणक्य ब्रह्मआ 1949 मायथाइयाव क'कराझार जिलानि छट' आदाबारि गामियाव जोनोम जायो। बिफानि मुडा धनसिं ब्रह्म आरो बिमानि मुडा सकुसि ब्रह्म। बाथाबारि गुदि फरायसालियाव फरायजेनानै उनाव क'कराझार गभरमेन्ट हायार सेकेण्डारी स्कुलनिफ्राय मेट्रिक आरो हायार सेकेण्डारिखौबो फास खालामो। बेनि उनाव बिथाडा क'कराझार कलेजनिफ्राय बि. ए. आरो गुवाहाटी मुलुग सोलोंसालिनिफ्राय एम. ए.खौबो फास खालामो। बिथाडा हारिमुआरि बिथिनि गोबां रायथाइफोर लिरना गुबुन गुबुन लाइसिफोरनि गेजेरजों फोसावबाय आरो बर' भाषा शिक्षा मुंनि बिजाबबो लिरबाय। बर' रावनि सावथुन दिहुननायावबो बिथानि गोबां बिहोमा दं। बिथाडा क'कराझार DIET नि गोरायुं जानानै आजिरा लायो।

### गुबै फरा :

जारिमिना हमस'हरनो हायि समनिफ्रायनो बर'फोरहा गावसोरनि जायगानि गावसोरनि आदबै दैबोनाय गोबां खेलाफोर दंमोन। बेफोरनि जारिमिन गैया होननानैनो बेफोर खेलानि जोनोम सम आरो बोरै जाबोखो मोनथिनो गोब्राब। सुबुंआ बयबो गोसोनि दुखु मेंनायखौ बावनानै गोदान दुंगानायजों



गावनि हाबायाव नांफिननो थुलुंगा मोननो आरो लोगोसे खहाब गोनां रंजानाय मोननो खेलाफोरखौ गेलेयो। मानसिनि सिडाव थानाय माखासे जोनोम आखु (सहजात प्रवृत्ति instinc) आरो आबेगफोरा गेलेनायजों सोमोन्दो थायो। रंजालुनाय (आनन्दब'ध) आबेग आरो दाथायनाय (संगठन प्रवृत्ति construction) गावखौ फसंथाइ (आत्मप्रतिष्ठा self assertion) बेफोर जोनोम आखुफोरा गेलेनायजों मैखोम सोमोन्दो थायो। दा गुवारै गेलेबोनो लानायखौसो गोथौयै साननो गोनां। बेखौ सानजायो दि बर'फोरा गावसोर समाज मोनसेयैनो राइजो जाबोनायाव बिसोरनि खेलाफोरनि आदबफोराबो रोखोमसेयै गोरोबबोदों आरो बेफोर आदबफोराबो बेनिखायनो गुबुन हारिफोरनिजों जुदा।

बर'फोरा गावसोरनि आदबै गोबां खेलाखौनो गेलेनो लाबोदोंमोन बेनि फोरमानखौ थांनाय थामजि ब्रैजि बोसोरसो सिगांनि गेलेनो लाबोनाय खेलाफोरखौ नायब्लानो रोखा मोनो। बेफोर गोबां खेलाफोरनि माखासेया गुबुन हारिनि खेलाफोरनि आदबजों द्दलाम गोरोबनायब्लाबो बांसिनानो गावसोरनिखामोन बेखौ नुयो।

गोदोनिफ्रायनो बर'फोरा गेलेबोनाय खेलाफोरनि मादाव आमै मै (न' सिडाव, हाग्रायाव), आमोल दिमोल एबा मारिव (दैन खेला), बिफांनि मारिव, हाखरनि मारिव, दहब, दाउया एबा दाउदै, सल गेलेनाय एबा लावथि सल गेलेनाय, गनसि जं गेलेनाय, थिया थिया (इनजुर एबा हा मोदोमनि) एबा हांखो बोनाय, बादुवा (आदुमब्रा बिलाइ जुनाय) गर, गेलेनाय, गिला गेलेनाय, मोखा खेला, खिखर, मंगलबाथा (मोसा-मोसौ, सियाल) बाथा (गेदेर-उन्दै), औवा हानथु, आसिनि-बिसिनि, दांना खारनाय, खै गेलेनाय, हाबै दुदु, मोदोम बोखांनाय, हेगगुर (मालजुज), बोरला गावनाय, राजा, मेगन फांथेनाय दारिया फाथा (रेडि) मैसो सौलायनाय (सिनस्लि हाग्रानि) माउजि, एनजर, आदि दिगा, मोस्रोम गेलेनाय (गारि खेला) बेफोरखौनो मख'थाव।

बेफोर खेलाफोरखौ माखासे बाहागोफोराव राननो हागौ (क) बोलो नाडै खारनाय गैयि-खिखर गेलेनाय, आसिनि-बिसिनि, आदि दिगा, मंगलबाथा।

(ख) खारनाय गोनां बोलो नाडै-थिया थिया, बादुवा राजा, खै-खै, दारियाफान्था, मावजि-एनजर, औवा हान्थु, मोखा खेला। (ग) बोलो गोनां खारनाय गैयि-जं बुखुनाय, सल, मैसो सौलायनाय, मोस्रोम खेला, मोदोम बोखांनाय। (घ) बोलो गोनां, आरो खारनाय गोनां-दहब, दाउदै, हाबै दु दु, हेगगुर, गिला (आसिनि बोलो)। खारनाय गोनां गोबां खेलायावनो दम नांनाय। हां बन्द खालामनायनि मादाव खै, हाबै दुदु, आमोल दिमोलनि खेलायानो मख'जाथाव।

बेफोर मख'नाय खेलाफोरनि मादाव खायसेया हिनजावसाफोरनि आरो खायसेया हौवासाफोरनि होनना बुंजायो। गर खानाय, आस्रम गेलेनाय बेफोर खेलाखौ बांसिन हिनजावफोरनि गेजेराव नुनो मोनो। बबेबाखौ हिनजाव आरो हौवाफोरनि गेजेराव गेलेनाय नुनो मोनो।

बर'फोरनि गेलेनाय गोदोनि खेलाफोराव खाथिखाला एबा नांजाबनाय गुबुन समाजनि खेलाफोरनि आदबफोरा हाबफैयाखै बेखौ बुंनो हाया।

बेबादिनो बर'फोरनि गेलेनाय गोदोनि खेलाफोरनि खायसे आदबफोरा गुबुन समाजनि खेलाफोरावबो हाबहैदों होनना सानजाथावो। गुबुन समाजनि बबेबा बबेबा खेलाफोरखौ बर'फोराबो गावसोर गोबाना लादों बेखौ साननायनि थावनि दं। बर'फोरा गोबारै गेलेनो लाबोनाय माखासे खेलाफोराबो बर'फोरजों सिथाबनाय एबा भारतनि गुबुन समाजनि सुबुंफोर गेलेनाय खेला आदबफोरजों गोरोबो। बाथा, दारियाफाथा, आस्रम बेफोर खेलाफोरखौ सोनाब आरो साहा भारताव गोबारै नुनो मोनबावो। खायफा खायफा खेलानि आदब नेमफोरखौ नायना बर'नि बेफोर गोदोनि खेलाफोरा चीन एबा मंगलिय फोलेरनिफ्राय फैनाय होनना फोथायनो हायो। (थांनाय 2-5-88 इं अक्ट 'खालि क'कराझाराव खिखर खेला बादायलायनाय बेखेवनाय महिनि महन ब्रह्मनि बुंथिनाय बर'फोरनि गर खाननाय, गिला गेलेनाय आरो बिदोर गेलेनाय गासैबो खेलायानो चीन हादरनिफ्राय फैनाय।)

थाजाबनाय खाथियाव थानाय मोनसे समाजनि गोहोमा गुबुन मोनसेजों गावजों गाव गोग्लैलायो। गोख्रों समाज, फाखनाव थानाय समाजनि गोहोमा गुरैसिन समाजनि सायाव बांसिन गोहोम खोख्लैनायखौ नुयो। जारिमिनाव दं

बर'फोरा मोनसे समाव गोखोंमोन बिसोर गोहो-बोलो हारिमुजों दावगानाय हारिमोन। बेनिखायनो औरैनो सानहरनो हायो बर'फ्रा गोदो थारैनो खेला हारिमुआवबो दावगानाय हारिमोन। बर'फोरनि खाथियाव एबा थाजाबनाय आह'म, खासिया, नागा, गंगार बायदि समाजनि खेला आरो खेलानि आदबफोरा बेनिजों बे एसे नडा एसे बारस्लायदों होनना सानजायो।

आह'म मुगानिफ्राय बेयो एसे रोखासिन दि आह'म राजानि खेलानि फारसे अनफावरि हाबा दिन्थिबोनायाव आह'म हादराव माखासे खेलाफोरा गोखों जायो। दानि शिबसागराव थानया रंघराव गेलेनाय मैसो सौलायनाय (महजुज), सिला खेबज्जायनाय (सेनजुज) आरो औरैनो सोलिबोनाय दाउदै सिफायनाय (कणीजज) दाउज्जा सौज्जाय होनाय बेफोरखौ बर'फोरा रोडि नडा मोन। आह'म मुगानि आसामाव गेलेनाय बेफोर खेलाफोरा बर'फोरनिमोन खोमा होनना गोबाडनो सानो। बेनि अनगायै आसामाव बर'फोरजों लोगोसे थानाय गुबुन समाजनि गेलेनायफोरनि खायसे आदबफोरजों द्लाम गोरोबनाय नुनो मोनो। बेनिफ्राय मोनथियो बर'थागिरि सुबुंनि खायसे गेलेनाय आदबफोरा थारैनो बैफोरनि समाजाव बारस्लाय हैदों।

खमज्जायनाय (मल्लजुज), बोरला गावनाय खेलाखौ गुवारै गेलेनायनि जेबो मख'नाय गैयाब्लाबो बेखौ बर'फोरा दि गेलेयोमोन बेखौ बुंनो हायो। साफ्रोमबो बर'आनो बोरला गावनो रोंगौ आरो खमज्जायनायाव गोरामोन। थालिर बिफांआव बोरला थिर हाबहोनाय, थिरजों फिथाइ फोनांनाय बादि बेफोर दंमोन। मारसियेल आर्ट हिसाबै मख'जाथाव जेबो गैयाब्लाबो दाहाल थुंग्रि सिबनायनि बादि जायोमोन होनना गोबां आगोलनि बर'फोरा बुंनायमोन।

खेलाफोरनि नेमफोरा गावसोरनि मोनसे समाजनि गेजेरावबो गोरोब जोबाब्लाबो गुबै आदबफोरा एखे। माबेबा माबेबा खेलाफोराव साननाय (Counting)नि राव, खन्थाइफोरा गोबांनियानो बारा थफाद नंलाया। बेनि अनगायैबो माबेबा खेलाफोरजों थानाय सल'बाथाफोराबो खायसेया गोरोब लायो आरो खायसेया गोरोबलाया। बेफोरबादि बै साननाय (Counting) राव, खन्थाइ, सल'बाथाफोरा बे समाजनि सिडव हाबना थानाय जिउनि गेदेर गोहोम बेरखांनाय।

गाहायाव माखासे गेलेनायनि साननाय राव, खन्थाइ मेथाइफोरखौ दिन्थिनाय जाबाय—

बाथा खेलायाव गर साननाय—

1. “एले थेले सावले जामखा बेल बाथा।”

— म'हिनी नार्जारी

2. “कदम तले सुखुर सायरे दिया फुल।”

— हेरम्ब नार्जारी

गर गेलेनाय (मेथाइ)— सोबनास सोबनास सोबनास फाथिजां। हालिव गालिवदों बान्दायदों। ज-जदै खैजोमा बिदै। उबसा-उबसा थेब गोसा।

आसिनि-बिसिनि— 1. आसिनि-बिसिनि दुब दुब रासिनि, नावबारि सिलाबारि गगनदे गगनदे-राजानि लावथि थालांबाय हाल सुसुंनि खाल ग'।

2. आसौ बिसौ गोमबिरि बिसौ सालदां मादां आव जादां नावबारि सिलाबारि अजानि लावथि थालांबाय सिरि साराय ग'।

आमोद-दिमोल— आमोल दिमोल गरायमोल दाउसा गोथै माहाजोन गगेरेखाथा गलदुम।

दाउखा-खेला— गा-गा, नै साबनो सै साबनो सै।

आदि दिगा — आदि दिगा माइ जलंगा सिफि सिफि हलंगा अल'ल'।

खेरखामुथि— खेरखामुथि खेरखानि दुमुनि बायदि दुमुनि साखथि बाहाय ग'।

दागदा गालि — दाग दागालि दाउसा निसालि।

सल'बाथाफोरनि मादाव गिला गेलेनायनि सल'बाथाया मख'जाथाव। बे खेलाया बर' समाजनि गेजेराव मोनसे गिदिर सामाजिक खेला एबा हारिनि खेलामोन बेवहाय बयबो खौसे। उनदिन्थि हिसाबै बेनि दोंसे सल'बाथा मख' जायो— गोदो गोदाय गिलासोन मुंनि सासे जोहोलाव दंमोन। बिजों गिला गेलेनायाव रावबो हायामोन। सानसेखालि गिला गेलेनायाव बिनि खाननाय गिलाया सातथाला हाजो बारनानै आसागि बैसागिनि सिथलायाव हि दाबाय थानाय समाव आसागिनि इसान सालिनि हि खुन्दुंखौ थबस्र' खालामहैजोबो। आसागिया सोरनि गिलाया आंनि खुन्दुंखौ बसफैजोबखो होनना

गिलाखौ गावनि दौबायाव थोरोब सोना दोनो। ओजों गिलास्रोना जेरै— गिला खारबोदों बेथिं थाडै थाडै सातथाला हाजो बारलांना आसागिनि सानसालियाव मोनहैयो। गिलास्रोना गावनि गिलाखौ मोनदों नामा होनना सोंसेयावबो आसागिया गिलाखौ लानानैसो दैसा सेराव खारलाडो। गिलास्रोनाबो होसो लांनायाव आसागिया दैसा सेराव मेथाइ खनै खनै रंजा रंजा बाज्ल' बाज्ल' मोसाबायो आरो बिजों माखासे सिख्लाफोर थांफाना मोसाहैयो। बेबादियैनो बेफोर जायगानि खेलाफोरा बर'फोरनि गावसोरनि समाजआव गोगोम गोहोम खोख्लैदोंमोन।

गेलेनायाव आखा-फाखा गावनि रोंसारनायाव देरगानानै लानायमोन समाजनि मानसिफोरानो बेबादि जायखि जाया खेलायाव रोंसिन मानसिखौ बाख्नायनायमोन।

खेला नायै खेला गेलेनायनि थावनिखौबो बानायनानै लानायमोन। हिन्जावफोरनि बांसिन खेलाफोरा उसुंख'ना एबा न' सिथ्लाफोरानो जानायमोन। गिला गेलेनायनि थाखाय सिथ्ला लामानि स्लिम जायगा। खिखरनि थाखाय बिफां सिंनि लांदां जायगा। बाथा दहबनि थाखाय लांदां फोथार। मोसौ लाउखारफोरा गावसोरनि नांगौमथे गेलेनाय थावनिखौ खालामनानै लानायमोन। बेबादिनो खेलानि थावनि आरो समफोरा समाजनि गावसोरनि मावना जानाय आरो मिथिंगाजों गोरोबनायजों सोलिबोदोंमोन। बुंनो थाडोब्ला बेफोर गोदोनि खेलाफोरनि गुबै थांखिया रंजानायनि गेजेरजों गावनि जिउखौ रेदे गोनां आरो गाहाम देहा लाखिनायनि थाखायनोमोन।

गोदोनि गेलेनायाव बादायलायनायनि गोसोफोरा एफाग्राब गोख्रों नडा मोन। बादायलायब्लाबो बान्था एबा जेबो रां आरो माबा मुनाफानि बाथ्रा गैयामोन। देरहानायनि देरगानायानो बिसोरनि देरगा गोनां जिउमोन।

मोनफा मोननै खेलाफोरनि बादै समाजा बेफोर खेलाफोरनिफ्राय दोरोदबोनायाव दा बैफोर गोदोनि बर'नि खेलाफोरखौ नुनो मोनलिया। बेनि गुदि जाहोना जाबाय सोनाबारि इंराजफोरनि साग्लोबनाय हारिमु। गुबुन हारिफोरनियाव साग्लोबनायजों लोगोसे बर'फोरनियावबो बिसोरनि साग्लोबनाया फैयो। मोनसे गेदेर रावआ बेनो जॉनि गोदोनि खेलाफोरा सोखो-मोखो नडा

एबा फोसाबनाय नडा। सोनाबारिनि बे खेलाफोरनि आदब नेमफोरा गाहाम अनसाय जानाय बादियै हाबफैनायाव आरो भारतनि गुबुन दावगानाय हारिफोरानो बैफोरखौ नाजावनायाव जॉनि समाजाबो गावनिखौ गारना बैफोरखौ नाजावो। दा नाजावनाय बल, क्रिकेट, बेडमिन्टन, दाबा, साइनिस सेखर बायदिफोरा बेनिनो जाहोन।

गोदोनि बर'फोरनि गेलेबोनाय खेलाफोरनि फारसे मोजाडै नोजोर होब्ला साननो हागोन बर'फोरा गोदोनि खेलाफाराव दोहोनिमोन।

### सोदोबथि :

आदबै - खायदायै, खान्थियै

दैबोनाय- लाबोनाय, सालायबोनाय

दुगानायजों- गोगानायजों

खहाबगोनां- खुसि मोननाय, थावनाय मोननाय

जोनोम आखु - जोनोमआवनो मोननाय आखु

आबेग - गोसोआव नांनाय

मैखोम - देरसिन-लाउसिन

जनजीबन - मानसि जिउ

मारिव - दैनि खेला

दहब - सिनि थफ्ला जुनानै खुबैहरनाय गेलानाय

दम - हां

फाख'नाव - गिदिंखनना थानाय

गोहोम - साग्लोबसारनाय

थागिरि - थाग्रा

मारसियेल आर्ट - दावहानि आदबजों गेलेनायनि आरिमु, जेरै केरेट, कुंफु

थफात - फाराग

सामाजिक - समाजारि

उनदिन्थि - दिन्थि महरै

रोंसारनाय - गियान

देरगा - देरहासार जा, गोगानाय  
 रेदे गोनां - उन्दै नाथाय गोरा, फिसायैनो गोरा  
 सोखो मोखो - रंगिना संगिना, गोजों, जोंब्लाउनाय  
 अनसायजानाय - नाजाव जानाय  
 बादि - बादायलायनाय

### सोंथि :

1. बर'फोरनि आंगो खेलाफोर आरो बैफोरनि जोनोम समनि सोमोन्दै मोनथिनाया मानो गोब्राब ?
2. सुबुंआ खेलाफोरखौ मानो गेलेयो ?
3. गेलेनायजों मानसिनि जोनोम आखुहा माबादि सोमोन्दो दं ?
4. गेलेनायफोरा समाज लायै लायै मानो जुदा जायो ?
5. बर'फोरनि गाव आदबजों गेलेनाय खेलाफोरनि मा फोरमान दं ?
6. बर'फोरनि गाव आदबजों गेलेनाय बर' खेलाफोरनि मुंफोरखौ लिर ।
7. बर'फोरनि आंगो खेलाफोरखौ मा मा बाहागोआव राननो हायो ?
8. हौवा आरो हिनजावफोरनि गेलेनाय बर' खेलाफोरखौ फाराग खालामना दिन्थि । हिनजावफोरनि गुबै खेलाफोरा मा मा ?
9. खेलाफोरा माबोरै गुबुन गुबुन समाजनि गेजेराव सोलाय-सोल' जानानै गोरुबलायो ?
10. बर'फोरनि मा मा खेलाया भारतनि खेलाफोरजों गोरुबो ?
11. बर'फोरनि मा मा गेलेनाया चीना मंगलियफोरनिफ्राय फैनाय होननानै बुंजायो ? म'हिनी महन ब्रह्मआ बेनि सोमोन्दै मा बुंदों ?
12. बर'फोरनि खेलानि गोहोमा गुबुन खाथि खाला समाजनि सायाव माबादियै गोहोम खोख्लैदों होनना बुंनो हायो लिर ।
13. बर'फोरनि गेलेनाया आह'मफोरनि समाजाव गोलैहैदों होनना मा मा फोरमान होनो हायो ?
14. बर' खेलानि साननाय राव आरो खन्थाइ मेथाइफोरनि बिदिन्थि हो ।

15. बर'फोरनि गेजेराव गिला गेलेनाय खान्थिया गोदोनिफ्रायनो दंमोन होनना लिरगिरिया मा सल'बाथानि दिन्थि होदों ? सुंद'यै लिर ।
16. गोदोनि बर'फोरनि खेला नायै खेलाफोर गेलेनाय आयदाफोरखौ माबादियै बाननायना एबा सायख'ना लादोंमोन माखासे बिदिन्थि हो ।
17. बर'फोरनि गोदोनि माखासे खेलाफोरखौ दा मानो नुनो मोनलिया होनना बुंदों ? बेनि गुबै जाहोनफोरा मा मा ?

### लिरसुंथाइ लिर :

आमै मै, आमोल-दिमोल एबा मारिव, बादुवा गेलेनाय, खर गेलेनाय, गिला साननाय, आसिनि-बिसिनि, हावै गुदु, आदि-दिगा, खिखर गेलेनाय ।

### फरा गियान :

फराखौ फरायनानै फरायसाफोराबो बर'फोरनि गोदोनि खेलानि सोमोन्दै माखासे गोदान गियान मोनगोन । बेनि अनगायैबो बर' हारिनि फारसे सानखानाय फैगोन । हारियारि सांग्रांथि फैयोब्लासो बर'फोरनि गोमालानो हमनाय रोंगौथि सम्पदफोरखौ बुरखांफिननो हागोन ।

### फोरोंगिरिनिमिसम :

फोरोंगिरिफोरा बे फराखौ फरायसाफोरनो फोरोंनायनि लोगो लोगो बिसोरखौ गोदोनि बेफोरबादि गोमालानो हमनाय गेलेनायफोरखौ हानायसिम बुरखांफिननानै सर' खालामनो दिथा होनो हायो । फरायसाफोरा गाव-गाव ओनसोलनि बोराइ बुरैफोरखौ गामियाव लोगो हमनानै बेबादि गेलेनायफोरनि मुं आरो आदबफोरखौ सोलोंनो आरो फोसावफिननो नाजानांगोन । अब्लासो बर' हारिनि गोदोनि हारिमुआरि सम्पदफोरा बांलांगोन आरो हारिनि थाखाय गोगानायनि जाहोन जागोन ।

## सुबुं माहारियाव खाना फोथायनाय

ब्रजेन्द्र कुमार ब्रह्म

### फराखौ सायख'नायनि थांखि :

खाना फोथायनाया समाज जौगानायाव हेंथा लाबोदों। खाना फोथायनायनि गोनोखोयारि थारथि गैया। नाथाय जोंनि समाजआ खाना फोथायनायनि खैसाराव गोगलैनानै गोबां मावनाडै हाबा मावनानै समाजखौ आबुथि गैयि खालामदों। दाइनानि मुंआव दाय गैयि सुबुं बुथार जानाया बेनिनो मोनसे बिदिन्थि। गोदान जोलैखौ गोनोखोआरि नोजोरजों दैबथिं लांनायनि थांखियै लोगोसे खानाफोथायनायनि गुमुरखौ मिथि होनानै बेनि सोमोन्दै सांग्रां खालामनायनि थांखियै बे रायथाइखौ सायख'नाय जादों।

### लिरगिरिनि सिनायथि :

मुंदांखा थुनलाइगिरि ब्रजेन्द्र कुमार ब्रह्मआ 1943 इं मायथाइयाव आथिखाल क'कराझार जिलानि सालानि बाथाबारि गामियाव जोनोम जादोंमोन। बिथांनि बिफानि मुडा रुंसारि दन्दाराम ब्रह्म आरो बिमानि मुंआ रुंसारि एन्दाब ब्रह्ममोन। ब्रजेन्द्र कुमार ब्रह्मआ गावनि जोनोम गामिनि सालानि बाथाबारि गुदि फरायसालियाव गुदि सोलोंथाइखौ लाजेनो। 1954 इं मायथाइयाव दतमा एम. इ. फरायसालियाव फरायनायखौ फोजोबना शक्ति आश्रम भकेसनेल गोजौ फरायसालियाव फरायो। बे फरायसालिनिफ्राय बिथांआ 1959 इं मायथाइयाव मेट्रिक आनजादखौ उथ्रिना क'कराझार कलेजाव आइ. ए. थाखोआव मुं थिसनो। नाथाय आइ. ए. कर्सखौ फरायजोबदोंमोनब्लाबो नखरनि बायदिसिना जेंनानि थाखाय जोबथा आनजादखौ होनो हायाखिसै। गोबां दुखु-दाहाजों बिथांआ 1962 मायथाइयाव मेघालय राइजोनि सिलंआव थाडो। सेन्ट एडमाण्ड कलेजनिफ्राय बिथांआ 1968 इं मायथाइयाव बि. ए.खौ उथ्रियो। उनाव 1970 इं मायथाइयाव बिथां ब्रह्मआ बनरगाव गोजौ फरायसालिनि गायसनगिरि गाहाइ फोरोंगिरि जायो। 2001 इं मायथाइनि जुलाइ दानाव बिथांआ गाहाइ फोरोंगिरिनि मासिनिफ्राय आजिरा मोनो।

बर' राव-थुनलाइनि बागै बिथांनि बिहोमाया गोबां। फरायसा समनिफ्रायनो लिरनायाव आखाइ हेजेननाय बिथां ब्रह्मखौ गुबैयै सासे मुंदांखा खन्थाइगिरि, रायथाइगिरि, सावरायगिरि, बिजिरगिरि महरै मुंख'जायो। बिथांनि थुनलाइ सोरजिफोरा जादों— अखां गंसे नांगौ (खन्थाइ बिजाब, 1975 इं), थुनलाइ आरो सानस्रि (रायथाइ बिजाब, 1986 इं), सानमोखाडारि बिबार जानानै (खन्थाइ बिजाब, 1995 इं), आं फैफिनगोन (खन्थाइ बिजाब, 1995 इं) रायथाइ माला (रायथाइ बिजाब, 1992 इं) नोजोर आरो सोरजि (रायथाइ बिजाब, 1995 इं), बिबारि गावदां (खन्थाइ बिजाब, 2008 इं)। बेफोरनि अनगायैबो ब्रजेन्द्र कुमार ब्रह्मआ गोबां सुंद' सल' लिरदों। बेफोर जादों— ईश्वरजों दान्दिसे, गोदान जोनोम, मोनसे मेलेमनि अबधिरा थैनाय, जेथो। मुंख'जाथावदि बिथां ब्रह्मआ 'अखां गंसे नांगौ' खन्थाइ बिजाबनि थाखाय 'समेश्वरी ब्रह्म' थुनलाइयारि बान्थाखौ 1994 इं मायथाइयाव आरो सानमोखाडारि बिबार जानानै खन्थाइ बिजाबनि थाखाय 1995 इं मायथाइयाव 'मुक्ता राम ब्रह्म' थुनलाइयारि बान्थाखौ मोनदोंमोन। बिथांआ दासिम थुनलाइ सोरजिनाय खमानियाव मुखुब जानानै दं।

ब्रजेन्द्र कुमार ब्रह्मआ फरायसा समनिफ्रायनो खन्थाइ लिरनायाव गोसो होदोंमोन। बेनि लोगोसे बिथांआ बर'नि बायदि आफादफोरजों सोमोन्दो लाखिनानै समाजनि हाबाबो मावबोनाय नुनो मोनो। सानसे समाव बिथांआ बर' थुनलाइ आफादनि लोगो गाहाइ नेहाथारि बिबान रुजुनानै 2002 इं मायथाइनिफ्राय 2008 इं मायथाइसिम आफादगिरि जादोंमोन। मुंखनो गोनां रायथाइ माला (रायथाइ बिजाब) मुंनि बिजाबनि थाखाय बिथांआ 2009 इं मायथाइयाव टेगर लिटेरेसार एवार्ड मोननो हादोंमोन। बिथांआ दासिम थुनलाइ सोरजिनि गोथार खामानियाव मुखुब जानानै दड'।

### गुबै फरा :

जाय फोथायनायाव मानिनानै लानो हाथाव बान एबा जुगथि गैया, बेनो खाना फोथायनाय। सुबुं माहारियाव गोदोनिफ्रायनो खाना फोथायनाया सोलिबोदों। गोदो, सुबुंआ जेब्ला अगियाननि खोमसियाव गोदोनानै दंमोन, थांनानै थानो थाखाय मिथिंगानि सायावनो फुरायै सोनारनो गोनांमोन, बै मुगानि बाथ्राखौथ' दोन,आथिखाल बिगियाना जौगानायनि थिखिनि मोननाय

समावबो सुबुं माहारियाव खाना फोथायनाया फुरायै जोबाखै। लेखा-फरा रोडै धोरोम हमथाबग्रा भारतनि बाथ्राखौ बुडाब्लाबो जागोन, रकेटजों अखांमा दावबायग्रा आमेरिकायावनो दाबो खाना फोथायनाय दं। माल्टिस्ट'रिड न'नि जिथाम थालायाव दाबो बे हादराव आनलकि (unlucky) होननानै 13 नम्बरखौ लिरनो गियो। आनजादाव रल नं 13 मोननानै फेल जाजानो गिनाय, दाननि 13 आगष्टआव हाबा मावनो आखाइयाव लानो गिनाय, बासाव 13 नं सिटआव टिकेटखौ लानो गिनाय बेबादि खाना फोथायनायनि गोबां बिदिन्थि होनो हायो।

सासे गथ'साया उदै साजानानै गाबबाय थादों। अजाया नायखानानै खिन्थाबाय, बिखौ मोदाइ अरदों, गथ'नि आखाइयाव दाउदै दैसे लाहोब्लानो दाउज्ला गोजा एबा गोसोम मासे होब्लानो मोदाइया नागारगोन। सोरनिबा उदैआव दमाद जादों, खेब खेब साबाय थायो। अजाया नायखानानै मिथिबाय—सोरबा दायना रायनानै जोलोन्दोर सोदों, मोन्थोरजों फिरायनांगौ। सोमो नांथाव सोरजिया। जुग जुग सुबुंआ बेफोरनिफ्रायनो सानलावरिनि जोबनो गैयि खराग मोनबोदों। बहुम-मिथिंगानि गुमुर बह्रा जाहोन जाथाइनिखुइबो सोमो नांथावसिन बे सानलावरिया ? बे सानलावरियाबो सुबुंनि खाना फोथायनायखौ फोथानानै लाखिनायाव हेफाजाब होबोदों जुग जुग। सुबुं माहारि बादि मोदाइ-दाउदायहाबो फिसा फिसौ थानाय, बबेबा दाबसे जायगानि मोदाइनो गावनि फिसाजोखौ बिलाय हरनाय, एबा बैनिफ्राय गावहा बिहामजो लाबोनाय, आलासि जालायनाय बे सोमो नांथाव सानलावरियाबो मोनसे मुजिनां फोथायनायसो।

जों जेसेखि जेरैखि नाया मानो, जोंनि माहारियाव दाबो खाना फोथायनाया गोनां जायगा लानानै दं। बिजिरगिरिफोरनि बादियैब्ला अबंलावरिनि गोहोनि सायाव फोथायनाय, मेगनजों जेब्लाबो नुफेरै मोदाइयारि गोहोनि फारसे गिनाय आरो फोरमान गैयै माखासे बाथ्रानि सायाव गोथौ फोथायनाय बेफोरनिफ्रायनो सुबुं माहारियाव खाना फोथायनाया सोमजियो। आरो बेखौ फोथानानै लाखिनायाव मदद खालामदों सुबुंनि धोरोमारि आसारखान्थि, धोरोमारि फोथायनाय, माहारियारि नेमखान्थि आरो एखुथिया बेसेन-मोनदांथिया।

धोरोमारि खाना फोथायनाया बहुमनि गासैबो हारि एबा माहारिनि गेजेरावनो दं। लेखा-फरा रोडै जाम्बा-जाम्बि सुबुंनि बाथ्राखौथ' दोन, लेखा

गोरों गोबां मानसियाबो बेनिफ्राय फुरायै बारग'नो हायाखै। नोजोर होनो गोनांदि बे धोरोमारि खाना फोथायनायानो सुबुंनि गेजेराव गावजों गाव फोथायैबो सोमजिहोदों आरो जाउनाव जुगथि आरो बिगियानारि गेजेरजों सैथोखौ नायग्रा माखासे गेदेमा मानसि आरो गेबें गोसोनि गोबां सुबुंफोरा बायदिसिना हाराहास्थि भुगिनांदों। हिन्दु मन्दिराव सुद्रफोर हाबब्ला सुवा जानाय खान्थिया भारतआरि माहारिनि मोनसे गानो रोडै गाराइ जानानै दं, बेनि थाखाय अगेन जाथाइ जानायनि नोजोर जारिमिनाव बुंफबनानै दं। अखाफोर गलर मन'नाय (चन्द्रग्रहण) समाव राहु मन'नायनिफ्राय अखाफोरखौ गहोनो हाजार हाजार मानसिफोरा गंगा दैमायाव दुगैनाय हुदा दड'। 'राम जन्मभूमि-बाबरि मसजिद'नि जाथाइया दाखालिसो जानाय जाथाइ। बेखौ लानानै हिन्दु, मुसलमाननि गेजेरावदि दानलाय-सुलाय जादोंमोन, बेयो भारतनि जारिमिनाव मोनसे गोसोम दागो जानानै थालांबाय।

बाइबेलनि जानो बादा होनाय फिथाइखौ (forbidden fruit) जानायनि जाउनाव इशोरजों साव होजानानै आदाम-इभआ सोरगोनिफ्राय बहुमाव फैनांनाय आरो गथ' सारिनायाव आइखां-बाइखां साजानायनि सावखौ हिन्जाव माहारिया दिनैसिमबो भुगिनांनाय बेफोर धोरोमआरि खाना फोथायनायनिफ्रायनो सोमजिनाय। धोरोमारि खाना फोथायनायनि थाखायनो बिगियाननि थार सिबियारि गेलिलिवा थैजासिम जोबथेसालियाव थानांनानै जिउ गारनांदोंमोन। बेनिखुइ सोमो नांथावसिन बाथ्राया जादों बिगियान जौगानायजों सोदोमसिनि थिखिनियाव मोननाय सुबुंनो गेलिलिवनि बाथ्राखौ सैथो होननानै सिमान जानो 360 बोसोर नांबाय। 1992 मायथाइनि 12 अक्ट'बरखालिसो भेटिकान नोगोराव बिगियानगिरि, धोरोमगुरु आरो नबेल बान्था मोननाय बिगियानगिरिफोरनि मोनसे जथुम्मायाव प'प जन प'लआ गेलिलिवनि आबिस्कारखौ सैथो होननानै बुंथियो। गुबुन रावै, सैथोखौ सिमान जायो।

धोरोमारि खाना फोथायनाया मानसिखौ बेसेबां अगेन हाबा मावहोनो हायो, बेनि मोननै बिदिन्थि होनो सानदों आं बाडाली हिन्जाव लिरगिरि मैत्रे यी देबीनि 'अचेना चीन' मुंनि बिजाबनिफ्राय तिब्बतनि सोमोनदै मोजां रोंग'थि गोनां नलिनाक्ष दत्तआ तिब्बतनिफ्राय फैफिननानै मोनसे मिथिडाव बुंदोंमोनदि— तिब्बतीफोरा माखासे मोजां मोजां धोरोमनि 'पाण्डुलिपि'

(manuscripts) खौ बिसिख्लाब बिसिख्लाब धोरोम फोथायसुला सोलोंसाफोरनो हरनानै मुलिबादि बाहायनो होयोमोन। एकाइ काबगुसि मुनि सासे जापानी स्रमणआ (योगी, Buddhist mendicant) गावनि 'तिब्बताव बोसोरथाम' मुनि बिजाबाव मुंख'दोंदि धोरोमगुरु गाहाइ दालाइ लामानि खिखौबो बरि खालामनानै लोमजानाय साजानाय एबा जबा मानसिफोरनो जाहोयोमोन।

थानाय बोसोर जिनि गेजेराव आं गोबां 'गोथार लाइजाम' मोनदोंमोन। गासैयावबो हरग्रानि मुं आरो थं गैया। गासैबो लाइजामनि थांखिया मोनसेयानो— इसोरनि मुंयै लाइजाम फोसावनांगौ। गिबि गांब्रै लाइजामफोराव बुंदों— तिरुपतिनि गंसे मन्दिराव मासे बिजौ फैनानै सासे बामोननि (बामुण) महर लायो आरो बुडोदि गावनि मुंयै गां 100 लाइजाम सान 7 नि गेजेराव साफायनानै फोसावनांगौ, बेखौ खालामाब्ला खैफोद जागोन। लाइजामाव फोरमानबो होदों— जाय लाइजाम फोसावदों बियो लटारीयाव लाख रां मोनदों एबा बिनि साखिया देरदों। जाय फोथायालाबा लाइजामखौ फोसावाखै, बियो गाव थैदों एबा फिसा थैजादों एबा साखिनिफ्राय होखारजादों। उननि गांसे लाइजामनि सिगांथाराव खनथाम आरो जोबथारनायाव खनथाम कुमारी मारियानि मुं लानाय दं। गां 24 लाइजाम लिरनानै फोसावाब्ला सान 20नि उनावनो फोरमान मोनगोन। मुस्त्री फुबेलाया लाइजामखौ मोननानै मिनिदोंमोन, बियो थैदों। थराइना अनिताया फोथायनानै लाइजामखौ फोसावनानै 5(बा) कौटि रां मोनदों। मुस्त्री हेमेन्द्र आरो उपेन्द्र बर'आ लाइजाम फोसावयैनि साखिनिफ्राय होखारजादों।

गोजौआव गांबा 'गोथार लाइजाम'नि सोमोन्दै दि बुंनाय जाबाय, बेखौ खायसे फोथायनोबो हागौ, खायसे फोथायाबो जानो हागौ। नाथाय गुबै साननो गोनां बाथ्राया जादों— गोथार गोथौ अननाय आरो निमाहानि सुदेम गुनजों जायनि गोसोआ अराय आबुं होननानै जुग जुग मिथिबोदों, बि इसोर आरो मारियाया फोथायाब्लाबो लटारीयाव लाख एबा कौटि रांनि नेहाद बोर सारस्रिबायग्रा आरो फोसावाब्लानोथैनायनि इनाय अगेन साव होबायग्रा माबोरै जानो हागौ? खाना फोथायनाय गोनां मानसिफोरासो बेबादि लाइजामखौ फोसावनो हायो।

माहारिनि गोबां आसार-खान्थियाव खाना फोथायनाय हाबनानै थायो। जारिमिन दांखा 'सतीदाह', 'गथ' सिथारनाय'— बेफोर खाना फोथायनायनि सायाजों साग्लोबजानायमोन। 'मनु' मुनि सासे मुनिया लिरलानाय 'मनु संहिता'याव सुद्रफोरखौ बाहायनायनि गोबां अगेन खान्थि एबा नेम दं। बेफोरनि मादाव मुंख'जाथावआ ओरै— (1) सासे बामोननि हायाव थानाय शुद्रफोरा बिनि सम्फथि, गाव जेराव थाडो बिसोरखौ लांफानो हायो, गावनि गोसोबादि बाहायनो हायो, जेबो अजद सोलिया। (2) सासे सुद्रखौ बुथारनाया मासे एनजरखौ बुथारनायनि समान। (3) लोगोसे जाफानो लोंफानो मोना, सुवा जायो। (4) गाहायथिं हान्थु बारहोनानै गामसा गाननो मोना। (5) फाफ्लियाव सि सारखोनानै बामोनजों रायज्जायनो मोना बायदि बायदि।

बे बादुवा खान्थिया भारतारि माहारिनि केन्सार बियाद। बेनो भारतनि मानसिखौ हारि-हारिसायाव रानदों, भारतनि खौसेखौ लोरबां खालामदों। बेफोरखौ नायब्ला मनुआ दि गेबें, गोगो आरो गुवार गोसोनि सानसुमैमोन, बेखौ फोथायनो गोब्राब मोनो। थारै सानसुमैमोनब्ला, बुंनांगोनसो दि सोलोंथाइ गैयै रांखान्थियाव लोरबां माखासे मानसिखौ नासयनानै सुसिनानै जानायनि अगेन मतलब बिनियाव दंमोन, आरो बेनिखायनो बेफोरबादि अगेन नेमखान्थिया बिनि गोसोआव जोनोम जानो हादोंमोन।

मेगन-बिलाइ मावब्ला खैदां-खैफोद एबा माबाफोर गाहाम जानायनि इसारा होयो, फेसा गाबब्ला निदान जायो, दालाइ गोथैयाव बानानै दाउखा गाबनाय नुब्ला 'यात्रानास्ति' जायो होननानै फोथायनाया सुबुं समाजनि गेजेराव गोदोनिफ्राय दासिम दं। सोरनोबा रां हरनो गोनां जाब्ला एबा सोरनिफ्रायबा लानो गोनां जाब्ला जोबथा अनजिमाया लाथिख' जानो हामा होननानै 10 नि जायगायाव 11, 20 नि जायगायाव 21, 100 नि जायगायाव 101 खालामनानै रां हरनाय एबा लानाय जों दाबो नुनो मोनो।

नुनो मोनोदि बहुमनि गासैबो हारिनि गेजेरावनो बायदिसिना खाना फोथायनाय दं। अदेबानि बांसिन सोलोंथाइ मोननाय हारिमुनिखुइ एसेल' सोलोंथाइ मोननाय हारिनि गेजेराव खाना फोथायनाया बांसिन जायगा लायो। खायसे खाना फोथायनाया सोमो नांथावबो आरो मिनिथावबो। रंसारि भबेन नार्जीआ गावनि

‘बर’-कसारीर समाज आरु संस्कृति’ मुंनि बिजाबाव बर’फोरनि मोनसे खाना फोथायनायनि बाश्चा बुंदों दि मोसौ मैसोनि मोदोमाव गाराइ जानानै एम्फौ नाडोब्ला सुदजाग्रा साबा मुसलमननि मुंखौ गांसे खाखोरआव लिरनानै औवानि हासुंआव सोनानै एमफौ नांजानाय जुनारनि गोदोनायाव गानहोयो। अब्ला एमफौआ खारनानै गाहाइया हामो होनना बिसोर फोथायो।

गथ’ थैजाबाय थानाय बिमाफोरा मोदाइ-दाउदायनि गाञ्जि नोजोर गोग्लैनायखाय गथ’आ थैयो होननानै फोथायो। बेनिफ्राय एरायनो थाखाय गुबुन हारिफोरबादि बर’फोराबो गथ’नो गाञ्जि मुं होयो। जैरै— गेसाव, सैमा, खाखेब, हाराव बायदि बायदि।

गथ’फोरा हारसिउनाया माबाफोर बेमार आजार एबा निदान जागोननि लैखोन होननानै बिमा बिफाया गियो। बेनिखायनो बेनिफ्राय बारग’नायनि राहा बादियै गथ’आ हारसिउब्ला बुडो— सुं था, अजा बोराइनियाव ज’ थां। ग्रीकफोरहाबो बे बादि फोथायनाय दड’। बेनि सोरबा हारसिउब्ला बिसोर बुडो— ‘Jupiter bless you’ बे मोनसे जाहोननि थाखायनो इंराजफोरा बुडो— ‘God bless.’।

बेफोरबादि गोबां खाना फोथायनाय हाबनानै दड’ सुबुं माहारियाव— खायसे दादा-मादायै, खायसे सिखावयै। आरो बेफोरबादि खाना फोथायनायनि खाबु लानानैनो राजखान्थियारिया राजखान्थि गेलेदों, थगायसुला धोरोमगुरु आरो सियान मानसिया गाव गावनि एखुथिया थांखिखौ सुफुंनो गोगो गेबें गोसोनि जाम्बा-जाम्बिखौ सुसिदों, खैफोदाव खोख्लैदों। बेनि गुदि जाहोना जादों थार सोलेंथाइ आंखाल। बिगियानो गोरोबनाय थार सोलेंथाइ होनो हाब्लासो सुबुंखौ जों खाना फोथायनायनिफ्राय उदां खालामनो हागोन आरो अब्लासो बिसोरखौ जौगानायनि सोरां लामाखौ सिनायगोन।

#### सोदोबथि :

हाराहास्थि - खुफुं

यात्रानास्ति - दावबायनाया फेलें जानाय

अबस्ये - नाथाय

सारिनाय - जोनोम होनाय

सानलावरि - सानब्लावरि

#### सोंथि :

1. खाना फोथायनाय माखौ बुडो ?
2. धोरोमारि खाना फोथायनाय माखौ बुडो ?
3. तिब्बताव थानाय खाना फोथायनायनि सोमोन्दै सोर सोर मख’दों ?
4. मनु संहितायाव सुद्रफोरखौ बाहायनायनि माबादि खान्थि दं ?
5. बादुवा खान्थिया मा ?
6. बर’ सुबुं समाजनि गेजेराव थानाय माखासे खानाफोथायनायनि सोमोन्दै लिर।
7. सोरनि गेजेराव खाना फोथायनाया बांसिन जायो ?
8. भबेन नार्जरीनि गावनि बिजाबाव बर’फोरनि मा खाना फोथायनायनि बाश्चा लिरदों ?
9. ग्रीकफोरा सोरबा हारसिउब्ला मा बुडो ?

#### फरा गियान :

जुक्ति गैयि फोथायनायानो खाना फोथायनाय। बुहुमनि गासै हारिनि गेजेरावनो खाना फोथायनाय दं। बिजिरगिरिफोरनि मोनदांनाय बादिब्ला ईश्वोरनि गोहोनि सायाव फोथायनायनिफ्रायनो खाना फोथायनाय सोमजिदों। आरो बेयो थांना थादों सुबुंनि धोरोमारि आसार खान्थि, फोथायनाय, सुबुंनि नेमखान्थिनि गेजेरजों। जायनि जाहोनाव गोबां अगेन हाबा मावजादों आरो गोबां खाबु लादों राजखान्थिगिरिफोरा, धोरोम गुरुफोरा आरो थगायसुला सियान मानसिफोरा।

खाना फोथायनायनि गुदि जाहोना जादों सोलेंथाइनि आंखाल। सोलेंथाइनि सोरांजोंसो खाना फोथायनायखौ फोजोबस्रानो हायो।

#### फोरोंगिरिनिस्मि :

खाना फोथायनायनि थाखाय बर’ माहारियाव माबादि खैफोद सफैदों बेनि सोमोन्दै सावराय नांगोन आरो फरायसाफोरखौ गोनोखोआरि नोजोरजों नायनो, जुक्तिजों सोलिनो थुलुंगा होनांगोन।



## जोहोलाव सम्बुधन फंल'

मन'रन्जन लाहारी

### फराखौ सायख'नायनि थांखि :

बे फरायाव हारिनि फारसे गोथार मोजां मोननाय सासे बर' जोहोलावनि जिउ जारिमिन हाबनानै दं। ब्रिटिसफोरा दुलाराय भारतनि लोगोसे आसाम आरो बर'फोरनि आंगो हादाब काछार राज्यखौ गावसोरनि सिडव गादबना लाखिदोंमोन आरो बे काछार हादाबनि दिमासा बर'फोरखौ रांखान्थि, हारिमु, धोरोम बायदि गुबुन गुबुन बिथिडव नारसेबना लाखिदोंमोन। बेनिखायनो भारत नाडैनो उदांसि सोमावसारनाय बिग्रायखांनायाव बर' जोहोलाव सम्बुधन फंल' (सोमदोन)आबो बेबादि बिग्रायखांनांमोन। बोलो गोहोगोरा ब्रिटिसफोरनि आखाइयाव जेननो गोनां जादोंमोनब्लाबो बिनि आखाइ गोजायै दावहा नांनो फेर फाथिनाय आखुआ बर' जोहोलावनि हादर बिमाखौ मोजां मोननायाव गोथार नेरसोनखौ अरायनि थाखाय जुगामि खालामना लाखिगोन। बर' जोहोलावनि बेबादि आखुनि नेरसोन दिन्थिनो थाखायनो बे फराखौ सायख'नाय जादों।

### लिरगिरिनि सिनायथि :

मुंदांखा थुनलाइगिरि गुबैयै बर' र'मान्ठिक खन्थाइनि सासे गोजौ सारिनि खन्थाइगिरि मन'रन्जन लाहारीया 1936 ईं मायथाइयाव ग'साइगाव महकुमानि सिडव थानाय बामुनखुरा गामियाव जोनोम मोनो। फरायसा समनिफ्रायनो बिथांआ थुनलाइ सोरजिनाय हाबायाव मुखुबै नांथाबदोंमोन। बिथानि गिबि थुनलाइ सोरर्जिया 1954-55 आव ओंखारनाय अखाफोर लाइसियाव फोसावजाजेनो।

गुवाहाटी मुलुग सोलोंसालिनिफ्राय इंराजी आयदायाव एम. ए. पास खालामनाय बिथां लाहारीया क'कराझार कलेजाव बिबुंगिरि हाबा मावजेननानै बेनि उनाव क'कराझार बि. एड. (बि. टि.) कलेजाव बिबुंगिरि आरो बेवहायनो गोरायुं जानानै आजिरा मोनो। गुवाहाटी मुलुग सोलोंसालि क'कराझार केम्पासाव बिथांआ बर' बिफाननि आलासि बिबुंगिरि महरैबो हाबा मावदोंमोन।

मन'रन्जन लाहारीनि थुनलाइ सोर्जिफोरा जादों— आनारि (थुन फावथाइ), खारलुं (सल'मा, 1976), माब्लाबा (खन्थाइ, 1977), सल' बिदां (सुंद' सल', 1978), हायना मुलि (सल'मा, 1985), सल'नि सल' (सुंद' सल', 1985), रेबेका (सल'मा, 1999) बर' थुनलाइनि जारिमिन (1990), नोजोर (सावरायनाय, 1992), बाजै (सुंद' सल', 1994), गावदां (सुंद' सल', 1996), अमनाथ सोमनाथ (खुगान्थाइयारि सल'मा, 1988), फावथिना सानथौ (2000), डन कुइकसट (रा:सो: 1982), थुनलाइ आरो गहेना (नैथि दिहुननाय, 2002), आलाइसि (सल'मा, 2003), दाइनि? (सल'मा, 2006) आरो जम (सल'मा, 2007)

जिउनां थुनलाइ सिबिनो मोजां मोनग्रा बिथां लाहारीया आसाम सरकारनिफ्राय 2004 मायथाइयाव बिष्णु प्रसाद राभा बान्था मोनो आरो 'दाइनि?' सल'मा बिजाबनि थाखाय 2009 ईं मायथाइयाव साहित्य अकाडेमी बान्था मोनो।

थुनलाइगिरि मन'रन्जन लाहारीया 2008 ईं मायथाइयाव रुंसारि जायो।

### गुबै फरा :

जारिमिनाव बर' हारिया अरायबो हेव खालामजाबोदों। दाबो हेव खालाम जागासिनो दं। भारतनि गुबुन गुबुन हारिफोरनियाव जेरै गिदिर गिदिर जोहोलाव उजिदोंमोन, बर' हारियावबो बिदिनो जोबोर गिदिर जोहोलाव उजिदोंमोन। गुबुन हारिफोरनि जोहोलावफ्रा जारिमिनआव मुंख्लं महरै बिसोरखौ थिसननानै बिसोरनि मुंखौ सनानि हांखोजों लिरना दोनबाय। बिसोरखौ बेसेन होबाय भारतनि National heroes महरै। भगद सिं, खुदिराम भौमिक, नेताजी सुभार चन्द्र बसु, कनकलता बरुवा आरो गोबां दावहारुफ्रा भारत उदांसिनि सोमावसारनायाव मुंख्लं जानानै थाबाय। बर हारिनिफ्रायबो बिसोरबादि जोहोलावफ्रा बर' हादरखौ ब्रिटिसनिफ्राय उदां खालामनो दावहा नांनायाव जिउ गोमादों। नाथाय, बिसोर हले भारत हादरमानि मुंख्लं होननानै गनायथि होजायाखिसै। बिसोर जेनबा बीर नडामोन, बिसोर जेनबा दावहा नांनानै जिउ गोमा जायाखैमोन। बिसोरहा भारत आरो आसामनि जारिमिनाव इसेबो जायगा मोनाखिसै। मानोना बिसोर बयजोंबो नेवसिजानाय, हेव गियान खालाम जानाय बर' हारियाव उजिदोंमोन। बेनिखायनो सम्बुधन (सोमदोन), जावलिया देवान बादि बर' जोहोलावफ्रा रावजोंबो गनायथि मोनाखै लोगोसे बर' राजाफोरनि बायखोन्दा नोगोर, राजथावनि, खरं आरो राज

प्रसाद महलफ्रा भारत सरकारनि जोथोन आरो दोनथुमनाय (protection and preservation) मोनाखिसै। मोनोमोनब्ला डिमापुर नोगोर, माइबांनि अन्थाइनि थानसालि 'रनसन्दि', रयेल गेट, खासपुरनि थानसालिफोर बादिफ्रा दा गोमालांनो हमनाय नडामोन।

आसाम जारिमिनाव ख'नासेबो हादाब मोनै, सुबुंनि बिसम्बिनिफ्राय गोमालांनाय सासे जोबोद गिदिर बर' जोहोलावनि बाश्नाखौ बे रायथाइयाव इसे रेब होनो आं नाजादों। बि जोहोलावआनो जादों सम्बुधन फंल'। रुपनाथ बसुमतारीआ गावनि खन्थाइयाव बि जोहोलावखौ सम्बुधन कछारी बुंदों आरो प्रति (प्रसेनजित ब्रह्म) आ गावनि रायथाइयाव बुंदों सोमदोन। सम्बुधन फंल' आ 1850 मायथाइयाव माइबंनि गंसे फिशा गामियाव जोनोम मोनदोंमोन। बे गामिनि मुंआ लंखर। लंखर गामियाव अन्थाइनि थानसालि 'रनसन्दि'नि साखाथियावनो। 'रनसन्दि' थानसालिया माहुर दैसाजों नांजाबनाय। माहुरनि खोलो खोलो बोहैनाय दैया बेसेबां गिदिर दुमा दुमा अन्थाइनि सायाव दानख'नानै लुनाय (गामिबो अन्थाइनि) 'रनसन्दि' सिबिसालिखौ बिलिरै बिलिरै बोहैलांदों। हाजो खंखरनिफ्राय सेरमायबोनाय गोगो सुदेम माहुर दैसा।

सम्बुधननि बिफानि मुंआ देप्र'दास आरो बिमानि मुंआ कासाइदिमोन। सम्बुधनमोना बिदा फंबाय गासै साब्रैमोन— उमाकान्त, रमाकान्त, रामचरन अरफे रामरेन आरो हाइसंलं। सम्बुधना जौग्ला दिंग्ला, नायनो मोजां आरो राफोद मददमोन। उन्दै समाव बियो बिफा-बिमामोनजों थादोंमोन। उनाव बियो देरनानै बे गामि बै गामि थाद्लाबायनानै उनाव माहुर दैसानि साखाथि सेमदिखर मुंनि गंसे गामियाव थाहैयो। बेवहायनो बियो नासादि मुंनि सासे सिबिसुलि सिख्लाखौ हाबा खालामो। नाथाय बिहा संसार खालामनो गोसो गैयामोन। बियो भगवान शिबखौ सिबिनो हमो। बियो माइबांनि हाग्रा-हाजोआव हारिसिंडै बाथौ बोराइखौ देहान खालामनो हमो। बिदिनो ध्यान खालामनो मोनसे जायगानिफ्राय गुबुन मोनसे जायगायाव बारस्लायो, गुबुन गंसे हाजोनिफ्राय गुबुन हाजोआव थानानै ध्यान खालामनाय समाव दिमासा बर' गामि गामि हाबहैब्ला बियो दिमासा बर'फोरनि निदान आरो अल'खदखौ मिथिनो मोनो। गुबुन हारिफोरनि हारिमुआ दिमासा बर'फोरनि हारिमुखौ मनग्लाबनो हमदोंसै। फारसेथिडै 'East India Company आ कासारनि बर' राज्योखौ सेनानै ब्रिटिस साम्राज्योजों सामिल

खालामबाय। दिमासाफोरनि धोरुम आरो हारिमुनि जायगायाव ब्रिटिशफ्रा गावसोरनि धोरुम आरो हारिमु सोनानै होनो हमबाय। आरो गुबुन फारसेथिडै 'Hindu Cult' एबा Sanskrit Culture आबो दिमासाफोरखौ नारसिननो हमबाय। आसाम बादि सानजानि हादाबफोरखौ खेरमे खेरमे सिं खालामनो हमबाय। कासारनि बर' राजा कृष्ण चन्द्रआ थामानि मोसौनि उदैयाव हाबनानै हिन्दु धोरुम लाबाय। बिनि उनाव राजा गबिन्द चन्द्रआबो हिन्दु धोरुम लाबाय। बेनि जाहोनाव दिमासा बर'फोरनि आसार आखु धोरुम आखु धोरुम हारिमुआव बेसेबा गिलु-फालु खैफोद सफैबाय।

सम्बुधना बिदिखौ नुनानै बिग्राय खांबाय। दिमासाफोरनि आसारखान्थि, हादर, धोरुम-खोरुम, हारिमुखौ रैखा खालामनो बियो ब्रिटिसफोरनि हेंथायै हाथियार दैबाय। बियो हान्जा दाबाय ब्रिटिसफोरखौ कासार हादरनिफ्राय होखानो। बियो दिमासाफोरखौ बुंबायदि बियो बिसोरनि हारिमुखौ रैखा खालामगोन। कासारनि स'नाखि मुगाखौ लाबोफिनगोन सम्बुधना माइबंखौ गावनि Head Quarter खालामबाय। माइबांआ कछारी राजाफोरनि राजथावनि आरो बे माइबांया माहुर दैसा सेराव थानाय 'रनसन्दि' सिबिसालिनि साखाथियावनो।

सम्बुधनखौ बयबो दिमासा हारिनि दैदेनगिरि होननानै मानिनो हमनायसै। बिखौ मोदाइ बादि सिबिनो हमबाय। जेनबा बियो बिसोरनि रैखागिरि Saviour, सोरबा सोरबा बिनो दाउ, अमा, मैसो बाउनो हमबाय। बिनो खाजा-बनजा होफैबाय। नौ-नारिफ्रा बिनि बोसोन मथै मानियोब्लाबिसोरनि दुखु-जाल्लाफ्रा खारजोबगोन। सम्बुधना दिमासा राज्योखौ लाबोफिननो थांखियै ब्रिटिसफोरजों नानो दावहारु हान्जा दानानै जायगा जायगा गोहो बोलोगोरा दिमासा सेंग्राफोरखौ बुथुमबाय। बिसोरनि माखासे दिमासा सिख्लाफोराबो दं। बियो हाजो सेराव, हाग्रामाफ्राव बिसोरखौ ट्रेनिं होबाय। बियो मानसिखौ गावनि गाहाइ सुबुरनगिरि खालामनानै, मलंथं मुंनि सासे दावहारुखौ गावनि सिडव Subordinate Commander खालामबाय। दुलाराय दिमासा हादरावनो माबा गिलु-फालु जाथाइ जागोननि सिं सिं दिमासा नौनारिफ्रा इसादि मोनबाय।

गुनजुं (Gunjung) नि Sub-divisional officer आ A.C. Soppitt मोन। बियो मिथिनो मोनबाय दि East India Company नि हेंथायै जुजिनो मोनसे बिग्रायारि हान्जा दानाय आरो बेनि दैदेनगिरिया सम्बुधन फंल'। Soppitt

साहाबा बिनि मुंयै गांसे Summon हरहोबाय। सम्बुधना थाबनो Soppitt नि आदालताव हाजिर जाफैनांगौ। सासे मानसिया बिनि हेंथायै नालिस होदों। गावखौलायनो सम्बुधना जोदामदोंमोन। सामनखौ सम्बुधननिसिम रावबो दैथायाखिसै। मानोना बिखौ बयबो मोजां मोनोमोन आरो गावसोरनि होननानै सानोमोन। उनाव सपित साहाबा गामिनि गामिबोराइ (Village Headman)नि हेफाजाब लाबाय सामनखौ हाहोनो। बे बारावबो साहाबा फेलें जाबाय। बर'फोरनि सम्बुधन बादि एसे गिदिर जोहोलावनो सामन हैनाया आरो बिखौ आदालताव लिंहरनाया गोरलै बाथा नड।

सम्बुधना गावनि रौनियाफोरखौ लानानै गुनजुंखौ गाग्लोबहैनो सेरे सेरे थियारि खालामबाय। गाहाइ थांखिया जादों सा-कासार Sub-division नि हेड क्वार्टर गुनजुंखौ उदखार खालामनानै Deputy Commissioner Major Boyed खौ सिथारनाय। Official record नि बादेब्ला-सपित साहाबा सम्बुधनखौ हमनो मेजर बयेदनि हेफाजाब बिहरनायाव 1882 मायथाइनि 13th Janurary खालि मेजर साहाबा 'Kuki militia' नि सा 40 सो लानानै माइबंआव सफैयो। मेजर बयेद सिफाइफ्रा सम्बुधन आरो बिनि बिग्रायारि हान्जाखौ हमनो माइबां हाग्रायाव नागिरबाय। गैया बिखौ जेरावबो मोना। सम्बुधनआ गावनि रौनियाफोरखौ लानानै सोदनो माब्लाबानो गुनजुंआव मोनहैजोबनायसै। पुलिसफ्रा गिनानै खारनो हमबाय जेब्ला बिग्रायारि सेंग्राफोरा सिखा, जं लानानै गाग्लोबबाय। बिसोर अफिस आरो क्वार्टरफोरखौ अर लागायनानै होबाय। साथामसो पुलिस थैबाय। नाथाय सम्बुधननि हान्जाया रां-रुफा, हाथेर जेबो लुत खालामाखिसै। अफिसियेल रेकर्ड मते बे समाव मेजर बयेदआ माइबंआवसो दंमोन। खायसे बुडोदि सम्बुधना गुनजुंआवनो मेजर बयेदखौ सिथारदों। फारसेथिं रिपर्टआ बुडोदि गुनजुंआव बियो मोननैनि माइबंआव थांनानै बिनि सायाव हामला खालामहैयो। जायखि जाया, बे खेबाव मेजर बयेदखौ जखम खालामनाय जायो। बियो उनाव 1882 मायथाइनि 30 जानुवारीयाव रुंसारि जायो।

पुलिसफ्रा सम्बुधनखौ हमनो नाजाबाय। नाथाय, बिखौ हमनो हायाखिसै। थेवबो पुलिसफ्रा बिखौ दाब दाब जायगायाव नागिरगासिनो थाबाय। बोसोरसे उनावसो 1883 मायथाइयाव पुलिसफ्रा बिनि थाखोमानाय जायगाखौ सुलाद मोनदों। पुलिसजों सम्बुधना मोगामोगि दावहा नांब्ला पुलिसनि

गुलियाव बिनि थोंसे आथिडा जखम जायो। उनाव बियो जिउ गोमायो। बिनि बिग्रायारिफोरनि मादाव साब्रैया हमजायो। सम्बुधननि गाहाइ सुबुरनगिरि मानसिया दिपान्तर जायो। ब्रिटिसनि हेंथायै सम्बुधननि बिग्रायखानाया बारा गोबाव थायाखैब्लाबो बेनि गोहोमा गोबाव आरो गोगोमै गोगलैनानै थालाडे। Fredrick Downs नि रावै— “The defect at arms.... had a deep cultural significance for a warrior people like the Dimasa” बिथांआ आरो बुंबावदों— “Messianic leaders like Sambudhan of the North Cachar and Jadonang of Manipur sent large number of their followers to death against British arms by assuring them that magic spells would dissolve the bullets, the old magic was imprtant against the new reality. Hence the preservation of a distinctive identity was not so much a matter of preserving the old ways as it was a matter of maintaining mastery in their own house, control of their destiny.”

जोहोलाव सम्बुधना दिमासा बर'फोरनि थाखाय गावनि जिउखौ बुलि होलांबाय। बिनि बिग्रायनायाव ब्रिटिसा नुनो मोनबाय दि काछारनि सायाव बिसोरनि दखला जोबोर लोरबां जानो हमबोबाय। बेनिखायनो बिसोर जोबोर हुसियार जानायसै। साहाबफोरनि नोजोराव सम्बुधननि सोमावसारनाया— “Contemptible in its origin, but lamenable in its conclusion”। थागिबि हारिनि सोमोन्दै बिसोर जेब्लाबो biased मोन। बे सोमावसारनायाव foreign rule नि हेंथायैल' नडामोन, बे जादों गावनि जोनोम हादरखौ गुबुनारि दखलनिफ्राय साखथिखनानै गावनि राव, गावनि हारिमु गावनि थुनलाइ आरो गावनि आसार खान्थिजों अरायबो थांना थाहोनानै जौगालांहोनो दावगालांहोनो। जोहोलाव सम्बुधना बे थांखिखौ होसोनानै सोमावसारदोंमोन। बियो गावनि जिउखौ बुलि होदोंमोन 'Do and die spirit' जों। दिनै बियो मुंख्लं जानानै दिमासा बर'फोरनि जिउ सोलेराव गोसारदलानानै थालांबाय। बेनिखायनो दिमासाफ्रा बोसोरफ्रोमबो 12th February सानखालि सोमदोन जोहोलावखौ गोसोखानानै मुंख्लं सान फालियो।

**सोदोबथि :**

हेव - नेवसि जानाय

मुंख्लं - हादरनि थाखाय जिउ बाउग्रा, छहिद

रेबहो - लिर

खरं - दुर्ग, दावहारुफोर थाग्रा खैफोद गैयि न' गिदिर

थानसालि - मोदाइ थाग्रा जायगा, मन्दिर

दुमा दुमा - गिदिर गिदिर, लुन्द्रा लुन्द्रि

सेरमाय - गबोनाय, बोहैबोनाय

जौग्ला दिंग्ला - गोजौ गिदिर

देहान - धियान

निदान - दुखु-दाहा, खैफोद आफोद

अल'खद - खैफोद गोनां

खेरमे खेरमे - लासै लासै

खाजा - जानाय लौनाय

सथबांसा - दिथा, बिथोन, सुबुरन

इसादि - इसारा

नालिस - अजद

सामन - (Summon) हांखाय बिलाइ

सोरोद - सि

सुलाद - सुलु

दिपान्तर - दिपाव दोनहरनाय, मोनसे होखारजानाय साजा

स'नाखि - स'नाथि

**सोंथि :**

1. जोहोलाव सम्बुधन फंल'आ सोरमोन ? बेबादि जोहोलावफोरखौ माबादियै हेव खालामनाय जादों होनना लिरगिरिया बुंदों ?
2. सम्बुधन फंल'नि जोनोम गामि आरो जोनोम मायथाइखौ मुंख'नानै बनि उन्दै जिउ समनि सिनायथि हो।
3. सेंग्रा समाव हाजो हालायवा थाबायदिनानै बियो दिमासा सेंग्रा सिख्लाफोरखौ मानो बुथुमदोंमोन आरो बिसोरनो मा मा सुबुरन दिथा होदोंमोन ?

4. सम्बुधन फंल'आ इराज सरकारनि बेरेखायै मानो बिग्रायखांदोंमोन ?
5. काछारनि दिमासा कछारि राजाफोरनि सोर सोर माबादियै सिगांग्रो गाव हारिनि हारिमुखौ नागारदोंमोन ?
6. दिमासाफोरनि गेजेराव सम्बुधन फंल'आ माबादियै दैदेनगिरि महरै गनायजादोंमोन ?
7. सम्बुधन फंल' आरो ब्रिटिश सरकारनि गेजेराव जानाय दावहानि सोमोन्दै फोरमायथि मोनसे लिर।
8. सम्बुधन फंल'आ ब्रिटिशफोरनि आखाइयाव माबोरै सिथार जादोंमोन ?

**बेखेवथि :**

1. मानोना बिसोर ..... खालाम जानाय।
2. दिनै बियो ..... थालांबाय।

**फरा गियान :**

बे फराया हारि मोजां मोननायनि गोथार नेरसोन दिन्थिदों। फरायसाफोराबो गाव हारि आरो हादरखौ मोजां मोननांगौ आरो नांगौब्ला बेनि थाखाय गोबां नागारसारनो थाखायबो थियारि थानांगौ। हारि आरो हादरनि थाखाय गोथार मोजां मोननाय आरो नागारसारनाय थायोब्ला गावनि जिउखौ अरायनि थाखाय जुगामि खालामना दोनलानो हायो।

**फोरोंगिरिनिसिम :**

फोरोंगिरिया सम्बुधन फंल'नि बादि आरोबाव गुबुन गुबुन बर' जोहोलावनि सोमोनदै सोंनो हायो। गोदोनि बेबादि जोहोलावफोरनि मुं आरो जिउ जारिमिनफोरखौ बुरखांन सल'फोरखौ थाखोआव सावरायनायनि राहा खालामनो हायो।

## बर' फावथाइ : बेनि मोनथिगोनां आखुफोर

कमल कुमार ब्रह्म

### फराखौ सायख'नायनि थांखि :

कमल कुमार ब्रह्मआ बर' फावथाइ लिरनानै गोगोम बिहोमा होलांदों। सासे फावथाइगिरि महरै बिथानि बर' फावथाइनि सायाव मा बादि नोजोर दंमोन बेनि सोमोन्दै मिथि होनो थाखाय बे रायथाइखौ सायख'नाय जादों।

### गुबै फरा :

बै मुगानि गेदेमा खन्थाइगिरि कालीदासा फावथाइखौ लानानै गावनि 'मालबिकाग्निमित्र' फावथाइयाव दोंसे अराय थार खौरां बुंलांदों। बिथानि बादियैब्ला सत्व रजः तम गुननिफ्राय सोमजिनाय सुबुं माहारिनि गुबुन गुबुन आखु फोरमायनाय आरो मिनिनाय गाबनायनि गोबां थुनलाइनि बिदै जायो होनानां फावथाइयाव बयबो मानसिनि गोसोखौ बोनो हादों। बेफोर गुननि थाखायनो फावथाइया थुनलाइनि जौसिन जायगा आवग्रिनानै दड'। मुलुगनि गुबुन गुबुन फावथाइफोरनि बादि बर' थुनलाइयाबो हारिखौ रंजाहोनाय आरो सोलौंथाइ होनायनि गोनां बाहागो लाबोगासिनो दड'। बर' थुनलाइयाव थुनफावथाइनि बैसोआ खन्थाइनि समान। नाथाय दुखुनि बाथ्रादि दंनायमानि गोदोनि आरो दानि फावथाइफोरखौ बुथुमना साफायनाय खामानिया दाबो जायाखैसै। दासिम जों मोनथिनो मोननाय फावथाइनि मादाव मनीन्द्र इसलारीनि 'हामफे' फालायानो गिबिसिन होनना हमनाय जादों। बिथानि उनाव गुबुन गुबुन लिरगिरिफोरा फावथाइ लिरदोंमोन आरो दाबो लिरगासिनो दं। बर' फावथाइ लिरनायनि फारि आरो दिन्थिनायनि आदबखौ जों बिजिरनानै नायब्ला माखासे मोनथिगोनां खौरांफोरखौ गुबैयै मोनब्रै आयदायाव फोरमायनो हागौ, जेरै— सल'थाइ (Plot), आखु (Character), बाथ्रा (Dialogue) आरो खननाय-मोसानाय (Music)। दासिम नुबोनाय बर' फावथाइनि सल'थाइया गुबैयै मोनथाम रोखोमनि। बेफोर

जादों माहारि फावथाइ, जारिमिन फावथाइ आरो सल'। सल'बाथाफोरनिफ्राय लानानै लिरनाय फावथाइयानो सानब्लाउरि सल' फावथाइ। बिबार मुगानि लिरगिरिफोरनि लिरनाय बांसिन फावथाइयानो माहारि फावथाइ। बेफोर गासिबो थांखि धोरोम। हारिखौ दैखानो आरो फोजाखानो थांखि लानानै लिरगिरिफोरा फावथाइनि जोनोम होदोंमोन जानो हागौ। थेवबो बै मुगानि फावथाइयाव गोख्रों थाखोनि लिरनाय आरो सानसुमा गोसोनि नेरसोन नुयो। अलंबार मुगायाव द्वारेन्द्र बसुमतारी, नबीन ब्रह्मआबो माखासे लिरगिरिफोरनि लिरनायाव गोबां जारिमिन फावथाइनि जोनोम होदोंमोन। नाथाय बेफोर फावथाइनि बांसिनानो बांला एबा असमीया फावथाइनिफ्राय राव सोलायनाय। थेवबो बै मुगानि फावथाइया राव सोलायनायब्लाबो लिरगिरिफोरा गावसोरनि फावथाइखौ बर'नि मुस्री होनो नाजादों। आधिखालनि फावथाइगिरिफोरनि फावथाइनि बांसिनानो गोजाम आखलनि एबा सल'फोरखौ लानानै लिरनाय। दैत्य-दानव, दाउ-अमा, मोदाइ-परिफोरनि जाथाइफोरखौ बेफोर फावथाइयाव नुनो मोनो। जारिमिननि फावथाइफोर दड'ब्लाबो बेफोर गासिबो दानस्लायनाय आरो जारिमिनजों सोमोन्दो गैयि माखासे जाथाइ सोदेरनानै गुबै जाथाइखौ गुबुंले खालामनाय। थेवबो बेनि गेजेरावबो माखासे गोथौ आरो जिउ गोनां फावथाइबो आधिखालाव जोनोम जानाय नुनो मोनो।

बुंनो थाडोब्ला बर'नि बांसिन फावथाइयानो जात्रा एबा सायनासालियाव (Open Stage) दिन्थिनो लिरनाय आरो बांसिन फावथाइयानो खौरां मोनाबिलिनि स्नि एबा दाइन बाजिनिफ्राय अखानायै सान ओंखारनाय समसिम नडाब्ला बे गाउनखौ नायग्राफोराबो नायनो हास्थाय। बेनिखायनो लिरगिरिफोरा गुबै सल'थाइजों माखासे फिसा-फिसौ जथाइ मोसानाय, खननाय, मिनिनाय बाथ्रा सोदेरनानै गावसोरनि फावथाइखौ गोलाउ खालामनांगौ जायो। बेनिखायनो बांसिन बर' फावथाइयावनो हाबानि गोरोबथा, सम आरो जायगानि गोरोबथाखौ नुनो मोना। माब्लाबा माब्लाबा दोंफा बाथ्राजोंनो दिन्थि मोनफा (Scene) या जोबनानैबो थाडो।

बर' फावथाइनि आखुफोरा जादों राजा-महाराजा, बीर, जोहोलाव-जोहोलावजो, समाजनि हादुंगोरा, गावबुरा, गामिनि जौ फाग्ला, जाम्बा-जाम्बि बेफोर बादि बर'नि जात्रा फावथिनायाव माखासे मिनिहोग्रा थाथारो। बेखौ जों

इंराजी फावथाइनि jester जों रुजुनो हागौ। बियो राजानो जौ दौनो, गोबां बाथ्रायाव राजा-मन्थ्रफोरजों बाहागो लाफायो। मिनिथाव फाव आरो बाथ्राजों नायग्राफोरखौ मिनि होयो, रंजाहोयो। द्वारेन्द्र बसुमतारीनि “जासुला फारिया”या बिबादिनो बिथांनि सोरजिसुला गोहोनि अराय गोथां मोनसे आखु।

बेनि अनगायैबो रोनाव फागला (बिबेक)या बर’ फावथाइनि मोनसे आखु। बेबो मानसिनि गाज्रि-मोजां साननायखौ symbolic खालामनानै आखु महरै दिन्थियो। द्वारेन बसुमतारीनि नीलाम्बर फालानि “सिख्री फागली”खौ जों बेयावहाय मुंख’नो हागौ। बर’ फावथाइनि आखुफोरा बेसेबा गोबां, नाथाय बांसिन आखुफोरानो गोगो आरो अराय गोथां नडा। बेनि गुबै खौरांआ जादों फावथाइ लिरगिरिफोरनि बांसिनानो आखु दानायाव गोसो होआ एबा सोलोंनो नाजाया। थेवबो सतीस बसुमतारी आरो द्वारेन बसुमतारीनि माखासे आखुफोरा बिथांमोननि सोरजिसुला गोहोनि अराय गोगो नेरसोन जानानै दड। दानि बर’ फावथिनानि आखुफोरनि बुंजाथाव मोनसे हाबाया जादों दावहा। बेबादि गिथाव-बाथाव गोबां एग्रे बाग्रे दावहा नांनायखौ गुबुन रावनि फावथिनायाव नुनो थाडा।

बर’ रावनि फावथाइनि रायज्जायनाया खायफा गोलाउ, खायफा गुसुं, खायफा फावथिनानि, खायफा गोसोनि थुलुंगाजों बुंनायबादि। खायफा रावआ एरैबादि गुसुंदि फंनैसो राव बुंखांब्लानो मोनसे Scene एबा नुथाइ जोबनानै थाडे। गाव हारसिडै बुंनाय Soliloquy फोरा सरासनस्रा गोलाउ जायो। बर’ फावथाइनि बांसिन बाथ्रायानो बुंनो थांब्ला आखुजों गोरोबै, गोथौ आरो गोसो नाडै। थेवबो दानि माखासे लिरगिरिफोरनि थियेटारनि थाखाय लिरनाय फावथाइफोरा आखुजों गोरोबनाय थार, गोथौ आरो सानसुमै गोसोनिफ्राय बेरखांनाय राव खोनानोबो मोनो।

बर जात्रा एबा फावथिनाया सुखिनि, हौवा-हिनजाव जुलिनि मोसानाय खननाय एबा राजखुंग्रि, रोनाव फागला-फाग्लिनि खननाय मेथाइफोरजों बुंफबनाय। गोदोनि मुगानि बर’ फावथिनानि बांसिन मेथाइफोरानो राव आरो देंखोआव बर’ खुगा मेथाइजों गोरोबनाय। नाथाय दानि फावथिनानि मेथाइफोरखौ गोदान देंखोआव खनहोनाय नुयो। खायफा फावथिनायाव मेथाइफोरनि देंखोआ हारसाबो दड’। बर’ फावथिनायाव सुखिफोरनि खननाय मोसानाया आंगो आरो गोनांथार। बर’

फावथिनायाव सुखि गैयाब्ला बे फावथिनायानो नडा। बिसोर ग्रीक, करास बादि गाननाय-मोसानायनि गेजेरजों फावथिनानि जाथाइफोरखौ आवगाय लांहोयो आरो गेवलांसार होयो। बेबादि हौवा-हिनजाव जुलिनि गाननायमोसानाया एबा Dancing आबो बर’ फावथिनायाव गोनांथार।

बेफोरनि अनगायैबो सिख्लाफोरनि एबा सेंग्राफोरनि मोसानाय राजखुंग्रिनि गाबनाय रंजानाय गिदिं गिदिं आखाइ फाव दिन्थि-दिन्थि मोसानायफोरा बर’ फावथिनानि माखासे नागार हायै आखु।

बुंनो थाडोब्ला बर’ फावथाइफोरखौ रंजासालि एबा Stage आव दिन्थिनो लिरनाय जायो। बेनिखायनो थुनलाइनि सिरियाव गोगलैनाय गोथौ फावथाइजों दासिमबो नुनो मोननाय जायाखै। थेवबो बर’ फावथाइया समाजनि बयनिबो रंजानायनि बिदै होबोगासिनो दड’ आरो सानसे बेलासे बेबादिनो समाजनि बयनिबो अननाय मोनोब्ला लिरगिरिफोरनि सोरजिसुला आखाइनि खलमाव गोख्रों आरो गोथौ थुन फावथाइफोरनि जोनोम मोनथारगोन होननानै जों मिजिं खालामनो हागौ।

### सोदोबथि :

सल’थाइ - सल’बिथा

Symbolic - नेरसोनथि

Soliloquy- गाव हारसिं आवरायनाय

### सोंथि :

1. मुंदांखा फावथाइगिरि कालीदासनि गांसे फावथाइनि मुंआ मा ?
2. गिबिसिन बर’ फालानि मुंआ मा ?
3. बर’ फावथाइनि थादेरसाफोरा मा मा ?
4. अलंबार मुगानि सानै फावथाइ लिरगिरिनि मुं लिर।
5. फावथाइयाव मा मा मोनथाम गोरोबथा थानांगौ ?
6. बर’ फावथाइनि आखुफोरा मा मा ?

**फरा गियान :**

फावथाइखौ नायनानै आरो फारायनानै रोसि मोनजानो हायो ।

फावथाइयाव माखासे थादेरसा थायो । जेरै— सल'थाइ (Plot), आखु (Character), बाथा (Dailogue) आरो खननाय-मोसानाय (Music) बायदि बायदि । बर' खन्थाइजों लोगोसे बर' फावथाइनिबो जोनोम जादोंमोन ।

फावथाइखौ गुबुन गुबुन बाहागोआव राननो हायो । जेरै— गोजाम एबा धोरोमारि, जारिमिनारि आरो समाजारि ।

बर' फावथाइयाव राजा-महाराजा, बीर, जोहोलाव, गावबुरा, गामिनि जौफाग्ला, जाम्बा-जाम्बिनि आखु होनाय थायो ।

बर' फावथाइया रंजासालि एबा Stage मिरुआरि । गोथौ सानस्रिनि फावथाइ दासिम बर' आव नुजायाखै ।

**फोरोंगिरिनिस्सिम :**

फोरोंगिरिफोरा फावथिनानि सायाव फरायसाफोरनो गुवारै मिथि होनांगोन । लोगोसे बर' फावथाइया मानो जौगायाखै, बेनि जाहोना मा बेनि सोमोन्दै सावरायगोन ।

**आखल****कमलेश्वर ब्रह्म****फराखौ सायख' नायनि थांखि :**

जायखि जाया सुबुंनि सिनायथिया आखलनि गेजेरजों बेरखाडो । गोसोजों नाजायोब्ला सुबुंआ आखलखौ दानानै लानो हायो । आदारआ सुबुं जिउनि थाखाय जेरै गोनां बिब्दिनो आखलाबो गोनां, मानोना आखलानो जादों— गोजौआव गाखोनायनि गोनां जांख्ला । आखलनि सोमोन्दै गियान होनो थाखाय— आखल मुंनि फराखौ सायख'नाय जादों ।

**लिरगिरिनि सिनायथि :**

1937 मायथाइयाव क'कराझार जिलानि पुथिमारि गामियाव कमलेश्वर ब्रह्मआ जोनोम मोनो । बिनि बिफानि मुडा रुंसारि कालीचरण ब्रह्म आरो बिमानि मुंआ बिलाइश्वरी ब्रह्म ।

सानथौ आयदायाव 1965 मायथाइयाव गुवाहाटी मुलुग सोलोंसालिनिफ्राय एम. ए. उथ्रिनानै जनता कलेज, सेरफांगुरिनि गायसनगिरि गोरायुं जानानै 1991 मायथाइयाव आजिरा लायो ।

गुबुन गुबुन लाइसिफोराव बिथानि गोथौसावरायनाय रायथाइ नुजादों । बिथाना गांसे सल'मा बिजाबबो दिहुनदोंमोन ।

**गुबै फरा :**

आखला जादों सानफ्रोमबो थांनानै थानायाव मानसिनि मावनाय, दांनाय, साननाय-हनायनि गेजेरजों बेरखांनाय फाव । मानसिया संसाराव थांनानै थानाय समाव सानफ्रोमबो गावनि न'खरनि गेजेराव एबा समाजनि गेजेराव मावनाय-दांनाय, रायनाय-होननायाव मानसिनि आखला नुजायो । बे आखलफोरनि गेजेराव बबेबा मोजां बबेबा गाज्जि । जायबादि आखला बाख्नाय जाथाव, सोलोंथाव बेफोरनो मोजां, आरो जायबादि आखला मुगैथाव, लाजिथाव बेफोरनो गाज्जि । जेरै सानफ्रोमबो

सैथो राव बुंनाय, गाहाम हाबा मावनाय बेफोरनो जाबाय मोजां आखल, आरो मालायखौ सोलिनानै जानाय, मालायनि इनाय खालामनाय बेफोरनो जाबाय गाज्रि आखल ।

आखलखौ आरो मोनसे जुदा नोजोरैबो बिजिरनानै बुखाव जायो । जेरै— थैस'नि आरो दसेनि आखल । थैस'नि आखलआ जादों जोनोमनि लोगो लोगो फेफानानै मानसि थैनाय समसिम थानाय । बेनि नेरसोनफोरा जादों— खायसे गिख', खायसे गोहो गोरा, खायसे लाजिगुसु, खायसे लाजि रोडा, खायसे खुगा रेजें, खायसे आखाइ गुसु, खायसे आखाइ गोख्रै, खायसे गावनि नामखौ गाव फोसावग्रा बायदि बायदि । बेफोरबादि आखलफोरखौ आखु होननानै बुंन्ला साबसिन मानोना बेफोर मानसिजों जेब्लाबोथायो, मानसिया बेफोरखौ गारनो हाया । बेफोरबादि आखलफोरा मालायनि जेबो गाज्रिबो खालामा मोजांबो खालामा, मोजां गाज्रिनि सायखंआ बेफोरनि सायाव गोग्लैया । बेफोरनिफ्राय समाजनि जेबो खहा जाया । नाथाय दसेनि आखला थानानै थानाय लामायाव मानसिनि एखनब्ला सिमा बारफ्लानायनिफ्राय सोमजियो । बेफोर मालायनि एबा राइजोनि आरो गावनिबो हामा खालामो, आरो बेनिफ्राय मालाय एबा समाज फारसे मोनसे गाज्रि दोहौ सफैयो । सासे मानसिया सिखाव खावोब्ला बे खावग्राया बुजागोन, साजा होजागोन, दाय फोनांजागोन । खावजाग्राहाबो दोहोन गोमागोन आरो रायजो एबा समाजआ बे सिखावखौ दबथायनोथाखाय खर' सानांगोन । थिग बिब्दिनो जायोबुज्लाय-सौज्लाय. नांज्लाय-खमज्लाय । बेबादि सिखाव खावनाय, मालायनि इनाय खालामनाय, मालायखौ सोलिनानै जानाय, लाजिथाव मुगैथाव खामानि मावनाय बेफोर गासिबो दसेनि आखल, मानोना बेफोर मानसिनि आखुआव सानफ्रोमबो बेरखाडा-माब्लाबाल बेरखाडो आरो बेफोरखौ 'बारगा' आखलबो बुंजायो, मानोना धोरोमनि सिमाखौ बारनायावसो बेफोर बेरखाडो । बेफोर बारगा आखलफोरखौ दसेनि आखल बुंनाय जायोब्लाबो नाथाय बेफोरबो एखनब्ला थैस' आखलनि महर लालांनो नागिरो । सानसुमै गोसोजों सायख'नानै ज्राब गाराब्ला बेफोर हुदा जालांनो नागिरो, आरो हुदायाव थांब्लाबो थैस' आखलाव सोलायो ।

बे बारगा आखलफोरखौ दसेनि आखल होननाय जायोब्लाबो, बेफोरबो माब्लाबा जोनोमनि गेजेरजों बिमा-बिफानिफ्राय फिसानियाव फैयो । बिमा बिफानि

थैजोंनो फिसाया उजियो । सोलेर बिजिरगिरिफोरा बुंनाय बाथ्रा- बिमा एबा बिफानि जेरैबादि आखल बिनि थैया जोनोमाव फिसानियाव हाबब्लानो फिसानि आखलाबो बिब्दिनो जायो । नाथाय बयनिबो बेलायाव बे जानानै फैया- माब्लाबा एरायो । बेनिखायनो सिखावनि फिसायाबो माब्लाबा सादु जायो आरो सादुनि फिसायाबो सिखाव जायो । जोनोमाव साननाय बाथ्राखौ गारनानैबो मोनसे गोनां बाथ्रा दं । बेयो जादों मानसिनि सोलोंसुला आखु । मानसि हारिया सोलोंसुला । मानसिया मालायनि फावखौ सोलोडोनो । बे रावआ गथ'फोरनि बेलायाव गोरबसिनो । गथ'फोरमानि मालायनि आव-फाव सोलोंग्रा । गथ'फोरनि बे आखुनि सायावनो सोरगिदिं समाजावबो नारसिननो बोलो मोनदों । सोरगिदिं जायगानि मानसिफोरनि साननाय-हनाय, मावनाय-दांनाय आरो आखल आखुआ जेरै, गथ'फोरनियाबो बिब्दिनो जालांनो नागिरो । बेनिखायनो मोजां सोरगिदिं गेजेराव थानाय गथ'फोरनि आखुआ मोजां । नाथाय बिब्दि होननानै सोरगिदिंनि आबहावायादि गथ'फोरनि आखलखौ दायो बे नडा । बेयो गिदिर उन्दै जायखि जाया मानसिनि आखलखौनो दायो । जायगानि बांसिन मानसियानो गाज्रिब्ला नोंबो गाज्रि जानांगौ जायो आरो मोजांब्ला नोंबो मोजां जानांगौ जायो । बे जादों सोलेर बिजिरगिरिफोर सानसुमै गोसोजों मोनदांनाय बाथ्रा ।

नाथाय जेरैखि जाया मानसिया नाजायोब्ला आखलखौ दानानै लानो हायो । सानसुमै गोसोआ गोगोमब्लानो बे जानानै फैयो । सानसुमै गोसोनि हेफाजाब लानानै जेब्लाबो गावखौ गाज्रियाव थानो नागिरनायनिफ्राय हमथा हमथा खालामब्लानो गावखौ गाव मोजां खालामनो हायो । मोजां मानसिफोरनि मोजां बोसोनफोरखौ खोनासंनानै धोरोमखौ साननानै जेब्लाबो मोजां लामाजों थाबायनानै जिउखौ खांनो नाजायोब्लानो बे जानानै फैयो ।

आखलानो जादों गोजौआव गाखोनायनि गोनां जांख्ला । दोहोन था, रांखाउरि था, बेफोर जेबो नडा— आखला मोजां नडाब्ला । आखल मोजां नडाब्ला बिमा-बिफानिफ्राय मोननाय नायख'नो हायि जाखनो हायि दोहोनाबो साननैसोजोंनो जोबलाडो । बेनि नेरसोन नांगौब्ला संसाराव नागिरब्लानो गोबां मोनो । मानसिया आखलावनो बायदिसिना दायव गोग्लैया । दायनिफ्राय बारग'नो दोहोन फाननाडो । सोरबाबा आखल गाज्रिनि थाखायनो दोहोन थासेयावबो जानो रोडा, दोहोन



फानजोबनानै लानानै लामानि मागिग्रा जानाडो । बेनिखायनो बुंनाय जायो— सोरहाबा रां गोमादोंब्ला जेबो गोमायाखै, मुस्त्रिगोमादोंब्ला एसे माबा गोमाबाय आरो आखल गोमाबायब्ला गासिबो गोमाजोबबाय । मानोना आखलानो जादों जेनिबो गुदि, मोजां आखलानो राहानि गुदि । आखलावनो बान्था, आखलावनो जुथा । आखला मोजांब्ला मानसिया अनजायो, बाख्नायजायो, एसे एनै दायफोरनिफ्रायबो बारग'यो, नाथाय आखल गाज्रिब्ला जेरावबो बुजाबायो । आर्थिनि सौथुनायाव गाव दुखु मोनो, आखलनि सौथुनायाव नाथाय खैफोद सौफैयो । आखलानो जादों मुंनि मुकुत । राजा-राणीया समायना जायो मुकुतजों, मानसिया समायना जायो आखलजों ।

बेनिखायनो मोजां आखल दानानै लानो नाजानाया गोनां बाथ्रा । गोसो गोथौ मानसिफोरा बुडे बिजाबनि थांखिया जादों गावखौ गाव गोरों गोरा खालामनायनि लोगो लोगो आखल दानाय । बिजाबाव मोननाय मोजां बोसोनफोरखौ लानानै गाव गावनि गोरोंन्थिफोरखौ, गाज्रि हुदाफोरखौ ज्राब गारनांगौ । आखल मोजां नडाब्ला लेखा रोंब्लाबो मान मोना, गिदिर अफिसाराबो सिबिजाया ।

### सोदोबथि :

थैस'नि - थैजासिम

खुगा रेजें- गोबां बाथ्रा बुंग्रा

आखाइ गुसु- थाफ्ला, अलसिया

बारगा आखल- रावखौबो गनायि

### सोंथि :

1. माखौ आखल बुडे ?
2. मोजां आखल माखौ बुडे ?
3. आखलखौ माबादि बाहागोआव राननो हागौ ?
4. 'बारगा' आखला मा ?
5. हुदा आरो सोरगिर्दिनि आबहावानिफ्राय आखला माबोरै महर लायो ?

### बेखेवथि :

1. आखलावनो बान्था, आखलावनो जुथा ।
2. आखलानो जादों मुंनि मुकुत ।

### फरा गियाण :

सुबुं-समाजनि सानफ्रोमबो जिउ लामायाव मावनाय-दांनाय, साननाय-हनायनि गेजेरजों बेरखांथिनाय गोनांसिन फावानो जादों- आखल । आखलनि गेजेरजों सुबुंनि मोजां-गाज्रि सिनायथिया रोखायै बेरखाडे । आखला गोबां रोखोमनि, जेरै- मोजां आखल, गाज्रि आखल, थैस'नि आखल आरो दसेनि आखल । आखलखौ दोहोन-दौलद, महर-मुस्त्रिजों रुजुजाया । आखला दोहोन दौलदनिखुइ देरसिन, मानोना दोहोन-दौलद एबा रांजों आखलखौ बायनो हाया । गोसोजों नाजायोब्ला सुबुडा आखलखौ दाना लानो हायो । जायखि जाया सुबुडा जौगानो थाखाय आखलनि गोनां । मानोना आखलानो जादों गोजौआव गाखोनायनि गोनां जांख्ला । बेनिखायनो जों बयबो मोजां आखल दानो थाखाय साखा-फारा जानांगौ ।

### फोरोंगिरिनिमिम :

आखला मा ? सुबुं समाजनि थाखाय आखलखौ मानो नांगौ ? बेफोरनि सोमोन्दै फोरोंगिरिया फरायसाफोरनो गुवारै बिदिन्थिजों फोरोंनांगोन । आखलनि सोमोन्दै गुबुन गुबुन रावनि लिरगिरिफोरा लिरनाय लिरबिदांफोरखौ फरायनानै फोरोंनो हायोब्ला साबसिन जायो । नांगौ बादि गेदेमा सुबुंफोर, जायफोरनि आखला अराय अनसायथाव, बिथांमोननि आखलफोरखौ बर्णायथिनाया मोजां जागोन ।

## जों आरो जोंनि आबहावा

ड० लक्ष्मीनन्दन बरा  
रा: सो: मधुराम बर'

### फराखौ सायख'नायनि थांखि :

जायफोर थादेरसाया बयबो जिबफोरखौ गोरोबज्जलायनानै थांना थानायनि खाबु होयो बे थादेरसाफोरानो बै ओनसोलनि आबहावा। बुंनो थाडोब्ला मोनसे बेसादनि सोरगिदिं थानाय थासारियानो जादों बहुमनि जिब मण्डल, बार मण्डल, दै मण्डल, हा मण्डल, अख्रामण्डल बायदि बायदि सोरजिनि गुदिनिफ्रायनो आबहावा रैखा खालामनायाव गाहाइ बिबान लानानै फैदों। सुबुं अनजिमा, मिथिंगा, आबहावा गुबुंले जानाय आरिफोरा जोंनि आबहावानि सायाव बायदिसिना गोहोम खोलैदों। जों आरो जोंनि सोरगिदिंनि आबहावानि सोमोन्दै फरायसाफोरनो मोन्थि होनायनि थाखायनो बे फराखौ सायख'नाय जादों।

### लिरगिरिनि सिनायथि :

बे फरानि लिरगिरिया जादों ड० लक्ष्मीनन्दन बरा। बिथानि जोनोमा जादोंमोन 1931 मायथाइयाव नगाँव जिल्लानि हातिचुं गामियाव। बियो 1948 मायथाइयाव नगाँव सरकारि फरायसालिनिफ्राय मेट्रिक आनजाद आरो 1952 मायथाइयाव कटन कलेजनिफ्राय बि. ए. दिग्रि लानानै 1954 मायथाइयाव कलिकता बुहुम फरायसालिनिफ्राय बेसाद बिगियान आयदायाव आरो 1997 मायथाइयाव अन्ध्र बुहुम फरायसालिनिफ्राय डक्टरेट दिग्रि लादोंमोन। गोबां कलेजाव फोरोंगिरि मावनायनि उनाव ज 'रहाटनि आसाम एग्रिकालसार इउनिभारसिटिनिफ्राय बेसाद बिगियान बिफाननि गाहाइ फोरोंगिरि हिसाबै जिरोन लादों। रामधेनु, मुगायाव असमीया थुनलाइ मुलुगाव गावखौ गायसननो हानाय ड० बराया गोबां अनजिमानि सल'मा आरो सुंद' सल' बिजाब लिरदों। बिथानि सल'मा बिजाबफोरा जादों- गडा चिलनीर पाखि, निशार पुरबी, जाकेरि नाहिके उपमा, सेहि गुणनिधि आरो पाताल भैरबी। सुंद' सल' बिजाबफोरा जादों— दृष्टिरुपा, सेइ सुरे उतला, एइ

रुप एइ छन्द, एराबारीर लेछेरि बायसेथा। पाताल भैरबी सल'मानि थाखाय बिथांआ 1986 मायथाइयाव साहित्य अकादेमि बान्था मोनो। उनथाराव बिथांआ 'कायाकल्प' मुनि सुंद' सल' बिजाबनि थाखाय बिरला फाउण्डेसननि 'सरस्वती' मानबान्था मोनदों। ड० बराया 1996 मायथाइयाव असम साहित्य सभानि आफादगिरि जादोंमोन। बेफोरनि अनगायैबो बिथांआ रादाबगिरि हिसाबै गांनैसो रादाब बिलाइ सुजुदों आरो असम राज्यिक प्रदुषण नियन्त्रन बर्डनि आफादगिरि बिबान लादोंमोन।

### गुबै राव :

आबहावा सोदोबनि सोदोब बिहुंआरि ओंथिया जादों मोनसे बेसादनि सोरगिदिं थानाय थासारि। फांसे बम्फानि सोरगिदिं जायफोर थादेरसाया बेनि देरनाय आरो जौगानायाव बिहोमा होयो बेफोरनि थाखायनो जादों बे बम्फानि आबहावाया। बेबादनो मोनसे ओनसोलनि जायफोर थादेरसाया बयबो जिबजिबिफोरखौ गोरोबज्जलायना थानायाव खाबु होयो बे थादेरसाफोरानो बे ओनसोलनि आबहावा। बुहुमनि जिबजिबिफोरा गावजों गाव सोरगिदिं आवग्रिज्जलायनानै थायो। मोनसे जिबनो थांना थानायनि थाखाय साननि बिदुं, आरो सोरां, बार, दै बायदिसिना जिउनि थादेरसा नांनाय जायो। बेनिखायनो जोंनि आरो आबहावाया जिउगोनां जिउगैयि थादेरसा लोगो नांना सोमजिनाय मोनसे जथाइ महर।

दै खफ' आरो अक्सिजेन गैयाब्ला जिब जिबि सोमजिया। हा, दै आरो बारमण्डलजों जाय बुहुमा जाखांदों बेयावसो जिब जिबि थायो। बेनो जिबिमण्डल (Biosphere) बेनिफ्रायनो बेयो रोखा जायो दि बम्फां लाइफां, मानसि 'जिबजिबि' फिसानिबो फिसा लाइफां, आरो जिबि, हा, दै, बार, धातु, खनि बेसाद बे गसिखौबो हमना लानानैनो जोंनि आबहावाया।

आबहावाया मोननै रोखोमनि : लाइफांनिफ्राय जिउगोनां फिसासिनथार जिबिसिम आबहावानि मुंआनो जादों जिबारि आबहावा (Biotic Environment)। बार, साननि सोरां गेसफोरबादि गोबां जिउगैयि थादेरसाफोरजों दानाय आबहावाखौनो जिबारि नडि आबहावा (Abiotic Environment) बुंनाय जायो।

अदेबानि गुबुन मोनसे आबहावाखौबो नेवसिनो हाया। सुबुंनि हारिमु, रंखान्थियारि आरो समाजारि मावथाइ फिनमावथाइफोरा सोमजिहोनाय आबहावाखौनो समाजारि आबहावा (Social Environment) बुंनाय जायो।

बुहुम बिखुंनिक्राय द' किल'मिटरसिम आरो लैथो-लैथोमा, दैमा-दैसाफोरनिक्राय द किलमिटर गोथौसिम जायगायाव जिबजिबिफोरा थायो। बेबादि जिबजिबिनि थाग्रा जायगाखौनो बिगियानारि सोदोब बादियै जिबमण्डल (Biosphere) बुंनाय जायो होनना गोजौआव बुंबोनाय जादों। बे जिबमण्डलावनो बायदिसिना हारिनि (class) लाइफां (Flora) आरो जिबि (Fauna) फोरा थायो। लाइफां आरो जिबिफोरा बेयो बेजों सोनारनानै थायो। आबहावा आरो बायदि जिबिनि गेजेराव थानाय सोमोन्दोनि बागै फरायसंनया जोबोद गोनां। नडाब्ला जौनि थाथाइ (Existence) खौ रैखा खालामनायनि बिथिडव आबहावानि बिबान (Role)नि सोमोन्दै बुजिनो हानाय नडा। आबहावा आरो गुबुन गुबुन जिबजिबिनि गेजेराव थाज्जलायनाय सोमोन्दोनि बागै फरायसंनयानो जादों थासारि बिगियान (Ecology)।

रोखोमसेनि लाइफां एबा जिबिनि थुबुरखौनो था ज'थाइ (Aggregate) बुडो। दाबसे जायगायावनो थानाय बयबो था ज'थाइखौनो थुबुरै हारि (Community) बुंनाय जायो। लाइफां आरो जिबिफोरनि हारि आरो थानाय आबहावाखौनो जयै थासारिखान्थि(Eco-system) बुडो।

आबहावा बिगियानखौ बुजिनो थाखाय थासारि बिगियान (Ecology) आरो थासारि खान्थि (Eco-system) बे सोदोब मोननैनि सायाव मोजां गियान थानांगोन।

जौनि आबहावाया मोननै थादेरसानि जथाइ, जेरै— (1) बारमण्डल (Atmosphere), (2) दैमण्डल (Hydrosphere), (3) हा मण्डल (Lithosphere), आरो (3) जिबि मण्डल (Biosphere)।

**बारमण्डल :** बुहुम बिखुंनिक्राय 50 किल'मिटर गोजौसिम बार थानाय बाहागोखौनो बारमण्डल बुडो। गुबुन गुबुन गेस आरो दैखफ, हाड्रिसा, उखुन्दैफोरनि गलायमोनदेर जानानै बारमण्डल सोमजिदों। बारमण्डलाव 78 जौखोन्दो नाइट्रजेन, 21 जौखोन्दो अक्सिजेन आरो एसे बिबानि आरगन, कार्बन-डाइ-अक्साइड,

नियन, हिलियाम, मिथेन बायदिसिना बेसाद थायो। बारमण्डलनि सा बाहागोआव थामहिनबा 50 किल'मिटर गोजौआव थानाय खलबा परमानु अक्सिजेन ( $O_1$ ), अजन ( $O_3$ ) हिलियाम आरो हाइड्रजेन गेसजों दानाय।

बेनि अनगायैबो अजन (Ozone), कार्बन मनक्साइड आरो माखासे धातुफोरखौबो माबोर जाहोनाव माबेबा ओनसोलनि बाराव मोननाय जायो।

बुहुम बिखुंआव बारनि रोजाथाया बयनिखुइबो बांसिन। गोजौथाइ हिसाबे बे खमायलांबाय थायो। 8 आरो 22 किल'मिटर गोजौआव थानाय खलबखौ ट्रप'स्फियार (Troposphere) आरो बेनि गोजौआव थानाय खलब मोननैखौ स्ट्राट'स्फियार (Stratosphere) आरो ट्रप'पज (Tropopause) बुडो। बारहुंखा, सारनथाइ, बारमोदाइ, अखाफोरा 12 किलमिटर गोजौआव सोमजियो।

**दैमण्डल (Hydrosphere) -** बुहुमनि दै थानाय बाहागोआनो दैमण्डल। 14,60,000 घन किल'मिटराव दै दं। जौसेनि 97.3 बाहागो दं लैथो-लैथोमायाव आरो 2.7 बाहागो दं बरफ (Glacier) दैमा आरो हा सिडव। बुहुमनि 70.8 जौखोन्दो बाहागो लैथोमायानो साग्लोबना लाखिदों।

**हा मण्डल (Lithosphere) :** बुहुम बिखुंआनो हा-मण्डल। हादरमाफोरा बेनि सिडव। बेनि गासैबो जायगानि गोथौथिया समान नडा। बेयाव हाजो हाजोमा, जौयेन, हायेन आरो समान जायगा दं।

**जिबि मण्डल (Ozone) :** गोजौआव मुंख'बोनाय जादों दि जिबिमण्डला बायदि हारिनि सानथ्रहायि लाइफां आरो जिबिफोरनि थानाय जायगा। गुबुयै 3,50,000 लाइफां आरो 1,10,00,000 जिउ जिबिफोरनि हारिजों बुंसारनाय बाहागोआनो जिबिमण्डल।

सोरजिनि गुदिनिक्रायनो जौनि आबहावाया खम-बारायै बायदि जेंनाजों मोगामोगि जाना फैदों। बांग्रिं, अरगें हाजोनि बेरफुनाय, बारमोदाइ, दैबानाफोरबादि बायदिसिना मिथिंगायारि खैफोदफोरा दंखायो। बेफोरो आबहावाखौ गुबुंले खालामदों।

थेवबो नाथाय मानसि हारियासो थासारि खान्थियाव आखाइ होनायनि थाखायनो आबहावायाव सानथ्र' हायि खहा जादों। दा बेयो ओरैबादि थासारियाव सफैदों दि माखासे गात्रि खामानिखौ जों दबथायनो हायाब्ला, बे बुहुमाव जौनि

थाथाइयानो खैफोदाव गोलैनो हागौ। दानि थासारिखान्थिनि समानथाइयाव जेंना फैंयो। बे थारैनो गिथाव बाथाव महर लादों। गाहाइ गाहाइ जाहोनफोरा जादों सुबुं अनजिमा बांनाय (Over population), मिथिंगायारि सम्फदिनि गोख्रै जोबलांनय, हानि गुन जोबलांनय आरो आबहावा गुबुंले जानाय (Enviornmental Pollution)।

**सुबुं अनजिमा बांनाय (Over population) :** बुहुमाव दा सुबुं अनजिमाया 6 मिलियन (600 कौटि)। 1900-2000 मायथाइनि गेजेराव सुबुं अनजिमाया सिगांनिखुइ बा फान बारायदों। 1900 मायथाइयाव बे 152 कौटिल'मोन। नैजिसे जौथाइयाव खेबफ्रोमबो जि बोसोराव 9.7 कौटि हिसाबै सुबुं अनजिमाया बारायलांबाय थागोन।

देहाफाहामग्रा बिगियाननि गोमोथाव दावगाखानायनि जाहोनावनो बारदेरनाय बेरामखौ दबथायनो हादों आरो गथ'फोरनि थैनायनि बिबाडा खमायलांनयनि थाखाय सुबुं अनजिमाया बांलांदों। नोगोर-नोगोरमाफोरा सुबुं अनजिमा बांनायजों बुंसारदों। दाखोर-दाला बांलांदों। दै गुबुंले जादों, आबहावाया बांसिन गिज्रा जादों। गामि ओनसोलावबो सुबुं अनजिमा बांनायनि थाखाय सावमि गिज्राथिनि थासारि सोमजिदों। जानाय आदारनि आंखाल सुफुंनो गोबां आबाद मावग्रा हानि नांनय जादों। गुबुन गुबुन गोबां बेसाद दिहुननो गोनां जानायाव फसनाय दाजेम एबा कल कारखानाफोरा आबहावाखौ बांसिन गिज्रा खालामदों। थारै बुंनो थाडेब्ला मिथिंगानि थासारियाव समानथाइया जोबसांलांनो हमनायनि गुबै जाहोनानो जादों बांलांनय सुबुं अनजिमा।

#### **मिथिंगायारि सम्फद जोबलांनय :**

बार, दै, हा, आरो लाइफांफोरनि बिबाडा जेब्लाबो दिदोम थाया। खनि बेसाद, सोदाडै थावनि बाख्रि आरो मिथिंगायारि गेसफोरा लासैनो जोबलांनो हमदों। सुबुं अनजिमा बांलांनयनि लोगो लोगो आबाद मावनाय हानि जेंनाया बारायलांदों। आबाद मावनायनि थाखाय हाग्रा-बंग्रा एवसांनो गोनां जादों। हाग्रामानि बिफां लाइफां फोजोबसांबाय। बुहुमाव सानफ्रोमबो 31,000 हेक्टरफ्राम हानि हाग्रामा जोबसांनयनि लामायाव। भारताव बोसोरफ्रोमबो 25,000 हेक्टर हाग्रामा जोबसांलांबाय। आबहावाखौ गोथार लाखिनो थाखाय बुहुमबिखुंआव 33.3 जौखोन्दो

थानांगौ। नाथाय आसामाव 17 जौखोन्दोआवसो हाग्रामा दं। हाग्रामाया नांनयबादि थायाब्ला बारहावानि गाज्रि सोलायनाय फैंयो, अखा हानाया खमाय लाडे आरो बारमण्डलाव गोबांथार हाद्रिसा लोगो नाडे। बेनि अनगायैबो हाग्रा एवसांनया हा जामलांनय खामानि मावो। मानोना बिफां लाइफांआ सा-बाहागोनि हाखौ गोरायै लाखिनायनि थाखायनो अखा हानाय आरो गोरा बार बारनाया हाखौ जामहोनो हाया। अखा हायोब्ला हाया गोजावलांनानै दैमायाव गोगलैहैयोब्ला दैमानि बिखाया बोरि जायो। बेनि दै लाखिनो हानाय गोहोआ खमाय लाडे। बेनिखायनो दैमाया गिथाव बाथाव महर लायो। हाग्रामा खमायलांनयनि जाहोनाव लाइफां आरो जिबजिबिफोरनि गोबां हारिया (Class spices) जोबसांलांदों। बुहुमनि जिबियारि आखुथाइया खमायलांदों।

#### **हानि खहा :**

हाया हाद्रि, हाबु आरो जिबियारि बेसादजों दानाय। अनजिमा गैयि जिबफोर (microbe) हानि हासारखौ बाहायो। मानोना बेफोरो हाखौ फिसा फिसा खालामब्ला हायाव थानाय आदारखौ लाइफांफोरा बुथुमना लानो हायो। नाथाय दासानदि हानि खहा जानाया मोनसे साननो गोनां जेंना जानानै फैंदों। बेयो मोनब्रै जाहोनाव : (क) बार अखानि गोहोम, (ख) दै नांथानाय (waterlogging), (ग) रासयनारि हासार आरो धातुनि गुबुंले जानाय, (घ) रासायनारि हासार आरो एम्फौ सिथारनाय मुलि बाहायनाय आरो जाबोर जोथोर।

हाग्रा-बंग्रा दानसांनयनि जाहोनाव बार-अखाया गोरलैयैनो हा जामहोनो हादों। हानि हासार गोनां सा बाहागोआ बोहैगारलांनयनि थाखाय हाया हासार गोमादों आरो दैमायाव गोबां हाबु जमा जाहैनायनि थाखाय दै बानाया फोजोबसांडारि महर लादों। माखासे आबाद मावनाय हायाव हाद्रिनि रोजा थोरफो जमा जानायलाय आबाद मावनायनि थाखाय उदायै जालांदों।

माथावरि, आथिं लामा आरो रेललामाफोरखौ बिथांखि मतै बानायि आरो गेना थालांनय दैदिहुनना हरनाय आदबानो गुबैयै दै नांथानायनि जाहोन। बेयो आबाद फोजोबसांडो। बेनि अनगायैबो बाराद्राय दै जगायनाया हा सिंनि दै बिखुंखौ (water level) गोजौसिम लाबोयो। बेनि अनगायैबो दै जगायनायनि दैया खफ जायोब्ला हाया बांसिन संख्रि गोबाब जायो।

कल कारखानाफोरनिफ्राय ओंखारनाय गात्रि बेसादफोरनि गेजेराव रासायनारि आरो धातु बेसादफोराबो हानि खहा खालमो ।

गोदान आबाद खान्थि बादियै बाहायनाय रासायनारि हासार आरो रासायनारि एम्फौ सिथारनाय बेसादफोरा हानि जिबियारि बेसादनि खहा खालामो आरो बेनि दाथाइनिबो खहा खालामो । हाया गावनि आंगो गुनखौ खोमायो, दै सोबखांना लानो हाया जायो, हासारा हा सिडव मोनसे गोरा थोरपो सोरजियो, हानि जामनायाबो सोमजियो आरो हाया आबादनि थाखाय उदायै जालाडो ।

जाबोर जोथोराव थानाय गलिलाडि बेसादफोरा हाखौ आबादनि थाखाय उदायि खालामो । बेनि अनगायैबो बेनि गलिनाय बेसादफोरा हा सिडव हाबलांनानै हानि गुनखौ खहा खालामनो हायो आरो गुबुंले जानाय जाबोर जोथोरफोरनि थाखाय हायाबो गावनो बेरामनि फुंखा सोमजिनो हायो ।

#### आबहावा गुबुंले जानाय :

बार, दै आरो हानि जिबियारि आखुथाइफोरनि नाडिबादि सोलायनायखौनो गुबुंले जानाय बुडो । आमेरिकानि नेसनेल एकादेमि अब सायेन्सआ गुबुंलेनि बुंफुरलुखौ बेबादिनो होदों । गुबुंले सोमजिनाया थारैनो मुलुगनि थागिरिफोरनि थाखाय गिदिर सुथुर । मानोना बेयो दाजेमारि जौगाखांनाय, सुबुं हारिनि दावगा खांनाय, सुबुंनि जिउ राहा आरो हारिमुवारि मावखान्थिफोराव हेंथा सोमजिहोयो ।

आबहावा जोबसांलांनायनि गुबै जाहोनानो जादों गुबुंले जानाय । बेखौ दबथायनो हायाब्ला सुबुं हारिनि थाथाइयानो खैफोदाव गोग्लैहैगोन । आथिखालाव बेबादि जागोनखौनो नोजोराव गोग्लैदों । थेवबो बेयो सुबुंनिनो गाव बेरेखा बाथा दि गुबैयै सुबुंआनो गोबांथार गुबुंले सोरजिनानै मुलुगाव बेबादि अनागारि जेंना सोरजिदों । दारिमिन एबा कल कारखानाफोरनिफ्राय ओंखारबोनाय खहायारि लावलाव बेसादफोरनि बोहैलांनाय(Effluent) आरो दिहुनगारनाय बेसादफोरा दैमा, बिलो, फोथार आरो बुंनोब्ला लैथोआवबो गोग्लै हैयो । कल-कारखाना आरो दाजेमारि गारि-गुरा (vehicle) फोरा इन्धन मुवा (Fuel) हिसाबै कयला, पेट्रल, दिजेल एबा मिथिंगायारि गेसफोरखौ बांहोयो । बेबादि जिबि अन्थाइ (Fossil), इन्धन मुवाफोर खामनायनि गोबां बिबांनि सोमजिनाय गेस,

उखुन्दै आरो हांगारफोरा बारनि गुबै गोथार गुननि सायाव गोहोम खोख्लैना बार गुबुंले सोरजियो । बेनि अनगायैबो कल-कारखानाफोरा सोरजिनाय जोबोद खैफोदारि दिहुनगारनाय माखासे बेसाद आरो गोदानै सोमजिनाय रोजा रोजा फोसोजबसांनो हानाय रासयनारि गलायथि (compound)आ आबहावानि जोबरोडि खहा खालामबोदों ।

बिगियान आरो आरोंदायारि बिगियाना जेसेबां दावगाखांदों एसेबांनो सुबुं हारिया मिथिंगानि सायाव गाव गोहोखौ बाहायदों आरो बेबादिनो आबहावाया मैला सोरजिदों । रंजाखुसि मोनाय बेसादफोरखौ दिहुननाय आरोंदायारि बिगियाना ओरैबादि गोहो गोरा जाबोदों दि दिनैनि दिनाव रंजाखुसि मोननाय एबा भग खालामनो हानाय बेसादफोरजों हाथाइ-बाजारफोरा बुंसारजोबदों । दानिया गिलिर कारखानानि मुवा सोलिदों । आबहावा गिज्रा खालामि गुरै कारखाना आरो न'खर शिल्पआ बिजों जेननोगोनां जादों । जिबि-अन्थाइयारि इन्धन मुवाफोरनि खामनाया सानफ्रोमबो बारायलांगासिनो दं, कल-कारखाना आरो गारि-मटरफोरनि अनजिमायाबो सानथ्र'हायि बादि बारायलांगासिनो दं । हाग्रा एवसांनो गोदान गोदानै आबाद मावनो लानायनि जाहोनाव बुहुमाव हाग्रामानि गुबुन गुबुन ओनसोलफोरा सरासनसा जाफेरैबादि खमायलांदों । दै गुबुंनाय, बार गुबुंनाय आरो बाराद्राय हाग्रा एवसांनयनि थाखाय थासारिनि समानथायखौ फोजोबसांनो ।

अनजिमा बांलांनाय सुबुंफोरनो जाग्रा आदार जगायनो गोनां जानायाव मोजां जोलै बांनो हानाय बिद्यानि गेजेरजों गोबां जाग्रा मुवा दिहुननो हानाय जोलै बेगर, रासायनारि हासार आरो एम्फौ सिथारग्रा बेसादफोरनि मददजों जाग्रा मुवाफोरखौ गोबां बिबांनि दिहुननाय जादोंब्लाबो बेफोर हासार आरो एम्फौ सिथारग्रा बेसादफोरा आबहावानि गोबां खहा खालामदों । बेफोरो हानि बानजायग्रा जिबिसा आरो जिबि रासायनारि गलाय बेसादफोरखौ फोजोबसांनयनि अनगायै हानि दाथाइ आरो बिथाखौबो खहा खालामदों, हा सिंनि दैखौ गुबुंले खालामदों आरो दैनि जिबिफोरखौबो फोजोबसांदों ।

दिनैनि बुहुमाव गुबुन मोनसे जेंनाया जादों एसिद अखा । बारनि गुबुंहोग्रा हिसाबै बार मण्डलाव गोसारना थानाय सालफार आरो नाइट्रजेननि अक्साइडफोरा दैखफोरजों लोगो नांनानै रोजा जालांनाय खान्थिनि हेफाजाबै एसिद गोनां

अखानि थरथिं सोरजियो। बेबादिनो बबेबा बबेबा दारिमिनगोबां ओनसोलाव एसिद अखा सोमजिदों, बेयो फसल आरो हाग्रा ओनसोलखौ फोजोबस्राडो।

क्लर'प्लर' कार्बन (Chlorofluoro Carbons; गुसुडै CFC) मुंनि रासायनारि गलायथा मुवाखौ रिफ्रिजारेटर, खानाइयाव फुननाय गाब आरो गुसु गुदुं दबथायनाय आइजेंआव बाहायनाय जायो। बेफोर खहायारि गलायथा मुवा। बारमण्डलनि अजन खलबसिम थानानै बेफोरो बेयाव गिदिर गिदिर माखासे गुदुं खालामनानै गिनाय सोरजियो आरो अ'जन खलबखौबो गोबाब खालामदों। बे खलबा खहा लाबोआरि जोबोद फान्थाव गाबनि सोरां रोदानिफ्राय जिबिफोरखौ रैखा खालामगासिनो दं। नाथाय (CFC)आ मोनसे गिदिर गुदुं खालामनायनि जाहोनाव बे सानरोदाया गोबां फाहामथावै बेरामनि फुंखा सोरजिदों। बेफोरनि गेजेराव मोदोमाव बिगुरनि केन्सार बेरामबो दं।

परमानु आरो निउक्लियास गोहो सोमजिनाय दिहुनगारनाय बेसादफोरखौ निउक्लियास जाबोर जोथोर बुडो। बेयो जोबोद खहायारि। बेयाव रेदिअ' एकटिभ बेसाद (Radio-active elements)थायो। बेफोर जादों आलफा (Alpha) आरो बिटा (Beta) गुन्द्रासा आरो गामा (Gamma) सोरां रोदा दिहुन हरो। बेफोर लाइफां आरो जिबिफोरनि थाखाय जोबोद खहायारि।

बुहुमा गुदुंथार जाखानायादानि मोनसे बयनिखुइबो देरसिन जेंना हिसाबै नुजादों। कार्बन-डाइ-अक्साइड, मिथेन (Mithene), नाइट्रजेन अक्साइड आरो सालफारनि अक्साइडफोरा (Oxices of Sulphur) आरो मोननैसो रोखोमनि गेसखौ "गोथां न' गेस" (Green House Gas) बुंनाय जायो। बेफोरो बुहुमखौ सैजो खालामनो हायि गुसु जानायनिफ्राय रैखा खालामना लाखिदों। बुंनोब्ला बेफोरो बुहुमनि गार दुंनायखौ 15 डिग्रि सेलसियास खालामना लखियो। बेफोर खोबथेग्राबादि हाबा मावनानै दं। थारैनो "गोथां न' गेस" थायामोनब्ला बुहुमनि गर गुदुंआ 30 डिग्रि सेलसियासनि खम जानाय नडामोन। नाथाय बुहुमनां गोथां न गेसनि गुबैयै कार्बन-डाइ-अक्साइडनि बिबांआ दानिया बारायलानायनि थाखाय बुहुमनि थागिरिफोरा गिदिर खैफोदजों मोगा मोगि जानादों। बुहुमा फारियै बांसिन गुदुं जालांगासिनो दं। बे गेसनि गाहाइ फुंखाया जादों कल-कालखाना आरो गारि-मटरआव बाहायनाय

पेट्रल, दिजेल आरो कलया। 1990-95 मायथाइनि गेजेराव बुहुमआव कार्बन-डाइ-अक्साइडनि बिबाडा जौसेयाव 12 फान बारायदों।

सानैसो मुंदांखा बारहावा बिगियानगिरिया इयुन बाथा फोरमायदों दि बुहुमनि दुंनाया फारियै बारायलांबाय थानायनि जाहोनाव माखासे बोसोरनि उनाव मेरु हादर आरो हिमालय हाजोनि खर'आव मुगानि उनाव मुगा थुबुर जानानै थानाय बरफनि दामोलफोरा गलिंलांगोन आरो बेफोरनिफ्राय बोहैना फैन्याय गलिनाय दैफोरा लैथो बिखुंखौ जौगाहोगोन। फिथाइ हिसाबै बुहुमनि गाहाइ बन्दरफोरखौ लैथोनि गुथाला गोजावलांहोगोन आरो लैथो सेरनि ओनसोलफोरा दै लोमगोन। अदेबानि बेबादि गासै जोबस्राडारि खैफोदनिफ्राय बारगनो सुबुं हारिया सांग्रां जादों। थेवबो दानिया गुबुंनायनिफ्राय रैखा मोननो थाखाय मानसिन आखाइयाव गोबां बिगियानारि राहा दं। बेफोरनि गेजेराव जिबिअन्थाइनि इन्धन मुवा, जेरै पेट्रल, दिजेल आरिफोरनि बाहायनायखौ दबथायनाय गोहोनि सोलायनाय (Alternative) दिहुननाय आरो मिथिंगायारि सम्पदखौ ओरैबादि बाहायनांगौ जाहाथे बाहायनायनि उनावबो आबहावानि खहा जाया आरो इयुन जोलैयाबो बेखौ बाहायनानै गाहाम फिथाइ मोननो हायो। दासानदि दारिमिनारि गुबुंनायखौ होखारनो थाखाय आरो गुबुन गुबुन गुबुंनायफोरखौबो होबथानो थाखाय गोदान बाहाय बिगियाना देरहासार जानो हादों। सुबुं समाजा सांग्रां जायोब्लानो हामसिगौ। बेनि थाखाय हादरफोरनि गेजेराव गोरोबथा दानाय जादों। हारिमा आफादफोराबो नांनाय बादि बिहोमा होबोदों।

भारताबो आबहावा गुबुंनायखौ दबथायनायनि बिथिंआव नांनायबादि राहा आखाइयाव लादों। 1974 मायथाइनिफ्राय बे फारसे हादरआ सांग्रां जाखादों। गंफ्रोमबो राज्योआव मोनफायै गुबुंनाय दबथायारि आफाद दानाय जादों। आफादनि आखाइयाव गोबां गोहो दं। जायफोर दारिमिनआ गुबुंनाय दबथायनाय खान्थिफोरखौ गनायना सोलिया बेफोरखौ साजा होनायनि आइनारि गोहो आफादफोरनि आखाइयाव दं। गुबुंनायखौ दबथायनाय बिगियानारि राहाफोरनो गोबां आइन खान्थि, बायदिसिना मावफुंनायनि गोहो होनाय जादों। दाजेमारि सोदोब आरो गुबुन गुबुन दावरावफोरखौ दबथायनायनि थाखायबो सोदोब दबथायनाय (सिमायाव लाखिनाय आरो दबथायनाय)

आइनखान्था 2000 नि गेजेरजों आफादफोरा सोदोब गुबुंनायखौ दबथायनायनि गोहो मोनदों। नोगोरमा आफादफोरनि आखाइयाव नोगोरमा जाबोर जोथोर दबथायनाय मोनसे आइनखान्थि दं। गारि-मटरनि गुबुंनायखौ दबथायनो थाखाय राज्योआरि हान्था-मेला बिफाननि आखाइयाव आइनारि गोहो होनाय जादों।

थारैनो समाजा सांग्रां जायाब्लानो आरो राज्योआरि गुबुंनाय दबथायग्रा आफाद, नोगोरमा आफादफोरा (नोगोरमा निगमजों लाफानानै) आरो हान्था-मेला बिफानाबो गोरबथानि गेजेरजों गोसो होनानै हाबा मावलाडोब्ला इयुनाव थाबैनो भारतनि गंसेबो राज्योआव आबहावा गुबुंनाया मोनसे साननो गोनां जेंना जानानै थानाय नडा।

#### सोदोबथि :

थादेरसा	-	गुदिमुवा
गुबुंले	-	गिज्रा, गुबुंनाय, मैला
सोनारनानै	-	मोनसेया मोनसेनि सायाव बरसा खालामनानै एबा हेफाजाब होज्जलयनानै
फरायसं	-	बिजिरना फराय
दबथाय	-	गादब
थाथाइ	-	थानाय, हालद
सोदाडै	-	गोगो खालामै
हारि	-	हान्जा (class)
उदायै	-	खामानियाव नाडै
अनागारि	-	अननाय गैयि
दारिमिन	-	कल-कारखाना
दाजेमारि	-	आगजुआरि
इन्धन	-	कयला, पेट्रलबादि अर जोंग्रा बेसाद (fuel)
जिबि अन्थाइ	-	हा सिडाव जिबि आरो लाइफांफोरनि सेवनाय सोमजिनाय अन्थाइबादि मुवा (Fossil)

मैला	-	गुबुंले, गिज्रा
आरोंदायारि	-	बाहाय बिगियानारि (technological)
आरोंदाइ	-	बाहाय बिगियान (technology)
बिद्या	-	सोलोंथाइ
फसल	-	फोथाराव मावनाय आबादनि फिथाइ
गलायथा मुवा-	-	गलाय मोनदेर खालामनाय बेसाद (compound)

#### सोंथि :

1. आबहावा होनोब्ला माखौ बुजियो? बेयो मोनबेसे बाहागोनि आरो मा मा? मोनफ्रोमनिबो सुंद' सिनायथि हो।
2. आबहावाया मोनबेसे थादेरसा जथाय? बेफोरखौ बेखेवना लिर।
3. जिबि सोरजिनायनि थाखाय मा मा बेसादनि नांनाय जायो। जिबिफोरा थांना थानायनि थाखाय मा मा थादेरसानि गोनां जायो?
4. जिबि मण्डलाव थानाय लाइफां आरो जिबिफोरनि हारि (community)नि अनजिमाया बेसेबां सावरायना लिर।
5. मिथिंगायारि सम्पदफोर जोबस्रांलांनायनि जाहोनफोरखौ दिन्थिनानै मोनसे सावरायनाय हो।
6. गुबुंनाय माखौ बुडो? आबहावा गुबुंनायखौ दबथायनायनि सोमोन्दै गुसुडै लिर।
7. आबहावा गुबुंनायखौ दबथायनायनि बिथिडाव भारता लानाय राहाफोरनि सायाव मोनसे लिरथाय बानाय।

#### फरा गियान :

बे फरायाव जों आरो जोंनि आबहावानि सोमोन्दै मोजाडै बरनायनाय जादों। आबहावा होनोब्ला माखौ बुंजायो आरो आबहावानि सिडाव थानाय आयदाफोरा मा मा बेनिबो मोनसे मोजां सानसि बेयाव मुंख'नाय दं। जिबिमुलुग, बारमण्डल, दै मण्डल, हा मण्डलफोरा जोंनि आबहावानिनो बायदिसिना थादेरसा। बायदिसिना जाहोनाव जोंनि आबहावाया गुबुंले जायो।

बे गुबुंनाय आबहावा आरो गुबुंनायनि थाखाय बायदि दबथायनाय राहाबो गुवारै होनाय जादों। दानिया बुहुमनि बयबो हादरानो गुबुंनाय दबथायनायाव गावबा गाव बाहागो लादों।

### उफेरा फोरमायथि :

फरायासफोरनो आबहावानि सोमोन्दै गियान होनायनि उनावसो आबहावा गुबुंले जानायनि जाहोन आरो बेनि दबथायनायनि सोमोन्दै मोनथि होनांगोन, फरायसाफोरखौ बिसोरनि आबहावानि आबुं गियान होनायने बेबादि आबहावाखौ सामलायनायनि सोमोन्दैबो फोरोंनांगोन। बुहुमनि गासिबो आबहावानि बरनायथि होनायनि लोगोसे जोंनि ओनसोल, आसामनि आबहावाया गुबुंनायनि जाहोनफोरखौ बिसोरनो फोरमायनांगोन।

### फोरोंगिरिनिसिम :

- (क) फोरोंगिरिया फरायसाफोरनो आबहावानि सोमोन्दै गियान होनांगोन।
- (ख) जोंनि आबहावा होनोब्ला मा मा थादेरसा नांफाना दं बेनि सोमोन्दै बुजायना होनांगोन।
- (ग) सुबुं अनजिमा बांनाय मिथिंगायारि सम्पदनि जोबलांनाय, हा जोबलांनाय आरो आबहावा गुबुंनायनि सोमोन्दै रोखा गियान होनांगोन।
- (घ) जोंनि सोरगिदिनि आबहावानि सोमोन्दै जों माबोरै सांग्रां थानांगोन बेनि सोमोन्दैबो बुजायना होनांगोन।
- (ङ) गुबुन गुबुन ओनसोलनि बायदिसिना आबहावानि गोहोमा माबादियै गोगलैयो बेनि सोमोन्दै फरायसाफोरनो गियान होनांगौ।

## खैफोद राहा

ड० मदन म'हन शइकीया

रा: सो: - मधुराम बर'

### फराखौ सायख'नायनि थांखि :

खैफोद एबा हरखाब जाथाइया गेजेर गेजेर मानसिनि जिउ आरो दोहोन दौलतखौ फोजोबझांबोदों। गिथावबाथाव खैफोद मोनफाया बबेबा बबेबा नोगोर एबा ओनसोलखौ आबुडै फोजोबझांनायनि बिदिन्थि मुलुग जारिमिनाव दं। मानसिया सांग्रां एबा हुसियार जायोब्ला खैफोदनिफ्राय बारगनो हायो एबा बेनिफ्राय जानाय हानि-बिगिनिफ्राय जानाय खहाखौ खमायनो हायो।

दासानदि खैफोदखौ दबथायनाय एबा बेनिफ्राय जानायहानि बिगिनि खमायनायनि थांखियै भारत सरकारा खैफोद राहानि हाबाफारि दाना लादों। फरायसाफोरखौ बेनि सोमोन्दै गियान होनो थाखाय फरा मोनसे लिरनानै फराफारियाव सरजाबनो थाखाय सोलोंथाइ आफादखौ बिथोन होदों। बेनिखायनो बे फराखौ फराफारियाव सोनाय जादों।

### लिरगिरिनि सिनायथि :

ड० मदन म'हन शइकीयानि जोनोमआ जादोंमोन 1935 मायथाइयाव। बिथांआ गुवाहाटी मुलुग सोलोंसालिनिफ्राय मोजाडै एम. ए.नि आनजादखौ उथ्रिनानै बोखावि रासियानि “इनष्टिटुट अब पेट्र'लियाम एण्ड केमिष्ट्रि'निफ्राय 1965 मायथाइयाव मानगोनां डक्टरेट दिग्रिखौ लादोंमोन। ड० शइकीयाया देरादुनाव थानाय अ एन जि सिनि इनष्टिटुट अब रिसार्स एण्ड ट्रेडिनिंआव साननैसो हाबा मावनानै बेनि उनाव ज'रहाटनि ओनसोलारि नायबिजिरसालिनि साखियाव हाबहैयो आरो जिअ' सायेन्स बिफाननि गाहाइ हिसाबै हाबा मावनो लायो। साखिनिफ्राय जिरोन लानायनि उनाव गुवाहाटी मुलुग सोलोंसालिनि आबहावा बिगियान बिफानाव बोसोरथामसिम आलासि फोरोंगिरि हिसाबै हाबा मावो। उननि समाव बिथांआ भारत सरकारनि न'खर बिफाननि सिडव थानाय आसम एडमिनिष्ट्रेटिभ प्टाफ कलेजाव मिथिंगायारि खैफोद राहा मिरुनि गाहाइ फोरोंगिरि हिसाबै हाबा मावो।



गुबै फरा :

1. सिनायथि :

बोहैथि समनिफ्रायनो मुलुगनि गुबुन गुबुन ओनसोलाव बायदिसिना खैफोद सोमजिना फैंदों। खैफोदा बोसोरफ्रोमबो गोबां बेसेन गोसा जिउ, दोहोन दौलत फोजोबस्रांदों। बेफोरनि माखासेया मिथिंगायारि फुंखानि फिथाइ हिसाबै आरो माखायसेया मानसिनि थाखाय सोमजिनाय एबा बानायलु फुंखानिफ्राय सोमजिनाय। बेनिखायनो खैफोदफोरखौ मोननै रोखोमै बाहागो खालामनाय जायो।

खैफोद ( Disaster )

मिथिंगायारि ( Narural )	बानायलु ( Man made )
दै बाना	रेल, बिरखं जाहाज,
बांग्रिं	अनुवारि,
हानि गिसिखानाय	दारिमिनारि, रासायनारि,
खरान	अर, गिनायनिफ्राय
बारहुंखा बायदि	सोमजिनाय हरखाब जाथाइ बायदि

2. भारतनि खैफोदनि हिसाब :

गुबै आखुथाइयारि हा-दै-बार नि आबहावानि थाखायनो आसाम आरो भारता बायदि खैफोदनि थाखाय गाग्लोब जादों। दै बाना खरान, बांग्रिं बारमोदाइ आरिफोरा थाब थाब सोमजिबाय थायो। आरो मब्लाबा फोजोबस्राडारि महर लानानै गोबांथार खहा खालामो। भारतनि गासै हानि कालिया 32,87,263 बर्ग किल'मितारनि जौसेनि 85 बाहागोफ्राम बायदि रोखोमनि खैफोदनि आवथायाव। बेनि जौसेनि 60 बाहागो बायदिसिना ज'खानि बांग्रिं जौसेनि 12 बाहागो एबा 40 निजुत हेक्टर हा दै बाना, जौसेनि 8 बाहागो बार मोदाइ, जौसेनि 2 बाहागो हा गिसिखानाय आरो जौसेनि 18 बाहागो खरान ओनसोल। 1990-2000 मायथाइनि गेजेराव बोसोरफ्रोमबो गर हिसाबै 4,344 मानसि थैयो आरो 30 निजुत मानसि बायदिसिना खैफोदनि बुलि जानाडो। गावारि समाजारि आरो राइजोआरि दोहोन दौलतनि जोबस्रांनाया अखांसहैनाय।

3. खैफोदनि थाखो :

सानफ्रोमबो बारायबोनाय थाब थाब सोमजिनाय खैफोद आरो सुबुं समाज, रांखान्थि, आबहावा बायदिफोरनि सायाव बेनि गाज्जि गोहोमखौ होखारनायनि सोमोन्दै साननानै सुबुं सांग्रांथि बांहोनो थाखाय 1999 मायथाइनि आगष्ट दानाव भारत सरकारा खैफोद होस्रांनायनि राहा खालामनायनि समाव मोनसे गोजौ थाखोनि गोहो गोनां आफाद दादों। बे आफादा खैफोद राहानि सायाव बिथांखियारि बिथिंआव खान्थि बादियै सुस्रांलांनो थाखाय सरकारनो नांनायबादि बिथोन होयो। बे मुंख'नाय आफादा हादर, राज्यो आरो जिलानि थाखोआव गुवार बिथांखिबो आखाइयाव लानो हागौ। जोबथारनायाव दाखालिबावैसो मानसिया सोरजिनाय रासायनारि दारिमिनारि, अनुवारि आरो गुबुन गुबुन खैफोदनि बेलायावबो आफादनि मावनो गोनां खामानिनि बिबांखौबो आरोबाव बारायफिनना होदों। बे गोजौ थाखोनि गोहो गोनां आफादनि गाहाइ बिबाना जादों खैफोद होस्रांनायनि मोनसे हारिमु सोरजिनाय। सुबुं जिउ आरो दोहोन-दौलत रैखा खालामनानै खैफोद राहानि बेलायाव मोनसे गोदान दबथायारि हारिमु दानो थाखाय सांग्रांथि, गोखै गोसो होनाय, नांनायबादि साननाय हनाय आरो थैनायनि अनजिमाखौ होबथानायनि बेलायाव जोंहा गोदानै सानफिननायनि गोनांथि दं।

गोजौ गोहो आफादा ( High power committee ) मोन 30 निबो बांसिन खैफोदखौ सिनायना लानानै बेफोरखौ मोनबा बाहागोआव रानदों :

(क) दै आरो बारहावाजों सोमोन्दो गोनां, जैरै— दै बाना, बारहुंखा, अन्थाइ गोलैनाय बायदि।

(ख) हाया थौआरि दाथाइजों सोमोन्दो गोनां, जैरै— बांग्रिं, अरगें बेरफुनाय हागिसिखानाय, माथावरि बायनाय, खनिआव अर नांनाय बायदि।

(ग) रासायनारि, दारिमिनारि, अनुवारिफोरनि जाहोनाव सोमजिनाय खैफोद।

(घ) हरखाब सोमजिनाय जाथाइनि थाखाय खैफोद, जैरै— हाग्रामा अर, नोगोरआव जोंनाय अर, रेल, अखां जाहाजाव सोमजिनाय जाब्रबथाइ, नाव दुबैनाय, खनि सिडव जानाय दैबाना बायदि।

(ङ) जिबियारि जाहोनाव सोमजिनाय खैफोद, जैरै— मारिख, एम्फौ-एनलानि गाग्लोबनाय, मोसौ-मैसोनि बेराम, जानाय आदाराव बिस सोमजिनाय बायदि।

#### 4. हारिमा गेजेरारि मिथिंगायारि खैफोद खमायनायनि राहा :

खैफोदनि फिथाइ हिसाबै बारायलानाय अनजिमायाव मानसि थैनाय आरो रांखास्थियारि खहा जानायनि खामानिफोरखौ नुनानै 1989 मायथाइयाव हारिमा गेजेरारि आफादा दुलाराय बहुमावनो खैफोद खालामनायनि मोनसे जारिमिनारि थांखि आजावना लायो। बे थांखिखौनो गोनांथि होनानै 1999-2000 मायथाइनि गेजेर बाहागोआव हारिमा गेजेरारि मिथिंगायारि खैफोद खमायनो बे समखौ जिथाइ (decade) हिसाबै गनायना लायो। इंराजियाव बे जिथाइखौनो सुंद'यै IDNDRI (International Decade for Natural Disaster Reduction) बुंनाय जायो।

IDNDRI नि गहाइ थांखिया जादों खान्थियारि हारिमा गेजेरारि बिथांखिनि गेजेरजों गुबैयै दावगाखानो लानाय हादरफोराव मिथिंगायारि खैफोदनि फिथाइ हिसाबै सोमजिनाय सुबुं आरो दोहोननि खहा जानायखौ होबथानाय आरो रांखान्थि-समाजारि दाथाइया जाहाथे बायलाड बेनि राहा खालामनाय जायो।

मुंख'नाय बिथांखिनि गेजेरजों 2000 मायथाइनि गेजेराव बयबो हादरआवनो गाहायाव होनाय बादि देरहासार जानायनि सोमोनदै मोनदांनो हानायखौ मिजिं थिनाय जायो।

(क) मिथिंगायारि खैफोदनि फिथाइ हिसाबै सोमजिनाय खैफोदनि सोमोन्दै गुवार हादरारि बिजिरनाय आरो जौगायारि खामानियाव बेनि गोहोमा माबादि गोग्लैनो हागौ बेनि सुमोनथाइ खालामनाय।

(ख) गोलाउथि सम (Long term) दबथायारि राहा, थियारि आरो सरासनस्रा सुबुंफोरनि सांग्रांथिनि हेफाजाबै हारिमायारि आरो जायगायारि थाखोआव खैफोद खमायनायनि बिथांखि लानाय।

(ग) ग'लकारि हारियाारि ओनसोलारि आरो जायगायारि सांग्रांथि राहा नाजावनाय आरो बेनि गुवारै गोसारनाय।

(घ) गलकारि हारिमायारि ओनसोलारि आरो जायगायारि सांग्रांथि राहा नाजावनाय आरो बेनि गुवारै गोसारनाय।

#### 5. खैफोद राहानि बिबान :

बै दाखालिसिमल' खैफोद राहा सोमोनदै भारतारि संबिजिराव मुंख'नाय जायाखैमोन। राज्यो सरकारनो जरुरि समनि थाखाय बाहायनो हानाय बादियै राडारि मदद होनाय जादोंमोन। मोनफ्रोमबो राज्योआवनो मोनफा खैफोद मदद रां

जमा लायो। मिरु सरकारा बे रांखौ होयो आरो बे मदद रां जमाखौ बाहायनो माखासे नेमखान्थि फोरमायो।

न'खर बिथोन बिफाना गासै जरुरि समनि रां मदद आरो गोसो होनाय खामानिनि गेजेराव सोमोन्दो दानायनि अनगायैबो खैफोद राहानि गासिबो दिगिखौ नोजोर होयो। खरान थासारिनि जेंना सुझानाय (Solution) नि बिबानखौ आबाद मनथि बिफाननो होनाय जादों। गुबुन गुबुन बिथोनबिफाननो गावबा गाव बिफाननि सिडव नुजानाय खैफोदनि जेंना सुझानायनि थाखाय बिबान होनाय जादों (फारिलाइ-1)

#### फारिलाइ—1

खैफोद	बिथोनबिफान (मन्त्रनालय)
मिथिंगायारि खैफोद	न'खर बिथोन बिफान
खरान	आबाद बिथोन बिफान
बिरखं जाब्रबथाइ	बेसरकारि बिरखं बिथोन बिफान
रेल जाब्रबथाइ	रेल बिथोन बिफान
रसायनारि जाब्रबथाइ	आबहावा आरो हाग्रामा बिथोन
जिबियारि जाब्रबथाइ	बिफान सावस्रि बिथोन बिफान
अनुवारि जाब्रबथाइ	अनुवारि (Atomic) शक्ति बिफान

बिगियान दावगानायनि लोगो लोगो मानिसिया मिथिंगायारि खैफोदफोरनिफ्राय जानो हानाय खहाफोरखौ खमायनो बायदि रोखोमनि नाजानायखौ सालायगासिनो फैदों। थारैनो बानायलु एबा मानसिया बानायनाय खैफोदनि जेंनायानो आथिखालाव सुबुं समाजनि सिगाडव गिथाव महरै नुजाफैदों। मानसिया सोरजिनाय खैफोदफोरा दिनैनि मुगायाव फारियै बारायलानाय नुनो मोनदों। थैवबो बेफोरनि फारसे सुबुं हारिया बारा सांग्रां नड। सरासनस्रा मानसिया बेनि फारसे गोसो गैथाराब्लाबो बेनिफ्राय जानो हानाय उनिफिथाइया गिथावबाथाव। बिसोरो गावबा गावनि खाफालखौनो दुसिनानै राहा गैयि थासारियाव थांना थायो। अदेबानि मानसिया बानायनाय खैफोदफोरा सांग्रांथि, हुसियारिथि आरो थि समाव लानाय नांनाय राहाजों गोबां बाहागो खमायनो हायो।

बेबादिनो मिथिंगायारि खैफोदफोरनि फारसे मानसिनि साननायखौ गोसो होथावना। खैफोदनि फारसे बिसोरो मोनसे थि सानसि हमना लायो। थैनाय जिबादि मोनसे नागारथावै मिथिंगानि सिंनि जाथाइ, बेबादिनो खैफोदफोरखौबो बिसोरो गनायना लायो। मिथिंगायारि खैफोदनि सायाव मानसिफोरनि गेजेराव सरासनम्रा गिनाय सोमजियो आरो खैफोदा गिदिर जायोब्ला जोबोद गिखांनाय सोमजियो। थासारिनि गोबां गाज्रि हालद जायोब्ला मोनसे आलाय-सिलाय आरो हमथाहायि हालसाल सोमजियो।

खैफोदनि फिथाइ हिसाबै न'-बां, अफिस, स्कुल कलेज, सावसि फाहामसालि, लामा-सामा फोरबादि जोबोद नांनाय सिबिग्रा फसंथानफोर जोबम्लांलाडे। जाहोनाव समाज राहानि गसिबो खामानिया दिदोम जानानै माबेबाफोर ओनसोलनि रांखांन्थि-समाजारि थासारिया गोख्रै गोग्लै लाडे। गसिबो जौगाखांनाय खामानि-दामानिया थाद'हैनाडे। बेनिफ्राय गुबैयै गोरिब आरो गाहाय-गेजेर थाखोनि रांखाउरि गोनांफोरनि जिउ राहायाव गाज्रियै खहा जायो।

बेबादि गासै समान बिबान थासारिनि सायाव थाथिर गैयि हालसालखौ नागारनो गसिबो राहाखौ खामानियाव गोनां खालामना लाखिनो जोबोद गोरलै आरो बिथांखिनि नांनाय जायो। खैफोदफोरनि नायबिजिरनायाव बेयो रोखा जाखांदों दि, सरासनम्रा राइजोखौ साहसजों आरो नेमखान्थि मथै खैफोदजों मोगा मोगि जानो हानाय बादियै थियारि खालामनो हागौब्ला, जानो हाथाव खहाफोरनि गोबां बिबां खमायनो हायो। नेम बादियै दानाय मावखान्थिनि गेजेरजों सिगांग्रौ बिथांखि बादियै हाबाफारि आखाइयाव लानाया जोबोद गोनां आयदा। नडाब्ला गोख्रै गोख्रै बारायलांबाय थानाय सुबुं अनजिमा, नोगोर मोखां खालामनाय आरो दारिमिन मोखां दानायफोरबादि बाश्राखौ नोजोर होयोब्ला इयुनाय खैफोदफोरा गोबां बिबाडै बाराय लांनायनि जाथावनाया रोखा बेरखांदों। थारैनो दावगाखांनो हमनाय हादरफोराव बे बिथिडव नांनायबादि बिथांखि आरो सरकारि सामलायनायनि आंखाल। बेनिखायनो नोगोर आरो गामि ओनसोलआव थानाय सुबुं थाथिखौबो बिथांखि बादियै महर होनो थाखाय मावथांखि फारि राहा आखाइयाव लानांगौ। बिथांखियारि नोगोर दावगाखांनायखौ न'-बां लुनायावल' सिमा खालामना लाखियाब्लानो गोदान थाथि जायगा दिहुननाय आरो रांखांन्थि-सोमोन्दैयबो सानना नायनांगोन।

1999-2000 मायथाइनि समफारियाव मोननाय गियाननि सोमोन्दै बिजिरनानै इयाक'हामा फोसावलाइ फोसावनाय जादोंमोन। बे फोसावलाइयाव बुंनाय जादोंमोन दि थांनाय मुंजियाव (Decade) मिथिंगायारि खैफोदनि गोहोमा गोबां बिबाडव बारायलांदों आरो दोहोन-सुबुंफोरनि गोबां खहा खालामदों। आथिखालाव समाज राहाया गोबाडै मोनदांगोब्राब जानानै फेदों।

खैफोदनि जाहोनाव गुबैयै दावगाखांनाय हादरनि गोरिब आरो आखल गोनां मानसिफोरानो बांसिन खहा मोननांदों। बेनि नोजोराव बुंनाय जायो दि खैफोदनि थाखाय थियारि जानाय, बेनि खमायनाय आरो दबथायनाय खामानिया खैफोदनि उनाव गोसो हायनायनिखुइ साबसिन। जों गोबां गोलाउयै बेबादि गोसो होनायनि खामानिखौ मानिना सोलिबोदोंमोन। बे खामानिनि राहाया गोबां खरसागोनां आरो दान्दिजोर। होबथायारि खामानिनि फारसे नोजोर रैखाथि होनाय आरो मोनसे जथाइ राहानि नाजानाय जादों। बेनि सोमोन्दै सरकारि नाजावनाय "खैफोद राहा, 20005" नि आइनिनि खोथाखौ मुंख'नो हायो।

## 6. खैफोद राहानि गुदि ( Fundamental of Disaster Management ) :

खैफोद राहानि सोमोन्दै सावरायनो थांनायनि सिगां खैफोदगोनां जाथाइ, जाथावना खैफोद, गोब्राब मोनदांथि आरो खैफोदफोरनि सोमोन्दोआ मा बेनि सायाव बेखेवनायनि गोनां जायो।

हरखाब जानाय खैफोदनि जाथाइ (Hazard) निफ्राय सोमजिनाय खैफोद (risk) आरो दुंखावथाव (vulnerable) थासारियाव थानाय दोहोन-दौलत, सुबुं-जिउफोरनि गोबां खहा जायोब्ला खैफोद सोमजियो। गाहायाव होनाय बुंफुरलुफोरनिफ्राय बे आयदाफोरनि गेजेराव थानाय गोथौ सोमोन्दोनि बागै मोनसे रोखा सावगारि मोननो हायो।

### (क) खैफोद गोनां जाथाइ (Hazard)

बे मोनसे एरैबादि जाथाइ जाय मानसि-दुमसि, बिथायारि सानजथाइ एबा दोहोन दौलतनि थाखाय गिनाय सोरजिनानै खैफोद लाबोनो हायो। बांग्रिं, दैबाना, खरान, मारखि, रेल, बिरखंफोराव जानाय हरखाब जाथाइफोरा खैफोद गोनां जाथाइनि मोननैसोबिदिन्थि। मोनफ्रोमबो बेबादि जाथाइया खैफोद जानो हाया जेब्लासिम बेनि जाहोनाव गोबां खहा सोमजियो।

(ख) जाथावना खैफोद (risk)

जायखि जाया जायगायाव माबा मोनसे थि बिबांनि हरखाब जाथाइनि जाहोनाव जानो हाथाव खैफोदनि गाज्जि फिथाइ आरो खैफोदनि बिबांआ सोनारो खैफोद गोनां जाथाइनि आखु, दोनद्लाबायनाय आइजें आइला आरो बेफोरनि बेसेननि सायाव ।

(ग) दुंखावथावनांथि (vulnerability)

मोनसे खैफोदनि फिथाइ हिसाबै मा बिबां एबा हिसाबाव दोहोन दौलत, समाज खहा, बिथायारि सानजथाइ, सिबिनाय खामानि (Service) आरो भुमलुआरि ओनसोलनि जानो हानायखहा एबा सोमोन्दो गोमालांनायानो दुंखावथावनांथि होनना बुंनाय जायो ।

मोनदांगोब्राबथिया मोननै बाहागोनि, जेरै— सोलेरारि मोनदांगोब्राबथि आरो रांखान्थि समाजारि दुंखावथावनांथि ।

सोलेरारि दुंखावथावनांथिया (Physical vulnerability) सोनारो मानसिनि थानाय जायगा आरो आइजें-आइला, जेरै— न'-बां, बिथायारि सानजथाइ आरो खैफोदारि जथाइनि फुंखानि खाथिनि सायाव । बिदिन्थि महरै जायफोर मानसिया दैबानानि गोहोमाव गोग्लैनाय ओनसोलाव थायो बेबादि मानसियासो दुंखावथावनांथि जायो । बेबादिनो सोलेरारि दुंखावथावनांथिया सोनारो न'-बां आरो बिथायारि सानजथाइ लुनायाव बाहायनाय आखाइजों मावनाय आदबनि सायाव जाय खैफोदनि समाव सोमजिनाय गोहोखौ बादा होनो हायो ।

रांखान्थि समाजारि दुंखावथावनांथिया (Socio-economic vulnerability) सोनारो खैफोदनि समाव सरासनस्रा राइजो आरो आबहावाया मा बिबाडै गोहोमाव गोग्लैयो बेनि सायाव । सिगां बे आयदानि बारा गोसो होनाय जायाखैमोन । नाथाय मोनसे खैफोदनि समाव न'-बां, दोहोन-दौलत, बिथायारि सानजथाइ आरिफोर जोबस्रां लांनायल' नड, बेनि जाहोनाव रांखान्थियारि थासारियाबो जोबस्रांलाडो ।

रांखान्थि-समाजारि दुंखावथावनांथिखौ नायबिजिरनानै दोहोन दौलद, न'-बां जोबस्रांनायनि जाहोनाव बेसेबां बिबांनि रांखान्थियारि खहा जाखो बेनि

हिसाब लानाय जायो । रांखान्थियारि खहाखौ मोननै रोखोमै थि खालामनाय जायो । सेथियाव जोबस्रांलांनाय न'-बां, दोहोन दौलद बिथायारि सानजथाइफोरनिफ्राय जानाय रांखान्थियारि खहाखौ थोंजों दिहुननाय । नैथियाव, दिहुनथाइ, साखि-बाखि, गोनां सिबिग्रा फसंथानफोरा बन्द जानायनि थाखाय खेंस्तायै खहानि बिथिडव रांखान्थि समाजारि दुंखावथावनांथिनि बिबांखौ दिहुननाय जायो ।

बेनि थाखायनो खैफोद राहानि खान्थियारि हाबाफारिखौ नाजावना लानाया जोबोद गोनां । बे बिथिडव गाहायाव होनाय आयदाफोरनि सायाव फरायबिजिरनो (study) हानाया जोबोद गोनांथार ।

**7. खैफोद माखौ बुडो ?**

खैफोद माने हरखाब सोमजिनाय जोबोद गिलु बालु उनफिथाइ (effect), जायनि थाखाय सुबुं जिउ, बिथायारि सानजथाइ, रांखान्थियारि थासारि आरो आबहावाया गोबरै हेंथा मोनो । खहा खैफोदा एरैबादि गोबां दि बेबादि थासारिखौ सामलायनो थाखाय सुबुं एबा समाजहा गावनि गोहो थाहैया ।

**8. खैफोदनि आखुथाइया मा ?**

(क) सिगां हमदांनो हाया ।

(ख) सानफ्रोमनिबो जथाइ नड ।

(ग) हरखाब सोमजिनाय एबा गोखै खारसारि ।

(घ) जरुरि थासारि सोरजियो ।


(ङ) थिरांथा गैयि ।

(च) गिथाव महर ।

**9. खैफोद राहानि सोरगिदिं सिमा ( circumference ) :**

खैफोद राहाया आथिखालाव जथाइयै खैफोद सोमोन्दै खामानि दामानिफोरखौ सरजाबना लायो । सरासनस्रायै मानसिया खैफोद राहा होनोब्ला खैफोदनि उननि समाव बिगोमाफोरा लानाय मदद एबा दाफिननाय खामानिखौल' बुजियो । बुंनो थाडोब्ला खैफोद राहाया सरजाबना लानाय दुब्लिनि बेंखननि सोरगिदिं सिमाया आरोबाव गुवारसिन । गाहायाव मुंख'नाय खैफोद राहा साखानिफ्राय बे खोथाया रोखा जानानै फैयो ।

## 10. खैफोद राहा खहा :



## 11. खैफोद राहाखौ मोनथाम खलबाव राननाय जायो :

(क) खैफोदनि सिगां लानाय (Pre-disaster phase) राहाफोरा, जैरै— सांग्रंथि बारायनाय, फोरेंथाइ, बिथांखि आरो फोसाव दावबायनाय (Publicity expedition) ।

(ख) खैफोदनि समाव (Impact phase) लानाय राहाफोरा, जैरै— जरुरि, रैखाथि, गिबि मदद (Fiest Aid) होनाय, जानाय बेसाद, मुलै मालाम आरो गुबुन गुबुन नांनाय बेसाद जगायनाय ।

(ग) खैफोदनि उनाव (Post-diaster) लानाय राहाफोरा जादों गोखै आरो फिन गायसननाय (Rehabilitation), सिगांनि मोनबां दुंखाथावनांथि थासारिया जाहाथे सोमजिफिना बेनि थाखाय नाजानाय ।

थांनाय मोननै जिथाइयाव खैफोदनि अनजिमाया गोखै गोखै बारायलांनाय नुनो मोनदोंमोन। बेनि थार जाहोना जादों थाब थाब बारायनाय सुबुं अनजिमा

नोगोरमोखां खालामनाय आरो दारिमिन गायसननाय बादि जाहोनफोरखौ नोजोर होयोब्ला मोननो हानाय गोबांथार दुंखावथावनांथि थासारिनि जोनोमा गिदिर बांग्रिं मावनायाव न'-बां, बिल्दिं, दालां आरो गुबुन गुबुन बिथायारि सानथाइफोर जोबसां लाडो। जाउनाव राजबाख्रिनि दोहोना खरसा जायो आरो समनि मावनांगौ दावगाफु खामानियाव हेंथा फैयो। बेनि गाहाइ जाहोना जादों सिगां खैफोदखौ जुनिया हिसाबै गनायना लानाय जादोंमोन, जेराव सरकारनि अनगायै गुबुन गुबुन आफाद (Organisation)फोरा जरुरि समनि बायदिसिना मदद होना नै बेनि सायाव गोनांथि होबोदोंमोन। नाथाय रांखान्थि-समाजारि आयदाफोरा आरो बेनि गोलाउ समारि गोहोमनि सोमोन्दै साननाय जायाखैमोन। सुंद'यै बुंनो थाडोब्ला खैफोदफोरखौ जरुरि समनि थासारि हिसाबैसो गनायना लादोंमोन। उरिष्यानि गिदिर बारमोदाइ बारनाय आरो गुजराटनि फोजोबसाडारि बांग्रिं मावनाय बेबादि सानस्रिनिनो आबुं सोलायनाय लाबोदोंमोन। बेबादि खैफोदफोरनि रांखान्थि-समाजारि गोहोमनि सोमोन्दै गोथौ बिजिरनानै बिगियानारि, आरोंदायारि (Craftmanship), रांखान्थियारि आरो समाजारि दिगिफोरखौ सरजाबफानानै राहा दानाय खामानिखौ गोबां ओंथि गोनां आरो सेंहोना थाखाय सरकारा गोदान बिथांखि नाजावना लादों। दानिया जरुरि समनि थासारिखौ सुस्रानायनि अनगायै खैफोद राहानि गुबुन गुबुन दिगिफोराबो गोनांथि मोनगोन। बे नाजानाया दाउगाखाडारि मावखान्थिनि मोनसे बाहागो हिसाबै गनायथि मोनोब्ला हेंथा गैयि दावगाखांनाया जाफुंसारगोन।

## 12. खैफोद राहानि बुंफुरलु (Defination) :

खैफोद राहाया लारिसे खामानि दामानिनि जथाइ। बेजों खैफोद आरो जरुरि समनि थासारि दबथाइनानै आरो मदद जगायनानै खैफोदाव गोगलैनाय मानसिफोरखौ रैखाथि होनो आरो खैफोदनि आखाइनिफ्राय बोखांनो हायो। खैफोद राहानि हेफाजाबै खैफोदनि सिगां, खैफोद जाफुनाय समाव आरो उननि थासारिखौबो सुस्रानो हायो।

## 13. खैफोद राहानि थांखिया मा ?

(क) सुबुं समाज आरो गासै हादरा मोगामोगि जानो हाथावना दोहोन,

सुबुं, सोलेरारि खहाखैदांनि बिबांखौ सेंहोनाय एबा बेनि आखाइनिफ्राय आबुडे बोखांनाय।

(ख) गावारि दुखु दाहा खमायनाय।

(ग) रैखाथि खालामफिननायाव गोख्रैथि लाबोनाय।

#### 14. खैफोद राहानि गुबै थादेरसाफोर :

सासे खैफोद राहा खालामग्राया जेब्ला थार देरहासारनायखौ लुबैयो, अब्ला गाहायाव मुंखनाय खामानि खान्थिफोरखौ मदद हिसाबै लानांगौ।

(क) जाथावना खैफोद राहा।

(ख) खहा-खैदां खालामनाय।

(ग) खैफोद दबथायनाय।

(घ) समानै मदद होनाय।

(ङ) सम्पद जथायनाय राहा।

(च) गोहोम आरो होखारनाय।

#### (क) जाथावना खैफोद राहा ( Risk Management ):

बेनि सिडाव दं जाथावना गिनाय एबा जानो हाथावना खैफोदफोरखौ सिनायनाय आरो जाथावनाखौ थि खालामनाय। बेबादि खैफोदनिफ्राय सरासनस्रा सुबुंनि सायाव माबादि गोहोम गोलैनोहागौ बेखौ थि खालामनाय लोगोसे मा राहा खालामोब्ला खैफोदखौ खमायनो हायो बेबादियै खामानिखान्थि मावनो नाजावनाय। मिथिंगायारि खैफोदनि जाथावना खैफोद राहानि थाखाय गाहायाव होनाय आयदाफोरखौ बिजिरफिननांगौ—

1) खैफोदफोरनि मानसावगारि एरनाय

2) दुंखावथावनांथि ओनसोलनि मानसावगारि एरनाय

3) जाथावना खैफोद-खैदांनि हिसाब लानाय, जेरै— न'-बां आरो गुबुन गुबुन बिथायारि सानजथाइ जोबस्रानाय, आबादफोर खहा जानाय बिथायारि सानजथाइ (जेरै— लामा-सामा, दालां, जौब्लावारि, गारि-गुरा बायदि)नि खहा।

#### (ख) खहा-खैदां खालामनाय ( Loss Management ) :

खैफोदनि थाखानाय सुबुंजिउ, बिथायारि सानजथाइ आरो रांखान्थियारि हालद जोबस्रानानै गोबां खहा-खैदां सोमजियो। खैफोदनि सिगां आरो उनाव

खैफोद होबथा राहा खालामनाय, जाहाथे खहाफोरा जोबोद खम जायो। बेनि बेलायाव खैफोदनि सिगां लानाय राहायानो बयनिखुइ साबसिन खामानि राहा होनना साननाय जायो। बेबादि खामानि राहाफोरनि गेजेराव गोग्लैयो—

1) न'-बां लुनाय दाथाइफोर बादि खामानिफोरखौ खैफोद होबथायारि बादि गोरा बानायनाय।

2) न'खरनि मानसिफोरखौ आरो खैफोद सोमजिनो हानाय जायगायाव थानाय ओनसोलफोरनो गोजौ थाखोनि रैखाथि होनाय।

3) खैफोद राहाफोर गोबां आरो बाहायनाय महराव लानाय।

#### (ग) खैफोद दबथायनाय ( Control of events ) :

मोनसे खोथाखौ गोसोआव लाखिनाया मोजां दि खैफोद राहायाव खैफोद दबथायनाय खामानिखौ खैफोदनि समाव आरो जरुरि सम थासारिनि उनाव लानाय जायो। अदेबानि खैफोदनि उनाव गोसो होनायनिखुइ खैफोदनि थासारिखौ सिगांग्रो दबथायनाया साबसिन। बेनि थाखायनो हाबाफारिफोरखौ लानो नांगौ—

1) जानो हाथाव खैफोद, बेनि जाहोन आरो गोहोमनि सोमोन्दै थिरांथा लानांगौ।

2) खैफोदजें मोगामोगि जानो हाजासे बिथांखि आरो खामानि राहा खालामनाय, जाहाथे थि समाव नांनाय राहा खालामनो हायो।

3) राहा नाजावनायाव गोबाव जाब्लाबो खैफोदनि बिबाडा बांलांगोन आरो दबथायनाया गोब्राव जाहैगोन। जाउनाव खैफोदाव गोग्लैनाय मानसिफोरनि दुखु दाहाया आरो गोबां जाहैगोन। गोख्रै गोसो होनायासो थि समाव होनाय मददा बयखौबो मिजिं आरो थुलुंगा होनाया नांगौबादि साननायजें बयबो गावबा गाव नांनायखौ गावनो आबुं खालामनो हायो। गोसो होनायाव गोबाव जायोब्ला गोरोन्थि साननाय आरो गोसो उसु-खुथु जाखांनायावनो थासारिया आरोबाव गोबां गुलाय-गुजाय आरो मिजिं गोमानाय थासारि सोरजिनानै होयो। बेबादि हालदाव गोग्लैना मावथारनांगौ जानायाव गुबुन राहा लानांगौ जायोब्ला गावनो लुबैयि राहाखौसो नाजावनो गोनां जाहैयो।

4) खैफोद राहानि फारसे सांग्रांथि बारायनो थाखाय सोमोन्दो गोनां फसंथान आरो आफादनि मदद राहाजों सोमोन्दो थानाय बिबानगिरिफोरा मोनसे खान्थिबादि थि खालामखानाय आरो थामथिम आदबजों आवगायलांगोन।

#### (घ) सम्पद मदद राननाय (Equity of assistance) :

गासिबो खैफोद मददखौ गाव फारसे सानालासे आरोनांनयबादियै मोनदां हानाय जानांगौ। खैफोदाव गोग्लैनाय मानसिफोरनो समान हिसाबै आरो मोजाडै आखु बाहायनायखौ थिरां खालामनाया खैफोद राहानि मोनसे गोनां बाथ्रा।

बेयो बेनि थाखायनो गोनां दि हादरारि थाखोनि बायदि सानसिनि मदद होग्रा आफादफोरा बिसोरनि सामलायगिरि आरो मदद होग्राफोरनि फारसे दायनिगिरि जानानै मदद बेसादफोरखौ राननायाव खम-गोबां एबा गेदेर उन्दै खालामनो हाया।

नांनयबादि मदद आरो दाफिननाय मदद राननाया गुबै खान्थि जानांगौ। जाहाथे खैफोदाव गोग्लैनाय मदद होग्रा हान्जानिफ्राय नांनयबादि आसार आखु मोननो हायो आरो मदद बेसेन मोननाया गोरलै जायो।

#### (ङ) सम्पद राहा (Resource Management) :

खैफोदनि उनव बेरेखा थासारिखौ फोजोबनो थाखाय बायदिसिना सम्पदनि गोनां जायो, जेरै— गंसे क्रेइन (Crane), एसकाभेटर, एम्बुलेन्स, दाक्टरफोर। नाथाय बेफोर बेसादा सरासनस्रा जमा थाया। बेनिखायनो खैफोद राहाया खैफोद सोमजिनाय समनि गोसो होनायनि बेलायाव मोनसे गोब्राब आयदा। सम्पदफोरखौ जाहाथे थाबैनो मोननो हायो बेनि थाखाय सिगां बिथांखि दानायनि गोनां जायो।

#### (च) गोहोम खामायनाय (Impact Reduction) :

खैफोदआ मानसि बिथायारि सानजथाइ आरो रांखान्थियारि थासारिनि सायाव इयुन गोलाउ गोहोम खोख्लैनानै दोनलाडो। थार बाथ्रायाव बेयो सासे सुबुं एबा मोनसे न'खरखौल' फोजोबस्राडो बे नडा, बेयो गासिबो समाजखौनो लोरबां खालामना दोनलाडो।

खैफोदा गंसे हादरनि गासैबो दावगाखांनय खामानिखौ गाज्जि हिसाबै खहा खालामनो हायो। खैफोदनि गोहोमा सुबुं एबा समाजनि सायाव जाहाथे

खमथार जायो बेनि सायाव नोजोर होनाया मोजां। खैफोदजों गाग्लोबजानाय गंसे हादरनि थाखाय खैफोद राहानि खामानिखौ बेबादियै फोजोबनांगौ जाहाथे रैखाथि खालामफिनांगौ खामानिखौ गोख्रै राहायै मावफुंनानै हादरनि गासै दावगाखांनयाव बिहोमा होनो हायो।

#### 15. खैफोदनिफ्राय रैखा मोननाया जाथावना जानो हायो ना ?

सरासनस्रा राइजोखौ साहस आरो थामथिम राहायै खैफोदजों मोगामोगि जानो हाजासे सिगांग्रो थियारि खालामनो हायोब्ला, बेनि जानो हाथाव खहा खैदांखौ गोबां खमायनो हायो। बेयाव बांग्रिं मावनायनि सोमोन्दै बुंनय जादों। मानोना बेयो हादरखौ जेबो इसारा होवाब्लानो फैयो आरो मोनफा जायगाखौ सिलिंखार खालामनो हानाय गोबां गोहोनि बिगोमा। बांग्रिं मावनायजों सोमजिनाय खहा खैदांनि महरआ जायगा लायै लायै जोबोद गिथाव बाथाव आखुनि। बिदिन्थि महरै, 2001 मायथाइनि बांग्रिं मावनायनि जाहोनाव 14,000 मानसि थैदोंमोन आरो सा जि लाखनिबो बांसिन न'-बां जोबस्रादोंमोन आरो 15 रोजा कौटि रांनि दोहोन दौलत खहा जादोंमोन।

आसाम आरो सा-सानजा भारता गोहो गोरा बांग्रिं मावग्रा ओनसोल। सा-सानजा भारता गुबैयै आल्पस-हिमालय बांग्रिं बेंखननि सिडाव। जारिमिनआ मोनस'नो हानाय सम-फारियाव सोमजिनाय 1548, 1596, 1601, 1642, 1663, 1696, 1756, 1772, 1838 आरो 1841 मायथाइनि बांग्रिं मावनाय जाथाइफोरा गुबैयै मुंख'थावना। बेयाव थांनय जौ बोसोरनि गेजेराव माखासे गिदिर गिदिर बांग्रिं मावनाय सोमजिदोंमोन। बेफोरनि गेजेराव सोमजिनाय 1897 आरो 1950 मायथाइनि बांग्रिं मावनाया मुलुगनि गेजेराव दासिम सोमजिनाय गिदिर गिदिर बांग्रिंनि फारियाव गोग्लैयो। बे मोननै बांग्रिं मावनाया सानजा आसाम आरो सोनाब आसामनि बायदि रोखोमनि गोबां खहा खालामदोंमोन। 1950 मायथाइनि बांग्रिं मावनायाव बुरलुंबुथुर दैमानि दै बोहैग्रा ओनसोलाव गोबां सोलायनाय लाबोदों। आसामाव दासान्दि थाब थाब दै बाना जानायनि गुबै जाहोनाबो बे बांग्रिं मावनायनिनो उनफिथाइ। बांग्रिं मावनायखौ होबथानो हाया आरो बेनि सोमजिनायनि सोमोन्दैबो जेबो सिगां गुमुर मोननाय जाथावना नडा। नाथाय बेनि फोजोबस्रांनयखौ एसेब्लाबो खमायनो हायो। बेनि थाखाय माखासे राहा लानो नांगोन। बेफोर राहाफोरखौ गुबुन गुबुन खैफोदनि बेलायावबो बाहायनो हायो।

**बांग्रिं मावनायजों लोब्बा गोनां जेंना :**

- (क) न'-बां लुनाय बिथायारि सानजथाइ फोजोबस्रानाय
- (ख) अर नांनाय
- (ग) मानसि आरो गुबुन जिबजिबि थैनाय आरो जखम
- (घ) दैबाना सोमजिनाय, दैमानि बोहैनाया सोलायनाय
- (ङ) हान्था-मेला, टेलिफ'नआरि सरजाबनाय राहानि फैमाल
- (च) जाग्रा बेसाद, लोंग्रा दै, जोंब्लावरि गोहो जगायनाय, मुलि-

मालामनि आंखाल।

(छ) आइन कानुन सालायना लाखिनाय, सुबुडारि राइजोआरि दोहोन दौलत रैखा खालामनाय।

- (ज) गिबि मदद होनानै सावस्रि लाहोनायनि राहा
- (झ) जरुरि रैखाथि बादानि (Shelter) राहा
- (ञ) गियान आरो बांसावनाय सोमजिनाय

**बांग्रिं मावनायनि सिगां मा मावनाया गाहाम ?**

1. खैफोदगैयि लुनायखान्थि बाहायनानै स्कुल, कलेज, सावस्रिसालि, सिनेमा हलफोरखौ गोख्रोडै दानाय थांखि लानांगौ।
2. हागौमानि लोरबां आरो गोजाम नफोरखौ सिफायना गोख्रों खालामनायनि राहा लानांगौ।
3. जेसेबां हाथावना गिदिर आरो गिलिर बेसादफोरखौ रेकफोरनि सिंनि थाखोआव लाखिनो नाजानांगोन।
4. गिरिल आलमारि, बिजाबनि केबिनेटफोरखौ इनजुराव गोरायै गाजोल दोना लाखिनांगौ।
5. गेजेर गेजेर गावनि न'खराव बांग्रिं मावनायनि सोमोन्दै सावरायोब्ला न'खरनि मानसिफोरनि गेजेराव गिनाया खमाय लांगोन।
6. न'खरनि दायनि बिबानगिरि सुबुंआ जोंब्लावरि, दै, गेसफोरनि सोलिनायखौ माबोरै बन्द खालामनांगौ बेफोरखौ मोजाडै मोनथिना लानाया गाहाम।

7. बेटारि गोनां रेडिअ' लाखि, जाहाथे खाथि-खाला मा जाथाइ जादों बेखौ मोनथिबाय थानो हायो।

8. अर खोमोरग्रा फायर ब्रिगेड फाइखि हान्जानि मावखुलि (Office)आ बबेयाव दं आरो बेनि फन नम्बरखौ मिथिनानै लानांगौ।

9. लोंनाय दै, एसे बिबांनि जाग्रा मुवा, गिबि मददनि थाखाय नांनाय मुलि-मालाम, दिरं, टर्स लाइट, सिफ्रां, बेलसा आरि आगजुफोरखौ जमा लाखिनांगौ।

**बांग्रिं मावबाय थानाय समाव मा खालामनाया गाहाम ?**

1. सेथि सुबुरना जादों गोसो हमथानानै थाथिरै था, साहस बुथुम आरो गुबुनफोरनोबो साहस हो, गिनाड-सोमखि नाड।

2. थाथिरै थानानै थासारिनि गुमुर लानो हायोब्ला जाथावना खैफोदनिफ्राय रैखा मोननो हायो।

3. बांग्रिं मावनाय समाव माब्लाबा गिदिर सोदोब खोनानो मोनो। बिदिन्थ महरै, 1950 मायथाइनि बांग्रिं मावनाय समाव बेबादि सोदोब खोनानो मोनदोंमोन। बेबादि सोदोबा सोमजियो हा खलबनि मावनाय एबा हा गिसिखानायनि थाखाय। बेबादि सोदोब खोनायोब्लाबो जेब्लाबो गिनाड।

4. न-बां जोबस्रालानाय, आयनाफोर बायना गोग्लैनाय एबा गुबुन बेसादफोर गोजौनिफ्राय गुगाना गोलैनायनि थाखायबो सोदोब सोमजिनो हागौ। नाथाय गोसोआव लाखिनाया गोनांदि जेब्लासिम मोदोमाव माबा मोनसे गुगाना गोग्लैया बेसिम बांग्रिं सोमावनाया जेबो खहा खालामा। न' सिडाव थायोब्ला गुगाना गोलैनो हाथाव बेसादनिफ्राय सांग्रां थानो नांगौ।

**न' सिडाव थायोब्ला :**

1. न' सिडाव थानायानो साबसिन। बाग्दावखांना न सिंनिफ्राय ओंखारबोनो नागिरोब्ला खैफोदखौसो नाजावना लानाय जागोन। लासै सहायनायजों गोजोनै ओंखारबोनानै खैफोद गैयि जायगायाव थाहैनो नाजानांगौ।
2. गोरा आरांगा एबा देक्सनि सिडाव थानांगौ।
3. एमाव थायोब्ला एमनि सिडावनो जिरायनांगौ, जेब्ला एमखौ गोख्रों मोनो।
4. न'नि बबेबा मोनसे खनायाव आस्रय लानांगौ। दरजानि सौकाथनि सिडावबो आस्रय लाजायो।



5. गेजेरनि इन्जुरनि खाथियाव थानो हानाया गाहाम।

6. आयना, आयना लागायनाय खिरखि एबा दरजानि खाथियाव थानाड।  
आयनाफोर बायना जखम जानो हागौ।

7. गोजौ बिजाबनि केबिनेट, आलमारि बायदिफोरनिफ्राय गोजानाव थानाया गाहाम, मानोना बेफोर गोलैना नै नारसिननोब्ला जखम जानाय एबा थैनायनि गिनाय थायो।

8. ममबाधि, अर-सलाइ, एबा माबाफोर लांदां अर बै समाव बाहायनो नाड। मानोना, गेसा लिक थायोब्ला अर नांनायनि गिथावना थायो। बेनिखायनो टर्च लाइट बाहायनांगौ।

9. बै मोनसे जाहोनावनो बे समाव जोंब्लावरि आरो संग्रा गेसनि बाहायफुनायखौ गोखैयै बन्द खालाम नांगौ।

10. खर' आरो मोखांखौ कम्बल एबा गुबुन रोजा सिजों एबा जायगायावनो थाबै मोननाय बेसादजों खोबना लाखिनो हायोब्ला जखम जानायनि जाथावनाया सेंलांगोन।

11. उननि बांग्रिं मावनायफोरनि थाखायबो सांग्राडै थानांगोन। मानोना मावनायफोरा गोबार नडब्लाबो गात्रिं हिसाबै खहा जानाय न'-बांफोरा बेनि थाखायनो बायना गोग्लैलांनयनि गिनांगौ थायो।

**न'नि बायजोआव थायोब्ला :**

1. न' सिडव फैनाड।

2. गोजौ न देवाल, जोंब्लावरि खुन्थियाफोरनिफ्राय गोजानाव थानाया गाहाम।

3. खाथियाव लांदां जायगा थायोब्ला बैसिम थानो नाजानाया गाहाम।

4. मावनाया जोबागौमानि बायजोआवनो थाथनाया खैफोद गैयि।

5. सोलिबाय थानाय गारियाव थायोब्ला गारिखौ लाखिनानै बेनि सिडवनो थानांगौ। मानोना गारिनि साखाया मावनायखौ खमायना लाखिनो हायो।

6. गारिखौ जेब्लाबो दालां एबा अभारब्रिजनि सायाव लाखि नाड।

7. गोबां मानसि थानाय जायगायाव खारदाला-खारसि खालामोब्ला गुबुन मानसिफोराबो बेबादि खालामनो नाजागोन आरो अब्लानो नारद्ला नारद्लिया बांनानै मानसिफोर थैनो हागौ।

**बांग्रिं मावनायनि उनाव मा मावनांगौ ?**

1. अथिर जायाब्लानो गोजोनै थानांगौ।

2. जायगा नायदिंनो ओंखारलांनो नाड।

3. ट्रेनजिष्टर एबा रेडिअ'नि गेजेरजों जोबथारनायनि थासारिनि सोमोन्दै बुजिनो नाजानांगौ।

4. गात्रिं रोखोमै जोबसांलांनय न'निफ्राय गोजानाव थानांगौ। गिदिर बांग्रिं मावनायनि उनावबो बेफोर न'आ आबुडै बायफिनना गोलैलांनो हागौ।

5. खैफोद गैलिया होनासिम न' सिडव हाबलां नाड।

6. न'नि दै जोंब्लावरि, गेसफोरनि तारनि सरजाबनायखौ आनदाज लायागौमानि बाहायनो नाड।

7. जरुरि जाउनावसो टेलिफ'न बाहायनांगौ।

8. बांसावनाय रादाबखौ फोथाय नाड एबा बेबादि रादाब फोसावनाया गाहाम नड।

9. अर नाडोब्ला बाहेरनिफ्राय फैनाय मददखौ नेयाब्लानो दै, हाद्रि, हाबुनि हेफाजाबै अर नांनायखौ खोमोरनो नाजानांगौ। अर खोमोरनो हायाब्ला खाथिनि अर खोमोरग्रा फायार ब्रिगेदखौ खबर होनांगौ।

10. सोरनिबा मोदोमाव अर नाडोब्ला जेबो मावनो गैया साननाड। हानायसिम हेफाजाब होनांगौ।

11. संग्रा गेसा माबोरैबा ओंखारनाय (लिक जानाय)नि गुमुर मोनोब्ला खिरखि खेवना होनांगौ। गेस दिहुननाय गाहाइ सुइसखौ बन्द खालामना होना नै बायजोआव ओंखारबोनाया गाहाम। गेस रानग्रा एबा फायार ब्रिगेदिनि हेफाजाब लानानै न'आव हाबफिननांगौ।

**सोदोबथि :**

बानायलु - मानसिनि थाखाय सोमजिनाय मानसिया बनायनाय (artificial)

बुलि- मोदाइनि मुडै जिबि बाउनाय

अखां सहैनाय - बांद्राय

जिथाइ- जि बोसोरनि जथाइ (decade) मुंजि

बेसेनथि - बेसेन एबा मुलाम्फा थि खालामनाय (evaluation)  
 बिरखं - अखां जाहाज (aircraft)  
 गेजेर थाखोनि रां-खाउरि गोनां- दोहोनि आरो गोखिबनि गेजेर थाखोनि  
 (middle class)  
 समान बिबान - थासारिनि समानथाइ, बेजों बे सोनारना सोलिनी हानाय  
 थासारि  
 नोगोर मोखां खालामनाय - गामिखौ गोदानै नोगोर बादि दानो लानाय  
 दारिमिन मोखां दानाय - गोदान गोदानै शिल्प उद्यग गायसननाय  
 सुबुं थाथि - मानसि थानाय, मानसि जनाय जायगा (inhabitation)  
 मावथांखियारि - खामनियाव फैनय (effective)  
 बिसावराय - सावरायना नायफिन (to review)  
 समाज राहा - समाज सोलिनाय खान्थि (social management)  
 बिथायारि सानजथाइ - माबाफोर दिहुननो थाखाय लुनाय फसंथान  
 (infrastructure)  
 सुमोनथाइ - बेसेनथि (evaluation)  
 जरुरि - हरखाब गोनांथि (emergency)  
 आरोंदाइ - आखाइजों मावनाय शिल्प (craftsmanship)  
 खैदां - आफोद  
 गावारि - सासे मानसिनि (personal)  
 आखु बाहाय- मोजां आखु आसार दिन्थि  
 इयुन गोलाउ - इयुननि गोबावसिम गोसारना थानाय, इयुन गोसारनरि  
 (long spreading)  
 गिबि मदद - गिबि राहा (first aid)  
 रैखाथि जायगा - आश्रय जायगा  
 बांसावनाय - नंखाय फोसावनाय (rumour)  
 बुहुम हारिमा गेजेरारि आफाद - बुहुम हारिफोरा बुहुमनि गाहामनि  
 थाखाय जथाइयै मावग्रा आफाद (NGO)  
 खर'सा मुं - मानिबा गुबै मुं (title)

फोरमायथि - रादाब (Information) सुलाद  
 जाब्रबथाइ- हरखाब जाथाइ  
 दान्दिजोर - बारा गोबाव थायि

### सोंथि :

1. खैफोद होनोब्ला माखौ बुजियो ? बे फरायाव बेखौ मोनबेसे बाहागोआव रानना दिन्थिदों मोनफ्रोमबो बाहागोनि मोननैयै बिदिन्थि हो ।
2. खैफोद राहा होनोब्ला माखौ बुजियो ? बेनि गाहाइ थांखिया मा ?
3. खैफोद राहानि गाहाइ बेसादफोरा मा मा ?
4. खैफोद राहानि खलब मोनथामा मा मा ?
5. बांग्रिं मावबाय थानाय समाव जों मा खालामनाया गाहाम ।
6. सुंद फिन हो :  
 (क) बमा बेरफुनाया माबे थाखोनि खैफोद ?  
 (ख) IDNDRI नि आबुं महरखौ लिर ।  
 (ग) मिथिंगायारि खैफोद आरो रेल जाब्रबथाइ दबथायनायनि थाखाय भारत सरकारनि बबे बबे बिथोन बिफानफोरा बिबान मानिना लादों ?  
 (घ) खैफोद राहानि थाखाय भारत सरकारा नाजावना लानाय आइनि मुझ मा ?  
 (ङ) बांग्रिं मावोब्ला खारद्ला खारसि खालामनाया गाहाम ना ?

### फरा गियाण :

खैफोदा मोननै रोखोमनि— मिथिंगायारि आरो बानायलु । दैबाना बांग्रिं मावनाय बारहुंखाफोरा मिथिंगायारि खैफोद । गुबुन फारसे गारि गुरानि जाब्रबथाइ जाथाइ, दारिमिनारि जाब्रबथाइ, बमा बेरफुनाय आरिफोरा जादों बानायलु एबा मानसिया सोरजिनाय खैफोद । मोननैबो रोखोमनि खैफोदानो समाजनि गोबां खहा खालामनो । खैफोद खालामनायनि थांखियै बुहुम हारिमा गेजेरारि आफादा थांनाय जौथाइनि जोबथा जिथाइनिफ्रायनो गुबै बिबान लानानै फैदों । जोंनि हादरनि सरकाराबो 'खैफोद राहा' खरसा मुंनि हाबाफारि थियारि खालामदों । बे हाबाफारिनि गेजेरजों सरासनस्रा राइजोखौ खैफोद सोमोन्दो गियाण होनानै बेनिफ्राय बारग 'नायनि

सोलो फोरोंनो नाजानाय जादों। लोगोसे खैफोदनि उनाव गोख्रै गोख्रैयै माबोरै मददफोर होनो हायोबेनि सोमोन्दैबो मोनथिहोनो नागिरनाय जादों। खैफोद दबथायनाय आरो बेनि आखाइयाव गोग्लैनाय दुखुथिया मानसिफोरनि मददनि थाखाय थानाय सरकारनि राहानि सोमोन्दैबो एसे एनै खोथा बे फरायाव सरजाबनाय जादों।

#### उफेरा फोरमायथि :

1950 मायथाइयाव आसामाव जानाय बांग्रिं मावनायाव राज्योनि बायदि ओनसोलाव गोबांथार खरा-खैफोद जादोंमोन। आथिखालाव आसामाव दै बाना आरो बोरि गिसिखानायनि लोगोसे थिउरिया हान्जाफोर मावनाय ब'मा बेरफुनायनि थाखाय गोबां जिउ, दोहोन दौलत खहा जागासिनो दं। आसाम सरकारा बेफोरखौ दबथायनो थाखाय फिथाइयारि राहा लानायखौ नुनो मोनदों। बे आयदायाव जौनि सेंग्रा गोहोआ सांग्रां जानाया गाहाम।

#### फोरोंगिरिनिसिम :

खाबु जायोब्ला आसाम सरकारनि लोब्बा थानाय बिफानजों बाश्रा बुंथिज्जलायनानै (communication) फरायसाफोरनि सिगाडाव खैफोद राहानि सोमोन्दै मोनसे दिन्थिफुंनाय (demonstration) नि राहा खालामनो हायो।

## सरखौ नंसर मालाय नंदं

रुपनाथ ब्रह्म

#### खन्थाइखौ सायख'नायनि थांखि :

रुपनाथ ब्रह्मआ बिबार मुगानि गिबि सिरिनि खन्थाइगिरि। फरायसा समनिफ्राय समाज सिबिनाय, हारि फोसाबनायाव नांथाबना थानाय रुपनाथ ब्रह्मआ सासे खन्थाइगिरि महरैबो बिहोमा होदों। मिष्टिक सानथौनि खन्थाइगिरि रुपनाथ ब्रह्मनि खन्थाइखौ होनाय जादों।

#### खन्थाइगिरिनि सिनायथि :

क 'कराझार नोगोर सेरनि औवाबारि गामियाव 1902 मायथाइयाव रुपनाथ ब्रह्मआ जोनोम मोनो। 1920 मायथाइयाव धुबुरी हाइस्कुलनिफ्राय मेट्रिक आनजाद उश्रिनानै कटन कलेजाव फरायो। 1925 मायथाइयाव बि. ए. आरो 1927 मायथाइयाव कलिकतानिफ्राय आइन (Law) डिग्री लानानै धुबुरीयाव 'अकालति' खालामो। 1937 मायथाइनिफ्राय आसाम एसेमब्लियाव सासे सोद्रोमा सायख' जानानै 1967 मायथाइसिम मनथि जानानै गोलाउ सम राइजोखौ सिबिनो खाबु मोनो। बिथांआ 1968 नि 23 जानुवारि खालि क'कराझार सिभिल हस्पितालाव रुंसारि जायो। बिथां सासे हारि सिबिसुला आरो गोजौ थाखोनि खन्थाइगिरिमोन। बर', असमीया आरो बांला रावजोंबो बिथांआ खन्थाइ रनसायोमोन। गुबैयै मिष्टिक सानथौगिरिमोन। बिथांनि खन्थाइफोराव दोहोरोमारि सानथौफोरानो बेरखाडे। खन्थाइ-मेथाइ बिजाबखौ बिथांआ मदाराम ब्रह्मजों जथाइयै सुजुदोंमोन। 'आह्वान' आरो 'मिलन संगीत' मुंयै बिथांआ बांला आरो असमीया रावाव खन्थाइ लिरदोंमोन। "बड़" कछारीर इतिबृत्त" मुंनि बिजाब गांसे असमीया रावजों लिरदोंमोन।

## गुबै फरा :

(1)

सरखौ नंसर मालाय नंदं ?  
रावब बेवहाय मालाय नंया  
आंनि नंनि सरखौ हन्दं ?  
रावब आंनि नंनि नंया ।

(2)

फैदं बेवहा जेरावनिफ्राय  
थैबला नंसर बेवन थांय;  
जाय, दैया सागरनिफ्राय,  
बेवन गरब गग्लै हैयो: ।

(3)

हाबाब जंलाय रावब नंया,  
थैब्लाब थांब्लाब बिन बि  
दैया जेरै सागरनि जुदा नंया,  
जादं अरै बिन जं, जंन बिन ।

(4)

मालाया हाबाब मालाय नंया  
बयखौब अन्द' गावनि बायदि  
गावनिया हाबाब गावनि नंया;  
दाख्लायसै रावब हिंसा हिंसि ।

(5)

मालायनि फिसान गावनि फिसा,  
रावब बेवहा जुदा नंया,  
हखारद बयबो गावनि निशा,  
जंलाय इशरनि बाइहरा नंया ।

## सोदोबथि :

निसा- साननाय

बाइहा -गुबुन जुदा

बिनो बि - समान

गोरोब - मिलाय, थाब्रोम

## सोथि :

1. खन्थाइगिरिया रावब 'बेवहा मालाय नडा' होनना मानो बुंदों ?
2. खन्थाइगिरिया मा हारि (सानथौ)नि खन्थाइगिरि ?
3. खन्थाइगिरिया मानो 'रावब आंनि नंनि नडा' होनना बुंदों ?
4. जों मानो बयखौबो अननांगौ ?
5. फैदं जेरावनिफ्राय, "थैब्ला बेयावन थाडो" होनना मा जायगा एबा सोरखौ इसारा होदों फोरमायना लिर ।

## बेखेवथि :

1. फैदं बेवहा .... .. बेवन गरब गग्लै हैय ।
2. दैया जेरै .... .. जंन बि ।
3. हखारद बयब ... .. हाइहा नंया ।

## फरा गियान :

बे मुलुग संसाराव जों बयबो न'खरसेनि । जों गासैबो इसोरनि फिसा । जोंनि गेजेराव बिदा-फंबाय, बिब बिनानावनि सोमोन्दो । इसोरा जोंखौ जोनोम होदों । बे मुलुग संसाराव दैथाय हरदों । जों इसोरनिनो बाहागो । जों थैब्लाबो इसोरजों गोरोबहैफिनगोन । बे संसाराव आंनि नोंनि होननो जेबोआनो गैया । खोमानांगौबो गैया । बेनिखायनो गावनि होनना एखुथा साननायखौ नागारनानै अनज्लायनायनि गेजेरजों थानांगौ होनना खन्थाइगिरिया हास्थायदों ।

## फोरोंगिरिनिसिम :

मिष्टिक खन्थाइनि सोमोनदै फोरोंगिरिफोरा फरायसानो फोरमायना होनांगोन ।

गुबै फरा :

## मोनाबिलि

ईशान चन्द्र मोसाहारी

### खन्थाइखौ सायख'नायनि थांखि :

बर' रमान्ठिक खन्थाइनि गायसनगिरि ईशान चन्द्र मोसाहारीया माखासे रमान्ठिक खन्थाइनि गेजेरजों बर' खन्थाइनि बाख्रिखौ आबुं खालामनायल' नडा, गोथाव रोसिनिबो खराग होलांदों।

भारतारि थुनलाइयाव सोनाबनि गोहोमाव रमान्ठिक सानथौनि खन्थाइ सोरजि जानाय बादि बर' थुनलाइयावबो सोनाबारि गोहोमाव रमान्ठिक सानस्रिनि जोनोम जादोंमोन। बेयो बर' आव थोंजोडै फैयाखैमोन। असमीया, बांला बायदि बै समाव जौगानाय थुनलाइनि गेजेरजों स'फैदोंमोन।

सिगां सिरिनि रमान्ठिक खन्थाइगिरि ईशान चन्द्र मोसाहारीनि मोनाबिलि खन्थाइखौ बिदिन्थि महरै सायख'ना होनाय जादों।

### खन्थाइगिरिनि सिनायथि :

ईशान चन्द्र मोसाहारीया क'कराझार जिलानि थुरिबारि गामियाव 1915 मायथाइयाव जोनोम मोनो। कमलसिं गुदि फरायसालिखौ उथ्रिना धुबुरी गोजौ फरायसालियाव फरायनानै मेट्रिक आनजाद उथ्रियो। बेनि उनाव एलाहाबाद एग्रिकालसार कलेजाव फराय हैयो। फरायसा समावनो हाबा खालामो। नाथाय एलाहाबादाव फरायनाय समावनो टाइफयेट बेरामाव गोगलैनानै अबथिरायै रुंसारि जायो।

बियो प्रमद चन्द्र ब्रह्म आरो जगेन्द्र नाथ ब्रह्ममोननि समब्रा समब्रि। ईशान चन्द्र मोसाहारीया 1940 मायथाइयाव रुंसारि जायो। बियो अलंबार मुगानि देरसिन रमान्ठिक खन्थाइगिरिमोन। “सनानि माला” आरो 'फामे' मुंनि गांनै खन्थाइ बिजाब सोरजिलांदों। बिनि खन्थाइफोरा गासिबो गोजौ मान थाखेनि। बिनि खन्थाइफोराव मिथिंगा मोजां मोननाय आरोगोसो थोनायनि सानस्रिफोरा रोखा बेरखाडो। 'आबारी' मुंनि सुंद' सल'बो बियो लिरलांदों।

आय' सिखोला मोनाबिलि  
 रावबो मिथिया जॉल' मिथिलायगौ  
 जोंदि सानैजों सिरि सिरि जादों जुलि।  
 सोनाब जिंनि नखराडाव  
 फैयो नोडो सोदोब मोनथाव  
 बिरहोनानै रैसुमै बाराव  
 रेसम जोमैनि दखना फाइलि।  
 जारौ मोखाडाव जिनिर नांदों  
 हनै मानिबा गोसोम साया  
 बेथ नोंनि हसारनाय खानाइनि  
 गेलेनायबोल' जेबो नडा।  
 आयना बादि सम सम दै बिखा'व  
 मा नायदों यै गोजों मुयाव;  
 सोर गाहोखौ सिन्दुरनि फोथाखौ  
 आजोलि नोंनि बिखा सायाव ?  
 नोंजों आंजों दैजिडाव  
 बिदिनो अजाय नुज्जायगोरा,  
 सिखिरि मानसिनि मेगन सेरावल'  
 जों सानैजों एरा एरा।  
 हाबाब सना नोंखौ आं  
 जिउनि होननानै सानो जुलि;  
 नोंनि खुगायाव खोनाबाय आं  
 गोसो थोनायनि मुंसे मुलि।

**सोदोबथि :**

आजलि बिजलि- गुरै, माहि, रैरुब।  
सिखिरि मानसि - मालायनि मोजांखौ सैयि मानसि  
एरा एरा- जुदा जुदा

**सोंथि :**

1. मोनाबिलिजों खन्थाइगिरिनि मा सोमोन्दो दं ?
2. खन्थाइगिरिया 'मोनाबिलि' सिख्लानि मा बादि महर फोरमायदों ?
3. मोनाबिलिनि खुगायाव खन्थाइगिरिया मानि देंखो खोनानो मोनदों ?

**बेखेवथि :**

1. सोनाब जिंनि नखराडाव ..... रेसम जोमैनि दखना फाइलि।
2. नोंनि खुगायाव ..... गोसो थोनायनि मुंसे मुलि।

**फरा गियान :**

खन्थाइगिरिया मोनाबिलि समखौ सानबोलाउरिजों समायना सिख्लानि महर होदों। ददेरे मोनाबिलि सिख्लाखौ खन्थाइगिरिया मोजां मोनो। बिनि रैरुब महराव गोमोहाबो। समायना महर लानानै रेसम जोमैनि दखना बिरहोना फैनाय मोनाबिलि सिख्लानिजों खन्थाइगिरिया जुलि जायो। बेखौ रावबो मिथिमोना। बिसोर सानैजोंल' मिथिलायो। सिखिरि मानसिनि मेगन सेराव बिसोरो एरा एरा थायो।

बिसोरनि मोजां मोनज्जायनाया नेहाद बाइजोआरि नडा, गोसो गोरबोनि गोरबलायनायसो। खन्थाइगिरिनि मोजां मोननाया सोरगोआरि आरो बियो अनजालिनिफ्राय मोजां मोननायनि मुलिखौ मोनदों।

**फोरोंगिरिनिमिसम :**

फोरोंगिरिफोरा र'मान्ठिक खन्थाइनि सोमोन्दै फरायसाफोरनो मिथिहोनांगोन आरो बर' रमान्ठिक खन्थाइनि सोमोन्दै गियान होनांगोन।

**दैबाजुम**

प्रम'द चन्द्र ब्रह्म

**खन्थाइखौ सायख'नायनि थांखि :**

अलंबार मुगानि गिबि सारिनि खन्थाइगिरि प्रम'द चन्द्र ब्रह्मआ लिरनाय दै बाजुम खन्थाइयाव जिउ-लामायाव नुजाथिनाय हेंथा-हेंसिफोरखौ नेवसिनानैब्लाबो गावबा गावनि थांखिसिम स'हैनायनि गोसो थुलुंगाथिया खेंसालियायै बेरखांदों। जिउ-हान्थिनाय लामाया गोथों नडा, दै बाजुमा जैरै गिदिं गिदा स्रा-स्रायै बोहैलाडो, बिब्दिनो जिउ हान्थिनायाबो अराय थुंगि गैयि। बे खन्थाइयाव अराय मिथिंगायारि सैथो बाथ्रा-खोथाया रमान्ठिक आरो मिष्टिक सानथौनि गेजेरजों बेरखांथिदों। बेनि लिरनाय एबा फोरमायनाय आद'ब, सानस्रि एबा सानथौ बेरखांथिहोनाय, बेफोरनि सोमोन्दै मिथि होनो थाखाय बिथां ब्रह्मनि बे खन्थाइखौ सायखनाय जादों।

**खन्थाइगिरिनि सिनायथि :**

1916 मायथाइयाव प्रमद चन्द्र ब्रह्मआ दानि क'कराझार जिलानि गदामारी गामियाव जोनोम जादोंमोन। बियो 1933 मायथाइयाव मेट्रिक आनजाद उथ्रियो आरो रंपुर कलेजाव फरायहैयो। 1937 मायथाइयाव कटन कलेजनिफ्राय बि. ए. आनजादखौ उथ्रियो। 1941 मायथाइयाव असमीया आयदायाव कलिकता मुलुग सोलोंसालिनिफ्राय एम. ए.खौ उथ्रियो। 1941 मायथाइयावनो ए. सि. एस. आनजादाव नैथि थाखोआव उथ्रिनानै एस. डि. सि. साख्रि मोनो। बे साख्रिखौनो गोबाव सम मावनायनि उनाव 1971 मायथाइयाव साख्रिनिफ्राय जिरोन लायो। गाव सुजुनाय बिथराइ, अलंबार, रुप आरो सिन्ताधारा (मुस्रि आरो सानस्रि), हाथखिं हाला बायदि लाइसि एबा सुजु बिजाबफोराव आरो गुबुन गुबुन लाइसिफोरावबो बियो खन्थाइ, सेन्साच रिपर्ट, रायथाइ आरो सावरायथाइ गोबां लिरलांदों। बियो अलंबार मुगानि देरसिन थुनलाइगिरि। बियो सनाकी बिजाब (1968) आरो मोनथाम रावारि "बर'-इंराजी-हिन्दी" सोदोब बिहुं (1986) सुजुलांदों। बियो 1992 मायथाइयाव रुंसारि जायो।

गुबै फरा :

रा रा रा रा  
 रौ रौ रौ रौ  
 च्राम च्राम च्रुम च्रुम  
 ग्राव ग्राव ग्रौ ग्रौ,  
 बान्दो बानला सिफायनानै  
 जुगाम खुलि नागिरदों आं ।  
 थैगदाव बेगदाव जेजोंबो ब्ला ब्ला थार  
 दैमा दिहुं आं दे बुरलुंबुथुर  
 - हगार आंनो लामा हगार ।  
 सौफाय सौसि जेखौबो फोजाव लांगोन,  
 दिनै हाया गाबोनथ' हागोन ?  
 - हगार आंनो लामा हगार ।  
 सोरबा आंखौ थुज्रेथ हरदों,  
 सोरबा आंखौ बोज्रेथ लांदों,  
 मिथिया आं थांनांगौ थांगासिनल' दं,  
 लामाया जिखि जाया गावनो थुंगि जासे ।  
 - हगार आंनो लामा हगार,  
 दुलाराय सोरजियानो दावगाबोला  
 हे संसार आंबोल' मानो थानो गेन्देला ?  
 नोंनि खुसियै ? सि सि सि,  
 नै नोंनि खर'साजोंनो बाज्रुमनोसै  
 - हगार आंनो लामा हगार ।  
 सोरबा दामदों नुयि थानाव  
 बोहैनाय सुखांनाय जथा खाम सुफिन  
 ग्रोब ग्रोब बिजोंनो दावगागोन आं  
 दैमा दिहुं आंलाय बुरलुंबुथुर  
 -हगार आंनो लामा हगार ।  
 रा रा रा रा  
 रौ रौ रौ रौ ।

सोदोबथि :

जुगाम- जुगामि  
 थैगदाउ-बेगदाउ- हेंथा हेंसि  
 थैहाबगोन - सुथि मोननाय, थैनायबादि जाथ'नाय  
 थुंगि जासे - जोबजासे  
 थानाव - थावनियाव, जायगायाव  
 बोरहोनाय - गोसो बोदोर खालामनाय  
 गेलेन्दा - मैला, गाज्रि

सोंथि :

1. दै बाज्रुम खन्थाइनि खन्थाइगिरिया मा नागिरदों ?
2. दुलाराय सोरजियानो दावगानाय समाव खन्थाइगिरिया गावल' मा जानो लुबैयाखै ?
3. खन्थाइगिरिया जुगामि खुलिखौ माबोरै नागिरदों ?
4. खन्थाइगिरिया खाम सिफुं जथानि देंखोजों ग्रोब ग्रोब बहा दावगालांनो नागिरदों लिर ।
5. खन्थाइगिरिया मा नागिरनानै, सोरखौ "हगार आंनो लामा हगार" होन्दों लिर ।

बेखेवथि :

- क) बान्दो बानला ..... लामा हगार ।  
 ख) दिनै हाया गाबोनथ' हागोन ..... लामा हगार ।  
 ग) दुलाराय सोरजियानो ..... मानो थानो गेन्देला ?  
 घ) सोरबा दामदों ..... लामा हगार ।

फरा गियान :

दै बाज्रुमा बान्दो-बानला सिफायनानै, हाजार हेंथा-हेंसि नेवसिनानै दावगालाडे । बुरलुंबुथुर दैमा बादि लैथो थांखिनानै दावगालाडे, बिब्दिनो लिरगिरियाबो

गावनि जिउ थांखिसिम सहैनो थाखाय हांखुर जादों। दुलाराय सोरजियानो दावगादों, दावगानायानो मिथिंगायारि खान्थि। बेनिखायनो खन्थाइगिरियाबो अराय दावगालांनो थांखि लादों आरो बेनि थाखाय नुवाथारि आनान गसाइनि थुलुंगा मोनदों।

### फोरोंगिरिनिसिम :

फोरोंगिरिफोरा प्रमद चन्द्र ब्रह्मनि गुबुन गुबुन खन्थाइफोरनि सोमोन्दैबो फरायसाफोरनो गियान होनांगोन। बेनि लोगोसे बिथां ब्रह्मनि खन्थाइफोरा मा सारिनि आरो सानथौ-बेरखांथिया मा रोखोमनि, बेफोर गासैनि सोमोन्दै गुवारै फोरमायनाया मोजां जागोन।

## थार

कमल कुमार ब्रह्म

### खन्थाइखौ सायख' नायनि थांखि :

बर' हारिया गोदोनि मोनसे जारिमिनदांखा हारि। बर'फोरा राजा दंमोन, राज्यो दंमोन, गोथार दोहोरोम आरो हारिमु दंमोन। काछार हादरनि दिमापुर राजथावनिनि बायखोन्दा नेरसोना बेनिनो बिदिन्थि। दा नाथाय बेफोर गासिबो जोबलांनायनि उनाव बर' हारिनि गेजेराव हासि हुसि थासारि फैबाय। बेबादि थासारिखौनो बर' हारिनो मोनथि होनानै हारिनि फारसे सांग्रां जाहोनो बे खन्थाइखौ सायख'नाय जादों।

### खन्थाइगिरिनि सिनायथि :

बिबार मुगानि मुंदांखा, बर'नि बयनिखुइ सिगांसिन पद्यसि मुं बान्था मोननाय लिरगिरि मदाराम ब्रह्मनि फिसाज्ला कमल कुमार ब्रह्मआ जोनोम मोनदोंमोन 1927 इं मायथाइयाव। बर' थुनलाइनि सासे गिबि सारिनि लामा दिन्थिगिरि कमल कुमार ब्रह्मआ गाहाइयै सासे थुनफावथाइ लिरगिरिमोन। गोदान फैसालि, गोरोन्थिनि उनाव, राजा इरागदाव, हर बादि खोमसि, मिंमांनि सिमां, गोसोनि जायख्लं, मान्दारनि मोदै आरो थांनायनि लामा बायदि बायदि मुंनि बिथांआ गोबां थुनफावथाइ बिजाब लिरनानै गालांदों। बेफोरनि अनगायैबो बिथां ब्रह्मआ बर'नि गिबिसिन नेरसोन सावथुन 'दायना' (1983) मुंनि थुनफावथाइखौ लिरलांदोंमोन। मिंमांनि सिमांखौ 'जिउनि सिमां' (1986-87) मुंनि सावथुन थुनफावथाइ जोनोम होनानैबो बिथांआ मोनसे बर' सावथुन दिहुनदोंमोन।

बर' आरो असमीया रावजों थुनलाइ सोरजिग्रा बिथां ब्रह्मआ बेनि अनगायै बर' रावखान्थिबो सुजुदोंमोन।

बर' रावखौ 1963 इं मायथाइनि 18 मे खालि फरायसालियाव बिजों राव महैर थिसननाय समनिफ्राय बिजाबनि आंखाला मोनसे गिदिरथार जेंना हिसाबै (महरै) नुजादोंमोन। नाथाय बिथां ब्रह्मआ बेयावहाय लिरगिरि बिबान रुजुनानै



बै आंखालखौ सुफुंनो नाजादोंमोन। बै समाव बिथांमोना बड' टेक्सबुक प्रडाकसन कमिटि दानानै बर' बिजाबनि आंखालखौ सुफुंनो नाजादोंमोन। मुंख'नो गोनां बाथ्रादि कमल कुमार ब्रह्मआ बै कमिटिनि गायसनगिरि नेहाथारिमोन।

कमल कुमार ब्रह्मआ 1990-93 ई मायथाइयाव बड' साहित्य सभानि आफादगिरि जायो (सायख जायो)। बर' थुनलाइयाव गेदेमा अबदान (बिहोमा) होनायनि थाखाय आसाम सरकारा 1990 नि 15 आगष्टनिफ्रायबिथांनो थुनलाइयारि पेनसन होदोंमोन। बर' थुनलाइ आफादाबो बिथांनि 'हरबादि खोमसि' थुनफावथाइनि बिजाबनि थाखाय 1997 मायथाइयाव 'रांसार' थुनलाइ बानथा होदोंमोन। बे मुंदांखा लिरगिरिया 2006 मायथाइयाव रुंसारि जादोंमोन।

### गुबै फरा :

थावनिया सायराब खोमसि।  
 गोजानाव गोदान फैसालिनि सायखं  
 गोजा गोथां अराय रं।  
 दिलाव ब्रानि दैथुना  
 खाम दामो :  
 दाम गुम दा गुम। दाम गुम दा गुम।  
 बाग्दावखाडो  
 दिमाफुरनि गोगोम खामफाया,  
 नायग्दिडे;  
 दरसि, सेरे- खोमसि। ...  
 जारिमिन। अनसायो ...  
 देदसुं गैलिया, जोहोलाव दैमालु ...  
 जावलियानि गोगो थैया  
 आलाय खुंग्रिनि फुर्साव बिखायाव  
 जारौ बोहैग्लाबो। ...  
 ... .. थुंगिबाय।  
 हांमासुयो ...

गोसोआव गोजान इयुननि खैदां खैफोद जाखांफैयो  
 थावनिया मावखाडो।

नाथाय—

बायखोन्दा नोगोरनि सिथ्ला ख'नायाव  
 हारिनि नेसौन

गेरेमसा सिजौआ

गोथार गोगोम अंगुबै,

दाबो नुयो

अरन मायनावनि मुस्त्री महर।

खोनायो खबां बुनाय

बायखोन्दा नोगोराव।

अन्थाइ अरन- सेरफां सेर सेर

सात दान्दालि खानाय हसारनाय

रोमो-गोमो दख्ला गाननाय,

गन्थं जंजिद- नारें सु,

जानजि सेरथे - मोज्जलाय जानजि

- खनसि, दैसि, लाइसि ... ..

मेगनाव गोनां खैनाशान्थिनि

हायला हुइला मोसानाय।

बिसोरो—

अर होयो गासोआव

दिन्थियो सिमां आरो मोखथांखौ लानानै

जारिमिननि बिखायाव लिरनाय;

गोजोन गोथौ खौरां।

बोदोर बाउलि गोसोआ, जांखिखाडो

जुगनि थान्दै—

बिदिन्थानि लंथं मुसुखा गाग्लोबनायखौ,

इनाय अनागारिनि मेहेर नायनायखौ

सोर- जों गिनो ?

जों गया - जों थैया ।  
जों थागोन, रंजागोन - मिनिगोन ।  
... .. अराय सिख्लानि थार ।  
\* \* \* \* \*  
बर'नि नेसोन नोगोर  
नोंनि हादरसि गोसोआ खोमसि ?  
नों गाबदों ?  
आलाय खुंग्रिया गोरसि खांगोन,  
सोरजिगोन गोदान फुंखा ।  
जावलियानि निस्थार गोगगो थैया  
जोनोम होगोन  
लैहोर लैहोर रोज्जासे ।  
बां जालिया फाइखि ।  
... मुझी होगोन ... दागोन ...  
जोंखांगोन नोगोरनि खाम्फा ...  
थागोन खान्थि  
होमब्ला ?

### सोदोबथि :

थार - गुबै, सैथो, मोखथां  
सायराब - सोमखेखे, जेबो जुथि गैयि, गोसो थाजा गोमानाय  
फैसालि - मगेनाव जोबहैनाय सिमा  
दिलावब्रा - गोलाउ दैमा, बुरलुंबुथुर  
दैथुन - दैन गुथाल  
आलायखुंग्रि - आलाय खुंग्रि दैसा  
खैदां-खैफोद - खैफोद-आफोद  
गेरेमसा - दालाइ बिलाइ रोजा, गोजाम गेदेर  
खबां - खावां

सातदान्दालि -गोलाउथार, जोबोर गोलाउ  
रोमो गोमो - मोननानै गोमो जानाय  
हादरसि - सि स्राय  
गरसिखां - उसिखांनाय  
जालिया - जोहोलाव बैसो जाखांनाय देरफुंनाय लाइमोन  
फाइखि - दावहारु, सानथ्रि ।

### सोथि :

1. थार सोदोबजों खन्थाइगिरिया मा थारनि खोथा बुंदों ?
2. थार खन्थाइयाव बर' हारिनि मा गोजाम बाथा बेरखांदों ?

### बेखेवथि :

1. बायखोन्दा नोगोरनि सिथ्ला ख'नायाव  
.....  
अरन मायनावनि मुझी महर ।
2. जावलियानि निस्थार गोगगो थैया  
.....  
बां जालिया फाइखि ।

### फरा गियान :

बहुमाव गसिबो सोलाय सोल' जाखायो । नाथाय सैथोखौ सोलायनो  
हाया । बियो जेब्लाबो सोलाया । काछार हादरनि मोनसे समनि जौगा-मागाया  
दानि बायखोन्दा महराव दिमापुर राजथावनियाव गोलैना थानानैबो बर' हारिनि  
गोदोनि देरहासार महरखौ फोसावगासिनो थादों आरो थुलंगा महरै दं । बे नेरसोनखौ  
दानि बर'फोरा बोखांफिननांगौ ।

### फोरोंगिरिनिस्सिम :

बे खन्थाइखौ फोरोंनाय समाव फोरोंगिरिया फरायसाफोरखौ बर' हारिनि  
गोदोनि गोगाथावना जारिमिननि सोमोन्दै गुवारै फरायनो थुलुंगा होनांगौ ।

## सुबुंथि धोरोम

ब्रजेन्द्र कुमार ब्रह्म

### खन्थाइखौ सायख'नायनि थांखि :

आथिखाल बुहुमाव जोबोद खैफोद नुजाथिदों। बुहुमा मोनसेल'। नाथाय बे बुहुमखौनो जों धोरोमनि मुंआव, हारिनि मुंआव सिमा हांखोजों थेर बेथेर खालामदों। जों एना-एनिनि गेजेरजों गुबुंले बारहावा सोमजिहोदों। धोरोमनि मुंआव गावम्रादों। नाथाय सुबुंनि धोरोमा मोनसेल' आरो बे धोरोमखौ जों लायोब्ला बुहुमनि अल'खदा जोबगोन। खन्थाइगिरिनि बे मिजिंखौ बयबो गोसोआव लायोब्ला संसारा गोजोननि जागोन। बिब्दि सानसि गोदान जोलैनि सुबुंनो मिथिहोनायनि गोनांथिया गोबां। बे थांखियै बे खन्थाइखौ सायख'नाय जादों।

### गुबै फरा :

बुहुम खौरांनि जाय सिमा हांखोआ  
बुहुम बिखाखौ थेर बेथेर जाहोदों,  
सुबुं हारिखौ थाय थाय बोखादों,  
बोखारगोन आं बे हांखोखौ।

संसारनि सुबुंखौ बोजबनानै  
बायनाय खोन्दोखौ आं बुथुमगोन,  
गोदान सोरजिनि हाथियार लागोन,  
दाफिनगोन गोदानै बै बुहुमखौ।

दोंसे देंखोमानि देंखो फेरलेबजों  
थार थांखिथिं आखाइ फोलाउनानै,  
एना-एनिफोरखौ ज्राब नागारनानै  
सुजुफिनगोन जनाय देंखोखौ।

अनागारिनि आथिं गासोमनायाव  
गुबुंदोंब्ला धोरोमनि गोगो दैया,  
दुंहाव जादोंब्ला बार-हावाया  
लाबोफिनगोन गोदै गोजोनखौ।

जोंनि नैबे गोजाम हारिनि बुहुमाव  
गुवार गंसे अखोरां दाफिननानै,  
अराय गोथार उदांसि लाबोनानै,  
बिरहोगोन गोसोनि दाउथुखौ।

सुबुंनि गोखों खौसे थांखिजों  
नोंनि-आंनि बाथ्राखौ सिफायनानै,  
सुबुं धोरोमनि नेरसोनखौ लानानै  
फसंफिनगोन सैथो जाथाखौ।

### सोदोबथि :

थाय थाय - सेरखाय बेरखाय  
हाथियार - अस्थ, दावहानि आइजें आयला  
अनागारि - गाजि आखुनि, दुथां, इनाय  
जाथा - निशान, फिरफिला

### सोंथि :

1. बुहुम बिखाखौ माया थेर-बेथेर जाहोदों ?
2. खन्थाइगिरिया बे बुहुमखौ माबोरै दाफिननो नागिरदों ?
3. धोरोमनि गोगो दैया माबोरै गुबुंले जादों होनना खन्थाइगिरिया सानो ?
4. खन्थाइगिरिया हाद्रिनि बुहुमखौ मा खालामनो नागिरदों ?
5. सुबुंनि धोरोम खन्थाइजों खन्थाइगिरिया मा बाथ्रा बुंनो नागिरदों ?

**बेखेवथि :**

1. संसारनि सुबुंखौ बोजबनानै  
.....  
दाफिनगोन गोदानै बै बहुमखौ ।
2. सुबुंनि गोख्रों खौसे थांखिजों  
.....  
फसंफिनगोन सैथो जाथाखौ ।

**फरानि गियान :**

खन्थाइगिरिया बहुमखौ गोदानै दाफिननायनि थांखि लादों । मानोना जों सिमा गैयि बहुमखौनो गोबां सिमा होना बोखावदों । सुबुं हारिया हारिनि मुंआव, धोरोमनि मुंआव गावस्राजोबदों । गावजों गाव एना-एनिजों मुखुब जाना खौसेथिनि देंखोखौ खोमादों ।

समाजनि इनाय अनागार खालामग्रा सुबुंनि इसारायावनो समाजाव दुंहाव बारहावा बारदों ।

खन्थाइगिरिया मिजिंधिदों नै बे हाद्रिनि बुहुमाव गोथार उदां अखां गंसे दानायनि । बयखौबो बोजबनानै गोजोन-खौसेथिनि बुहुम दानायनि आरो सुबुं धोरोमनि फिरफिला बिरहोनायनि ।

**फोरोंगिरिनिसिम :**

फोरोंगिरिफोरा ब्रजेन्द्र कुमार ब्रह्मनि गुबुन गुबुन खन्थाइनि सोमोन्दै रायखांनानै बे खन्थाइनि सानमिनि एबा सानथौनि सोमोन्दै फरायसाफोरनो फोरमयना होनांगोन ।

**जिउनि फैसालि**

शचीन्द्र बसुमतारी

**खन्थाइखौ सायख'नायनि थांखि :**

जिउ फैसालिनि गेजेरजों खन्थाइगिरिनि जिउ सानमिनि बेरखांदों । मिष्टिक सानथौनि बे खन्थाइयाव खन्थाइगिरिनि जिउ मोनदांथि, मिजिं बेरखांनाय नुनो मोनो । बिब्दि रुसि गोनां खन्थाइजों फरायसाफोरखौ सिनायथि होनो थाखाय नाजावनाय जादों ।

**खन्थाइगिरिनि सिनायथि :**

खन्थाइगिरि शचीन्द्र बसुमतारीया बरागारी (द'तमा) गामियाव 1955 मायथाइयाव जोनोम मोनो । 1969 मायथाइयाव बियो मिथिंगानि देंखो मुडै गांसे खन्थाइ बिजाब सुजुयो । 1979 मायथाइयाव "सिमांनि खैना" मुडै गांसे सनेट दिहुनो । बेनि अनगायैबो बर' फरा बिजाब आरो लाइसिफोराव हुरा हुरा खन्थाइ लिरो । शचीन्द्र बसुमतारीया गाहाइयै खन्थाइगिरि ।

**गुबै फरा :**

जिउ हाब्रांआव	जनानै हारिंंडै
सानो आं दावब' अखांनि	
मिथिमोना आं	बोहैयो बबाव ।
गोजाननि बेसेबा थावनि	
मोनाबिलि सिख्ताजों	लोगोसे आंबो
बिरलांनानै थांनो सानो,	
फंलें गोदना	गोबानानै बेनि
लोगोआव गोरोबफा लांनो ।	
मनुसनि आखु	नायनो गोसोआ
हास्थायो मानोबा जिउ आंनि,	

थानानै दखरसे                      जोमैनि बिखायाव  
 अननाय मोनोबा ग'साइनि ।  
 खंख्ला साम' आं                      नै बे बहुमआव  
 जेबोलाबो जाबायो आनि-थानि  
 सुबुंनाव गैया                      अनफावरि गोसो  
 आंगोयै अनसायनायनि ।  
 रिउ रिउ गोजान                      बै थावनियानो  
 जागोन आंनि गोजोन थिलि,  
 मोनबोला आगोर                      आगान सुरनो  
 फैसालि जोबनाय लामा जिउनि ।

**सोदोबथि :**

जिउ-हाब्रां - दैमानि गोजौ बोरि, मानसि जिउनि मोनसे सम  
 फंलें - रैरुब, माहि, लोरबां गोलाउ नायनो मोजां  
 मनुस - सुबुं  
 खंख्ला - खालि, लांदां, जेबो गैयि  
 फैसालि - पर्दा, मेगनाव जोबहैनाय सिमा

**सोंथि :**

1. खन्थाइगिरिया सोरजों बिरलांफानो सानो ?
2. खन्थाइगिरिया जिउआव मा हास्थायदों ?
3. खन्थाइगिरिया सुबुंनि जिउआव मानि आंखाल नुदों ?
4. खन्थाइगिरिनि गोजोन थिलिया बबेयाव ?

**बेखेवथि :**

1. जिउ हाब्रांआव ..... थावनि ।

2. खंख्ला साम आं नै बे बहुमआव  
 .....  
 आंगोयै अनसायनायनि ।
3. रिउ रिउ गोजान  
 .....  
 फैसालि जोबनाय लामा जिउनि ।

**फरा गियान :**

खन्थाइगिरिया बे आगोमा जिउनि गुमुर मोना । बे संसाराव गावखौनो  
 हारसिं मोनदांदों । हास्थायदों मिथिंगाजों गोरुबफानो, मोनाबिलि सिख्लाजों लोगोसे  
 बिरलांफानो । बे बहुमाव खन्थाइगिरिनि जिउआ खंख्ला साम' बादि जालांदों ।  
 रावनिबो अननाय मोनाखै । अननाय हास्थायग्रा खन्थाइगिरिया बेनिखायनो इसोरनि  
 अननाय लुबैदों । गोजोनथिलियाव स'हैनो सिमां नुदों । आरो जिउ फैसालि गोग्लैनायसिम  
 नेदों ।

**फोरोंगिरिनिसिम :**

फोरोंगिरिफोरा गुबुन गुबुन सानथौनि खन्थाइनि सोमोन्दै फरायसाफोरनो  
 गियान होनांगोन ।

## लामा

मनर' न्जन लाहारि

### खन्थाइखौ सायख' नायनि थाखि :

लामा होनोब्ला मानसिनि मोखथां जिउआव आर्थिजों थाबायनाय लामाखौनो बुजायनाय जादों। नाथाय बे खन्थाइयाव खन्थाइगिरिया सुबुं जिउनि गुबुन गुबुन राहायै जिउ खांनायनि खोथाखौनो फोरमायनो नागिरदों। आर्थिजों थाबायनायाव गुबुन गुबुन लामा थानाय बादि जिउ खांनायावबो गुबुन गुबुन राहा दं, गुबुन गुबुन खामानि आरो गुबुन गुबुन धोरोमखान्थिखौ मानसिफोरा गुबुन गुबुनै मानिना सोलियो। नाथाय थैनाय समाव बयनिबो लामाया समान होनना खन्थाइगिरिया बुंदों। थैनाय उनाव बयनिबो लामाया गोथैबारिसिम होनना इसारा होनाय जादों।

### गुबै फरा :

मुलुगाव दस्रा दस्रा लामाजों  
नोंबो, आंबो बयबो थाबायो,  
जायनि जे लामा गावबा गाव होसोयो।  
खायसे खेंघ्रा, खायसे गोथों  
खायसे गोलाउ, खायसे सुंथाव  
खायसे लामाया बेंथि-बेंथा।  
खायसेना सु खायसेना गुसु  
खायसेना राजा लामा, खायसेना फोर्जालामा,  
खायसेना हाजो-हाखर, खायसेना दैसा दैमा।  
नाथाय, उनाव बयबो गसिबो  
लामा मोनसेयावनो लोगो लाहोयो  
थैनायाव बयनिबो लामाया थुंगिहैयो।

### सोदोबथि :

दस्रा-दस्रा - गुबुन गुबुन  
जे - जाय  
बेंथि-बेंथा-जेंना गोनां, खैफोद थानाय, थोंजों नड, नांथानाय, हेंथा गोनां

थुंगिहैयो - जोबहैयो

गुसु- गोरलै (लामा)

राजालामा - लामा गेदेर, सरकारि लामा

फोरजालामा - लामा फिसा

### सोंथि :

1. लामा सोदोबजों खन्थाइगिरिया मा गोथौ ओंथि फोरमायनो थादों ? बे लामाया मा रोखोमनि लामा ?
2. मुलुगनि गुबुन गुबुन लामाफोरा माबादि ?
3. उनाव बयबो लामा मोनसेयावनो लोगो लाहैयो बुंनानै लामा खन्थाइयाव खन्थाइगिरिया मा बाथ्रा बुंनो लुबैदों ?

### बेखेवथि :

1. मुलुगाव दस्रा दस्रा ... .. थाबायो।
2. खायसेया सु ... .. दैसा दैमा।
3. थैनायाव बयनिबो ... .. थुंगि हैयो।

### फरा गियायन :

लामाया मोननै- आर्थिजों थाबायग्रा आरो खामानि मावग्रा लामा। थाबायग्रा लामाफोरा जेरैबादि बयनियाबो समान नड बेबादिनो खामानि, धोरोम-खोरोम फोराबो बयनियाबो समान नड। थेवबो थैनाय समाव बेफोर गसिबो थैनायजों थुंगेहैयो आरो गोथैबारियाव राजा फोरजा, गिदिर उन्दै, धोनि गोरिब बयबो समान थाहैनो गोनां जायो।

### फोरोंगिरिनिसिम :

लामा खन्थाइया गोथौ सानसिनि। बेयाव मानसि जिउनि मावनाय दांनाय सोलिनाय बायदिसिना राहानि खोथा बुंनानै खन्थाइगिरिया जिउनि सानसिखौ फोरमायनो नागिरदों। फोरोंगिरिया भारतारि दर्शननि बेबादि सानसिफोरनि सोमोन्दै फरायसाफोरजों सावरायनो हायो। जिउखौ लानानै दुगानो गोनां जेबोगैया आरो थैनाइयाव बयबो समान जायगा लाथारनांगोन होनना बयनिबो गेजेराव समान साननाय थानांगौ होनना फरायसाफोरनो दिन्थिजों बिजिरना होब्ला गाहाम।

## भावथिना

डम्बरुधर ब्रह्म

### खन्थाइखौ सायख'नायनि थांखि :

सेक्सपियेरा बुंदोंमोन— बहुमाव साफ्रोमबो सुबुंआनो फाव दिन्थिगिरि होनना। बे सानथौआ बेरखांदों खन्थाइगिरि डम्बरुधर ब्रह्मनि “भावथिना” खन्थाइयाव। बे सानथौनि खन्थाइखौ फरायसाफोरनो फरायनो होनाय जादों।

### खन्थाइगिरिनि सिनायथि :

क'कराझार सहरनि साहा फाख्रिगुरि, देबर गामियाव डम्बरुधर ब्रह्मनि जोनोमा दोहोनि न'खरसेयाव जादोंमोन। उन्दैनिफ्रायनो बियो आलो आलोयै अननाय बानायजों देरदोंमोन। सिगां क'कराझार उनाव गुवाहाटीनिफ्राय बि. ए. डिग्रीखौ बियो लादोंमोन। फरायसा समनिफ्रायनो बियो समाज सिबिनायाव हेफाजाब होबोदोंमोन। बेनिखायनो उनाव कंग्रेस राजखान्थियारि हान्जानि जानानै एम. एल. ए. सायख' जादोंमोन। बेनि उनावनो बियो ए. पि. एस. सि,नि सोद्रोमा सायख'जादोंमोन। डम्बरुधर ब्रह्मआ गुबैयै खन्थाइगिरिमोन। फरायसा समनिफ्रायनो गुबुन गुबुन बर' लाइसि आरो बिसम्बिफोरनि थाखाय बर' खन्थाइ लिरदोंमोन।

### गुबै फरा :

बे गुवार संसारा  
अबंलाउरिनि  
गाबनाय रंजानाय  
गासिबो बिनि।  
नैबे गिदिरगुवार  
रंजासालिआव

जों बयबो भावथिना दिन्थिदों  
बायदि महरनि समाव।  
सोरबाबा गाबनाय दुखु  
भावखौ मोन्दों  
खायफाबा रंजा मिनि  
आखुखौ लादों।

मोजां गाज्जि बे दिन्थिनाय  
सुबुंनि भावथिनाया  
बुरलुंबुथुरनि दै गुथालबादि  
बाब्राबनाय, मिनिनाय माबा नागिरनाय

दुब्रि हाग्रानि  
जोंखोल निहोरबादि—  
सुबुंनि आगोमा जिउआ  
बबेबा बोथोराव स्रोब गोमोरदों  
भावथिना खिन्थानायाबो बिनि  
मुलुगाव जोबनानै थांदों।

### सोदोबथि :

अबंलावरि - इसोर  
भावथिना - फाव दिन्थिनाय  
भाव- फाव  
गुथाल - दोहौ  
स्रोब गोमोरदों - जोबलांदों, थैदों।

### सोंथि :

1. बे गुवार संसारनि बिगुमायाबा सोर ?

2. बे संसारखौ खन्थाइगिरिया मा होनना बुंदों ?
3. सुबुंनि फावथिनाया मा बादि होनना खन्थाइगिरिया बुंदों ?
4. जोंनि आगोमा जिउआ मा बादि ?

#### बेखेवथि :

1. नै बे गिदिर गुवार ... .. महरनि समाव
2. सोरबाया गाबनाय ... .. आखुखौ लादों
3. मोजां गाञ्जि ... .. नायगिरनाय।
4. सुबुंनि आगोमा ... .. जोबनानै थांदों।

#### फरागियान :

बे मुलुग संसाराव जों साफ्रोमबो भावथिनासालिनि फाव दिन्थिगिरि। इसोरा फावथिनानि सामलायगिरि। सामलायगिरिनि थोननाय बादि जों गाबनाय-मिनिनाय भाव दिन्थिदों। गोबाडानो गुबुन गुबुन भाव मोनदों। आरो भाव दिन्थिनाया जोबल्लानो जों फैसालि सिडाव आनञ्जायलांदों। जोंनि बे आगोमा जिउआ दान्दिसे समनि थाखाय भावथिना सालियाव नुजाना गोमालांदों।

#### फोरोंगिरिनिसिम :

फोरोंगिरिफोरा मोनसे फावथिनाजों रुजुना फरायसाफोरनि सिगाडव सुबुंनि जिउनि सोमोन्दै सावरायनांगोन।

## फोजाखांगिरि

(दिन्थिगासे फावथिना)

ड० जनक झंकार नार्जारी

#### फराखौ सायख' नायनि थांखि :

‘फोजाखांगिरि’ फावथाइया खिन्थिगासे फावथिना। बसेबा बोसोर सिगाडवनो ड० जनक झंकार नार्जारीया बे फावथिनाखौ लिरदोंमोन। फावथिनायाव बेरखांनाय सानम्रिया जेब्लायबो नाजावथाव। जोंनो दावहा नाड— गोजोन नांगौ। दानि गोदान जोलैनो लिरगिरिनि बिब्दि मोनदांथिनि सोमोन्दै मिथि होनायनि थांखियै बे फावथिनाखौ नाजावनाय जादों।

#### लिरगिरिनि सिनायथि :

जनक झंकार नार्जारीया 1948 मायथाइयाव क'कराझारनि मैदेर खर गामियाव जोनोम मोनो। बिनि बिफानि मुंआ खगेन्द्र नाथ नार्जारी आरो बिमानि मुंआ गोदैश्वरी नार्जारीमोन। उन्दैनिफ्रायनो न'खराव मोनसे हारिमुआरि आबहावा मोनदोंमोन। बिदा गेदेर शरत चन्द्र नार्जारीया सासे सावगारिगिरिमोन। बिथांमोननि थुलुंगायावनो उन्दै बैसोनिफ्रायनो मेथाइजों लोगोसे फावथाइ लिरनो समानै नाजादोंमोन। स्कुलाव फरायनाय समावनो गोबां फावथाइ लिरनानै गावनो फावबो दिन्थिदोंमोन। “मोनाबिलिनि हांमा”, “हाबानि माला”, “सोरां”, “हे प्रलय नामि आहा” बायदि बिथांनि बर’ आरो असमीया रावनि सोरजिनाय फावथाइ।

गोबां गुननि बिगोमाब्लाबो बिथानियाव बांसिन लेमनाय दड'मोन शिल्प-भास्कर्यनि फारसे। बिनि थाखायनो 1967 मायथाइयाव बि. ए.खौ उथ्रिनानै बिथांआ साखि मावब्लानो कलिकतासिम आगान सुरदोंमोन। बेयावहाय बिथांआ 1972 मायथाइयाव बिश्वभारती मुलुग सोलोंसालिनिफ्राय Fine Arts आव बि. फाइन डिग्री लायो। बेनि उनाव बरदानि M. S. University निफ्राय Fine Arts आव एम. फाइन डिग्री लायो। 1989 मायथाइयाव बिश्वभारतीसिम फैफिननानै Ph. D. लायो। गोजौ सोलोंथाइ लानो थाखाय बिथांआ 1981-82 मायथाइयाव Boston University आव फरायहैदोंमोन। बिथांआ आथिखालाव बिश्वभारती मुलुग सोलोंसालि कला भवननि सासे फोरोंगिरि जानानै दड'।



**गुबै फरा :**

[प्रेसिडेन्ट गबिन दावहानिनि सेम्बार। सेम्बारनि इन्जुराव मानसि गेदेरनि गांनैसो फट'। रुमनि फारसेथिं फिसा थेबिल सायाव महात्मा गान्धीनि हानि मुसुखा, गुबुन फारसेथिं गंसे गेदेर थेबिल। प्रेसिडेन्ट दावहानि आरो दावहा मनश्चि मायांआ मासियाव जनानै रायज्जायगासिनो दं।]

दावहानि : हा': हा': हा': मानसिफोरा दावहाखौ गियो— हा': हा': हा':।

मायां : हु: मानसिया दावहाखौ गियो- मानो? — अ बिसोरो थैनायखौ थोर थोर गियो। नाथाय थानानै थानोब्लादि गावखौ रैखा खालामनो हानाय बोलोआबो आखाइयाव थानांगौ, अस्थ्र दैनांगौ, दावहा नांनंगौ, बेखौ बिसोरो मिथिया। गावखौ फोथानानै लाखिनो थाखाय मानसिफोरा गोदोनिफ्रायनो गावजों गाव दावहा नांबोदों- दाबो नांनंगौ। नाथाय साननो रोडै थौले गोसोनि मानसिफोरा बेखौ सानस'नो हाया- फोथाया।

दावहानि : बे थौले गोसोनि मानसिफोरा जायखि बुड मानो बिसोरनि बाश्चाखौ लानानै आं आंनि बे हादरनि जोबस्रानायखौ हांख्रायनो हाया। मुलुगनि गुबुन गुबुन हादरा राष्ट्रसंघनि अस्थ्र गारनाय खास्थिनि मोनथोरजों बुरखाय जाबाय- नाथाय ग'बिन दावहानिनि साननाया इसे थौले नड, अस्थ्र नागारनानै बिसोरो गावगावनि हादरखौ माबोरै रैखा खालामनो एबा बिश्व शान्ति लाबोयो आंबो नायगोन। गावखौ रैखा खालामनो हायाब्ला, बयखौबो फेजेनानै गोसोनि गिलुं गिलुं गिनायखौ होखारनो हायाब्ला शान्तिआ माबोरै फैनो?

मायां : बेनो बेनो बाश्चाया— शान्तिनि रोदायानो जादों दावहा। मुलुगनि गुबुन गुबुन हादरफोरा दिनै अस्थ्र गारनाय खास्थिनि लामाजों लामा लानो हमबाय। नाथाय जोंनि हाजार हाजार जेट आरो रकेटफोरा जेब्ला अख्रांआव बिरफबगोन, कामान-ब'माफोरा जेब्ला गुरुम गुरुम होननानै मुलुगखौ सोमावगोन अब्ला बिसोरो गावखौ रैखा खालामनो माबे बोलोजों? साननांगौ बाश्चा गैलिया प्रेसिडेन्ट

दावहानि, जनानै थानायनि समाबो गैलिया। गोहो बोलो खोमानानै लानाय हादर आरो हारिखौ उदखार खालामनानै मुलुगाव जोंनि गोहो बोलोजोंनो शान्तिनि गोदान संसार सोरजिनायनि समा बेनो।

दावहानि : गुबुन गुबुन हादरखौ इसिबां गोहो गैजायि होननानै दासान नोंथां। बिसोरो सालाखि, सायाव राष्ट्रसंघनि माला गाननानै खुगाजों अस्थ्र गारनायनि मन्थ्र जारियो, नाथाय सिडव गाव गावनि थुंग्रिखौबो जोनो जोनो उनो।

मायां : नोंथांआ बेखौ मानो सानबावदों दावहानि। फैथों-फैथों गुबुन हादरनि गुबुन बोलो, नाथाय सोर बेलाय जोंनि बे जोंखांनाय अरखौ लुखोमोरग्रायालाय। दावहानि हाबाखौ जों फासयनानै उनाव दोननाया गाहाम जानाय नंलिया। नोंथांआ बे डिक्लारेसन बिल बिलाइखौ नाजावनानै जुद्धनि हुखुम होदो— नडाब्ला फेलें थांगोन लक्ष लक्ष रांखावरि आरो फेलें थांगोन जोंनि साननाया।

दावहानि : (बिल बिलाइखौ नाजावनानै) फेलें थाड- फेलें थाड- फेलें थांहोनो होननानै प्रेसिडेन्ट गबिन दावहानिया जुद्धखौ आखाइयाव लाया। जुद्धआ जागोन- जाथारगोन। (सिखांनानै आगयो) ह': ह': ह': बे बाराव नायगोन, अस्थ्र नागारनानै थानानै थाग्रा मानसिनि बोलोखौ। (मायांनि फारसे जानानै) नाथाय हुसियार, जोंनि बे जुद्धनि रादाबखौ गुबुन गुबुन हादरनो मिथि होआजासेनो बारहुंखा बादि दान्दिसेयावनो ध्वंस खालामनानै मुलुगखौ समखि होनांगोन।

मायां : बेनि थाखाय साननो गोनां जेबो गैया मानाव गेदेर दावहानि। हाजार हाजार रकेट, जेट-फाइटर, कामान, टेंकफोरा थाखथियारिखा। आखाइयाव सिलाइ, ब'मा लानानै हाजार हाजार सिफाइ सानश्चिफोरा नोंथांनि हुकुम मोनब्लानो आगान सुरनो अराय थियारि। (दावहानिनि फंबाय सीमाना हाबफैयो)— आं थांदिनि...।

दावहानि : (मायांनि आखाइयाव हमनानै) इसे उनाव आं नोंथांखौ लोगो मोनबावनो लुबैयो।

मायां : फैनो नाजागोन- गुड बाइ। (ओंखार लाडो। दावहानिया सिडव हाबलांहां जायो, एसेयावनो सीमाना बुडो)

- सीमान : आदा, आं बाथ्रा फंसे बुंनो सानो।
- दावहानि : मा बाथ्रा- जुद्ध बन्ध खालामनांगौ बेनोथ ?
- सीमान : जुद्ध बन्ध खालामनांगौ- बेयो बाथ्रा नडा नामा आदा ?
- दावहानि : ह' : ह' : ह' : बेफोर बाथ्राखौ नों मानो रायखांबाय थाबावो सीमान।  
बेफोर जादों गिख' बोलोगैयि बिखा गैयि मानसिनिसो बाथ्रा।
- सीमान : गोथौवै साननानै नाय आदा- मानसिनि सुबुंमिनि अराय बोलो  
थासान्दियाव अस्थ्रनि बोलो, थुंग्रिनि बोलोखौ आंनो मानो ? गावखौ  
खोमानानै लानाय, मानसिनि अराय बोलोखौ खोमानानै लानाय,  
गिख' मानसियासो थुंग्रि दैयो, अस्थ्रजों जुद्ध नाडो, हाजार हाजार  
लक्ष लक्ष मानसिनि जिउ फोजोबसाडो, हा- दै हा-ओखाम-  
हांमानि हाव हाव बाराव बयबो हालाय हाफाय, गोदाव सोराव  
जायो, साननैजों थैनो गोनां मानसिया सानसेयैनो थैयो। जाय बोलोआ  
मुलुगनि इनाय अगियान आरो गिनायखौनो होखारनो हाया बे  
बोलोआखि बोलो ? नाथाय आं मानसि, आं मानसिनि बे अराय  
बोलोजोंनो जुद्ध नांगोन, बे बोलोजों मुलुगनि इनाय अगियान  
आरो गियानखौ ध्वंस खालामगोन। मानसिया गिनायखौ गारनानै  
गोजोनै अरायबो थानंनानै थानो हागोन।
- दावहानि : (थेबिलनि ड्यारनिफ्राय पिस्तल दिहुननानै आखाइयाव लायो)  
सीमान, नोंनि बे सुबुंमिनि बोलोआ आंनि बे पिस्तलनि बोलोखौ  
हमथानो हागोनदा ?
- सीमान : नोंनि बे पिस्तलनि गुलिया आंनि बे सोलेरा थैगोन, नाथाय आंनि  
बे सोलेरानो नोंनि फंबाय सीमान नडा। सीमाना थैया- सीमाना  
नोंनि अन्थाइ बिखाखौ गुदुं हांमानि अरजों गलिहोगोन सुबुंमिनि  
मोनफिनगोन। -सुबुंमिनि बोलोआ अस्थ्रनि बोलोखौ मुगैयो ?  
पिस्तल बादि अस्थ्रनि बोलोआ माराम जागोन, सेवलांगोन सीमाना  
थैनानैबो देरगागोन।
- दावहानि : ह' : ह' : ह' : -मिनिथाव बाथ्रा बुंबाय नोडो फंबाय। सीमान आं  
नोंनि बिदा, बैसोआव आं नोंनिफ्राय देरसिन, खर'आव मेलेमा  
बांसिन, गोसोनि साननाया नोंनिखुइ साबसिन, हामसिन थौसिन।

- सीमान : जानो हागौ नों आंनि बिदा, जानो हागौ नों गोरों गोरा- मोनसे  
राष्ट्रनि प्रेसिडेन्ट नाथाय नों सुबुंमिनि खोमानानै लाबाय। 'अननाय'  
बे जिरादा प्रेसिडेन्टनिखुइबो देरसिन, दावहायाव बेसेबांदि मानसि  
थैगोन...
- दावहानि : दावहानि गिखंथाव महरखौ फोरमायनानै नों आंखौ सिगिनो हानाय  
नडा सीमान, दावहायाव हाजार हाजार, लक्ष लक्ष मानसि थैयो-  
बेखौ आं मिथिखागौ। गावनि हादरनि हारिनि मोजांनि थाखाय  
मालायनि हादर सेनाया, गुबुन हारिखौ गासिननानै दोननाया आंनि  
मावनांगौ हाबा- नों मिथिया नामा सीमान मानसिया बांदेरगासिनो  
दड'- नाथाय मुलुगनि हाया बांनो रोडाखै। जुद्धखौ मानसिया  
एरैनो खालामा सीमान, - जाहोन दं। खर'आव मेलेम दड'ब्ला  
इयुननि मुलुगखौ साननानै नाय।
- सीमान : मानो ? मानसिया मानसिखौ बेबादि जुद्ध खालामनानै नायगार  
नायगार बुथारनो होननानै बांहोयो नामा ? आं साननानैनो बुंदों  
आदा- दावहाखौ बन्ध खालामनांगौ। बे आंनिल' बाथ्रा नडा,  
बेयो इयुनखौ सानहरनो हाग्रा गेदेमाफोरनिनो बाथ्रा।
- दावहानि : एइ जोहोलाव, जुद्ध खालामनाया खुगानि बाथ्रा नडा, जुद्धआ  
मोनसे हाबासो। बे हाबाखौ आं बन्ध खालामनो थाखाय मावाखै-  
दिनैनि बाथ्रा नडा, नैजि बोसोर आगयनिफ्रायनो आं बे हाबाखौ  
आखाइयाव लानानै मावबोदों। दिनै नोंनि फंसे बाथ्रायावनो नोंदा  
गबिन दावहानिनि हाबाया फेलें थाडा। सीमान, बे हाजार हाजार  
जेट-प्लेन, जाहाज, कामान, टेंक, सिलाइ, ब'मा बायदि बायदिखौ  
दानायाव आरो लक्ष लक्ष ज'वानफोरखौ फिसिनायाव बेसेबां कौटि  
कौटि रं खारखो बेखौ नों बुंनो हागौदा ? नों सानदों आदाया राष्ट्रसंघनि  
बोलोजों जेनगोन, नाथाय नोंदाया जेननो होननानै खामानिखौ मावा।
- सीमान : आं रावनिबो जेननाय एबा देरहानायनि बाथ्रा बुंनो थाडा आदा।  
दालां गेजेराव मानै बोरमाया लामा हगार लाया जासे गावजों गाव  
सौलायनानै गोग्लैनानै थैनाय बादि बे मुलुगनि मानसिफोराबो गावजों  
गाव सौदावलायनायाव जोबसांगोन। जाय बोलोआ बयनिबो ध्वंस

- लाबोयो बे बोलोखौ मानसिनो मानो नांगौ? नोंनि बे अस्थ्रनि बोलोआ मानसिखौ बे जोबस्रानायनिफ्राय रैखा खालामनो हागोनदा? खोमसि गोसोनि मानसिनो स्रां होनो हागोनदा?
- दावहानि : मानो हाया - मानो हाया? मिथिगौ सीमान। आंनि बे बोलोजों बे ध्वंसखौ लाबोनो लानाय थांखिया मानसिनि मोजांनि थाखायनो, मानसिखौ फोथांनानै लाखिनो थाखायनो। नों मिथिया नामादि स'नाया अराव सावब्ला गोजोंसिन जायो।
- सीमान : (बिदानि फाफ्लियाव हमनानै दाखाय दाखाय बुडो) -नों नों गावखौनो बावलांबाय आदा, मानसिनि धोरोमखौ बावलांबाय। आदा, नों थैबाय- नों आरो मानसि नंलिया।
- दावहानि : ह' : ह' : ह' : मानसिफोरा माबोरै थैयो नों नुफेराखै नामा सीमान- ग'बिन दावहानिया थैनो लुबैया आरो थैनायबो नड। नों आंनि अनजालु फंबाय, नोंनि मोजांनि थाखायनो आं बुडो- नों थैनायखौ गिमारोब्ला, जिउ लानानै थांनानै थानो लुगैमारोब्ला, आंनि धोरोमखौ ला, नोंबो थैनायनिफ्राय रैखा मोनगोन।
- सीमान : आदा, मुगैयो आं नोंनि साननाय-हनाय, बुजिनायखौ।
- दावहानि : सीमान नों ओंखारलां।
- सीमान : आदा, आं नोंनि आधिडव हमनानै बुडो, बे ध्वंसनिगिरि जुद्धआ बन्ध खालाम।
- दावहानि : नों सासे नेहाद मोसौ। जायै बाथ्राखौ बुंबाय थानो खुगा रुवाया नोंहा?
- सीमान : बुंगोन, खनसे नड खननै नड गले गले बुंगोन। आदा नों थैयाखैब्ला, मानसिनि बोलोआ दाबो दंब्ला जुद्धआ बन्ध खालाम। सिफाइ सानथ्रिफोरखौ हादर बेंनाय आरो शान्तिनि खामानियावल' बाहाय। बिसोर मानसि, बिसोरनि सुबुं उदांस्रियाव होसिननानै दोननाय अन्थाइ थाफाया बोखार- थांनानै थानायनि लामाखौ दासिफाय, दावहानि हाथियारफोरखौ लैथोआव गारहर, रांखावरिखौ मानसिनि थांनानै थानायनि खामानियाव बाहाय, फरायसाफोरनो दावहायारि सोलोंथाइनि बदलै गोसो मोदोम गेवलांनयनि सोलोंथाइ हो नडब्ला

- दिनै नड गारोन सानसे बेलासे दावहानि जोंनाय ब्लाव ब्लाव अराव नोंबो आंबो बयबो हाथ'फ्ला जाजोबगोन।
- दावहानि : बे मुगाया धोरोमनि मुगा नड सीमान। बे मुगायाव सानलोबाउरिनि गोमो गोथां दखना रोबैयाव हमथानानै उन उन खारफानानै रावबो थांनानै थानो हालिया। This is the age of competition थांनानै थानोब्ला नों मालायखौ फेजेननानै देरहागोन। Survival of the fittest बेबाथ्राखौ नोंखि फोथाया? बे मुलुगानो गोहो गोरा बोलोगोराफोरनि। नोंबादि साननो रोडै थौले गोसोनि बाथ्रा लानानै दावहानि हाथियारखौ लैथोआव गारहर जोबोब्ला गुबुन हादरा गारोननो हादरखौ गाग्लोबफैगोन- अब्ला नों मा खालामनो?
- सीमान : आं आंनि बे बिखाखौनो फोर्दाना होगोन— जुद्धनि अरखौ बिखानि थैजों लुखोमोरगोन।
- दावहानि : (सीमाननि बिखायाव मुजुद्लानानै)-थु: नोडो, नोंनि थैजों? नों बादि लक्ष लक्ष कौटि कौटि मानसिनि बिखानि थैजोंबो दावहानि ब्लाव ब्लाव अरखौ लुखोमोरनो हाया सीमान। मानसिनि बिखानि थैजों दावहानि अरखौ लुखोमोरनो हानाय मोनब्ला फार्ष्ट अ'वार्ल्ड अ'वारनि उनाव सेकेण्ड अ'वार्ल्ड अ'वार जानाय नडामोन। दावहाखौ रावबो नाड होननानै गारनो हाया- बे संसाराव मानसिया जेसेबां गोबाव थांनानै थागोन एसेबां गोबाव दावहायाबो थागोन। दावहायासो मानसिखौ फोथांनानै लाखिगोन आरो थांनानै थानो थाखाय दावहाखौ जोंबो नांलांनंगोन।
- सीमान : दावहाया मानसिखौ फोथांनानै लाखिया आदा, फोथांनानै लाखियो नोंबादि अन्थाइखौल'- दावहाया संसारनि गोजोनखौ गोजानाव होखारहरो।
- दावहानि : अस्थ्रनि बोलो, जुद्धनि बोलोखौ नों सिनाय माराखै सीमान, बुहुमनि बिखा सोमावलायनाय कामाननि गुरुम गुरुम सोगोमनायावदि शान्तिया सिरि मोनो बेखौ नों मिथिमारा। जायहा आखाइयाव अस्थ्र गैया बिहा शान्तिबो गैया।

- सीमान : अस्थ्रजों एबा दावहाजों मोननाय शान्तिया अरायनि थाखाय जानो हाया आदा। नों सिखा दैखांब्ला आं सिलाइ दैखांगोन, नों कामान गावब्ला आं बंमा गावगोन बिब्दिनो देरसिननिफ्राय देरसिन अस्थ्र दैखांगोन आगानफ्रोमबो गिनांगौ जानानै फँगोन आरो बे गिनायानो गोजोनखौ गोजानाव होखार हरगोन। आदा, नों मुलुगनि मानसिनि मोजांखौ लुबैमारोब्ला गोसोनि खोमसिखौ सुझानानै गार। मुलुगनि मानसि-बिसोरो नोंबादिनो मानसिनिसो फिसा नोंनिनो बिदा फंबाय-नों सोरजों दावहा नांनो। जुद्धआ बन्ध खालाम आदा, जुद्धआ बन्ध खालाम।
- दावहानि : सीमान नों मिथिगौ आं नोंनिल प्रेसिडेन्ट नडा। आं मोनसे हादरनिसो प्रेसिडेन्ट। आं बुद्ध-जीशु नडा- प्रेसिडेन्ट गबिन दावहानिसो। नेबे declaration बिलाइ बादिय आं हुकुम होब्लानो मुलुगा उल्थां फाल्थां जागोन बेखौ नों मिथिगौ? अस्थ्र नागारनानै सोर माबोरै थांनानै थानो हायो नों नायबायथा।
- सीमान : (डिक्लारेसन बिलाइखौ नायना)- जोबोर इनाय जागोन आदा-जोबोर इनाय जागोन। बे डिक्लारेसन बिलाइखौ दानो बिसिनानै गार, जुद्ध बन्ध खालाम। नडाब्ला, जुद्धआव थैनाय मानसिनि गुदुं हांमायाव नोंनो हाथपला जानांगोन। बे डिक्लारेसन बिलाइखौ बिसिनानै गार।
- दावहानि : सोरनि हुकुम, सीमाननि ?
- सीमान : सीमाननि नडा मानसिनि।
- दावहानि : मानसिया सोर ?
- सीमान : बेखौ जायनो मिथिगौ बिनो मानसि।
- दावहानि : मानसिया थांनानै थायो नामा ?
- सीमान : मानसिया थैनायखौ गिनानै थांनानै थाया, थैनो एबा ध्वंस खालामनोबो थांनानै थाया। मानसिनि इयुनआ मानसिनि आखाइयाव- मानसिया थांनानै थानो थाखायसो थांनानै थायो।
- दावहानि : आरो मानसिया मानो थैयो ?
- सीमान : मानसिया थैनो थाखाय थांनानै थाया, थांनानै थानो थाखायसो

- थैयो।
- दावहानि : ह' : ह' : ह' : - गथ' गोरलैनि बाथ्रा। दावहाखौ मानो खालामो ? - जुद्धथौ खालामनो थांनानै थानो थाखाय ? जुद्धखौ आं खालामगोन-जुद्धनि हुकुमखौ आं होगोन।
- सीमान : बेनि आगयाव नोंसोरनि डिक्लारेसन बिलाइखौ सावनानै हाथ'पला खालामगोन आं- (सीमाना डिक्लारेसन बिलाइखौ थेबिलनिफ्राय खनखांनानै लायो सावनो सलाइ हुखाडो) हाथपला खालामगोन, नोंसोरनि बे सिखाव हाबाखौ फोसावनानै मुलुगनि मानसिखौ दानो फोजाजोबगोन आं।
- दावहानि : सीमान! सीमान! सीमान! (सलाइ खाथियाव अर जोडे- डिक्लारेसन बिलाइखौ सावब्लानो दावहानिया पिस्तलनि गुलिखौ हगारो)
- सीमान : आह! (डिक्लारेसन बिलाइ आरो सलाइया आखाइनिफ्राय हायाव गोग्लैयो, -सीमाना बाज्रेद बाथेद जायो- राधाया हाबफैयो)
- राधा : सीमान! सीमान! (सीमानखौ हमथायो)
- सीमान : बाजै आं गसंनो हालिया बाजै। (हायाव गोग्लैयो, राधाया सीमाननि खर'आव बिलिर बिलिर गाबो)
- राधा : सीमान नों ... ..
- सीमान : बाजै दुखु दाखालाम आंनि थाखाय... (लंपेन्ट सिफिनिफ्राय पकेट डायेरी खाता आरो गस्ता सिफिनिफ्राय पाउन्टेनपेन दिहुननानै माबार लिरो ... .. लिरखांनानै राधानि आखाइयाव गथायो) आदाया बे दायनिफ्राय ग'गोन... नाथाय आदानि बिखाया अन्थाइ बिखा, बियो गावखौनो खोमानानै लाबाय। आदाया मानसि नंलिया, बियो कामाननि अरसो ... बाजै आं थैनायाव गाबनानै मा जानो... आदाखौ मानसि खालाम, मुलुगनि मानसिखौ फोजोबझानांयनिफ्राय रैखा खालाम... आं अरायबो नोंसोरजोंनो दं। थैनायखौ दागि बाजै मुलुगनि मानसिया थांनानै थायोब्ला जों थैनानैबो थांनानै थागोन... बाजै आं थांनोसै आ-ह-! (थैयो)
- राधा : सीमान! सीमान! बुं बुं-- मानो सिरि थाखो सीमान। (सीमाननि बिखायाव मोखां होखोमानानै गाबो उफेले उफेले दुखुनि देंखो

- गोजाव बोयो, फिसाइ दावहानिथिं नायहरो-लासैयै सिखाडे)
- राधा : फापी! फा-फी! नों-नों फाफी-नों अन्थाइ, गोरबोनि अनजालु सीमानखौ नों-नों मानो गावथारखो ?
- दावहानि : बे मुलुगा सीमान बादि गोहो बोलो गैयै मानसिनि थाखाय नडा राधा। संसारनि बे बादि आरो बेसेबांदि मानसि थैगोन जुद्धआव।
- राधा : जुद्ध! बिदिब्ला नों जुद्धखौ खालाममारनोसै।
- दावहानि : (हायाव गोग्लैनानै थानाय डिक्लारेसन बिलाइखौ खनखानानै होफैयो...) खालाममारनोसै नडा- खालामब्लानो जाबाय। (राधाया नाजावनानै नायो)
- राधा : जुद्ध! जुद्ध! जुद्ध! (डिक्लारेसन बिलाइखौ सिफ्लेनानै गारो)
- दावहानि : राधा (पिस्तल दैखाडे)
- राधा : राधाया जुद्ध बन्ध खालामगोन।
- दावहानि : (पिस्तलखौ टेबिल सायाव दोनो) जुद्धआ डिक्लारेसन बिलाइयाव गैया राधा, जुद्धआ दं खरनि मेलेम आरो बिखानि गुदुं थै गेजेराव।
- राधा : बहा बोरो... आंनोबो नोंनि बिखानि थैखौनो नांगौ। (राधाया दावहानिनि गस्लायाव आखाइ थाइनेजों हमनानै दाखाय दाखाय बुडे) नोंनि बिखानि बे थैखौ लॉनानैसो आं नागारगोन, ... बुं ... बुं फापी नोंनि बिखायाव मा दं? नों मानो रावखौबो अननो रोड... बुं...।
- दावहानि : राधा नों आंखौ रागा दाफोजों।
- राधा : रागा... रागाखौ नॉल' जोंनो रोंगौ, मालाया जोंनो रोड... जुद्धखौ नॉल' नांनो रोंगौ, मालाया रोड, ... ... नॉल थांनानै थांनांगौ, मालाया थानाड... मानो ?
- दावहानि : राधा! (सोबानानै नाज्रेद हरो, रागाजों ओजों थांलाय ओजों फैलाय खालामो- राधाया गोग्लैसोनानै थाहैयो) सिनाय नोंनि फिसाइया सोर।
- राधा : आय' ग'साइ ... .. नों माबेयाव दड'... (हांमानि देखो) सोरां लाबो गसाइ, सोरां लाबो, खोमसिखौ होखार हरदो। खोमसियाव लामा आन्दायनानै गावखौनो खोमानानै लानाय अगियान मानसिफोरखौ बोखांदो ... जोबसांनानयनिफ्राय रैखा खालामदो। ... (लासै लासै

- सिखाडे दावहानिनिथिं आगय लाडे) सोरां फैगोन राजा, सोराड फैगोन, सोरांखौ रावबो होखोमानानै दोननो हाया.. साननि स्रांखौ गोसोम जोमैया खोबसिननो खोमसि जायो, नाथाय बे खोमसिया दान्दिसेल'।
- दावहानि : राधा, नों सिमां नुदों- नोंनि बे सिमांनि बाथ्राखौ खोनानानै नैजि बोसोर सानथ्रोब, हरथ्रोब मावनानै मोननाय गोहो बोलोखौ आं बावा। बे जुद्धनि थाखायनो लक्ष लक्ष रां खावरि बाहायनानै हर सान मावबोदों आं। बेसेबा गोबावनि उनाव दिनै जाफुंबाय, गोरलै गांधिया राबाय बिरनायनि सम सफैबाय... दिनै आं रकेट, कामान, बमानि बोलोजों बोलो गोरा।
- राधा : जानो हागौ नैजि बोसोर हा-दै, हा ओंखाम मावनानै, लक्ष लक्ष रां गारनानै मोननाय, नाथाय बे बोलोआ दान्दिसेनि थाखायल'- बेयो सुबुंमिनि बोलोजों सुनायब्ला नेहाद नहा। कामाननि बोलोजों देरहानाया दसेनि थाखाय नाथाय सुबुंमिनि बोलोजों देरहानाया अरायनि थाखाय।
- दावहानि : सुबुंमिनि बोलोआ देरसिनब्ला सीमाना पिस्तलनि गुलियाव थैनाडामोन।
- राधा : सीमाननि बोलोआ थैनो रोड राजा, नों आं, बे मानसि हारिया जेसेबां दिन थांनानै थागोन, बेबो बेसेबां दिन थांनानै थागोन। गान्धीखौ दिनै आं थैबाय होननानै बुंब्ला गोरोन्थि जागोन।
- दावहानि : हु! गान्धीखौ नोंसोर ईसोर होननानै मानियो नडासै? गान्धीया ईशोरमोनब्ला नाथुरामनि गावनाय पिस्तलनि गुलियाव मानो थैदोंमोन? ह': ह': ह':- पिस्तलनि गुलिजों ईश्वोराबो जेनो थैयो।
- राधा : नाथुरामनि गुलियाव बेनि सोलेरा थैदों, नाथाय बेनि गोथार गोहो बोलो, नेरसोन, सुबुंमिया थांनानै दं- इनाय अनागारजों जुद्ध नांगासिनो दं- पिस्तलनि गुलियाव गान्धीया थैया, सीमानआ थैया।
- दावहानि : अ' नोंबोथ' थैनाय नडा, सासे गान्धी।
- राधा : आं गान्धी नडा, गान्धीनि बोसोन फालिग्रा हिन्जाव राधासो।
- दावहानि : गान्धीनि बोसोन फालिग्रा! थैनानै थांनानाय मानसिया नोंनो मा बोसोन होयो? जावलिया जायाखैथ'- आंनि बोसोनखौथ'

- फालिनाडा! आंथ' नोंनि फिसाइ नडा,- आं बेनिखायनो नों बे हानि गान्धी मुसुखाखौ आंनि न'आव दोनफैना नै आंखौ लाजि फोनांदों। राधा, नों सोर? आं सोर? गान्धीया सोर?
- राधा : नों आंनि जिउनि फिसाइ राजा, आं नोंनि जिउनि राधा, आरो बे गान्धीया नोंनि-आंनि, मानसिनि गुरु।
- दावहानि : गुरु नोंनि आंनि नडा। बियो आंनि सुथुर- आंनि सुथुर (थेबिलाव दोननाय गान्धीनि मुसुखाखौ गारखुबनो नागिरो, राधाया मुसुखाखौ सेनानै लायो।)
- राधा : राजा! नों मानसिनि सुथुर- नों शान्तिनि सुथुर। मानोना नों मानसिखौ अननो रोंलिया, संसारखौ मोजां मोननो रोंलिया, नों मानसिबो नंलिया। हिंसानि खोमसि दरखौ सिंखावनानै बायहायाव ओंखारनानै नाय राजा- अननायनि स्राडा बेसे गोदै, बेसे सुदेम। खोमसिजों जेननानै नों गावखौनो मानो खोमानानै लाखो? (राधाया मुसुखाखौ थेबिलाव दोनफिनो।)
- दावहानि : राधा, नों बादि हाजार राधाया हाजार खेब मन्थ्र जाहि फैया मानो राजानि गोसोखौ सोमावनो हानाय नडा। आं मानसि, थानानै थानो थाखाय आं जुद्धखौ खालामगोन।
- राधा : मानसिया मानसिजों जुद्ध खालाम नाडा राजा, जुद्ध खालामनांगौ इनाय अनागार अगियान खोमसिनि बेरेखायैसो ... धोरोमा थानाय नडा राजा।
- दावहानि : धोरोम जुद्धआनो, शान्ति जुद्धआनो- No war no peace! कुरुक्षेत्रनि दावहायाव जिदाइन अक्षौहिनी थैनाय मानसिनि गोथै सायाव राजा जुधिष्ठिरा धोरोमनि शान्तिनि राज्यो दानायखौ नों मिथिया नडा मिथिगौ।
- राधा : नाथाय जुधिष्ठिरनि बे धोरोमनि राज्योआ बेसे गोबाव थादोंमोन? मुगुलनि मानसिखौ फोजोबनायनि उनाव नों आरो सोरखौ लानानै धोरोमनि, शान्तिनि राज्यो दाबावनो? बे जोबस्रानायनिफ्राय नोंबोदि गनाय नडा। कामान ब'मानि अरा जेव्ला हाव हाव दुंगोन अब्ला नोंबो थानो हानाय नडा, गोथैनि सायाव लुनाय नोंनि बे धोरोम

- राज्योखौ बिसोरनि बे हांमायानो सावनानै हाथप्ला खालामगोन।
- दावहानि : राधा! संसारनि शान्तिखौ नों हांखायमारोव्ला, इयुननि मानसिफोरनि थानानै थानायखौ लुगैमारोव्ला, नों सिरि सिरि सिडाव थांदो, आंनि हाबायाव हेंथा दाहो।
- राधा : आंनि बे हेंथाया बयबो थानानै थानायनि थाखायनो, संसारनि शान्तिनि थाखायनो।
- दावहानि : (पिस्तलतखौ गोरा हमनानै) आखाइयाव मा दं सिनायनानै ला राधा थानानै थानोव्ला...।
- राधा : आं बिखा फोरदाननानै होयो...।
- दावहानि : बिदिव्ला नोंबो सीमान बादिनो थैनो लुबैमारो।
- राधा : मानसिया थानायखौ गिनानै थानानै थाया। गोथौवै साननानै नाय-सीमानखौ नोंनि बे पिस्तलनि गुलियाव थैबाय होननानै दासान-बियो दिनैनिफ्राय देहाखौ नागारनानै उदां महर लाबाय, बियो मावगोन सिरि सिरि- दावहा नांगोन इनाय अनागरिनि बेरेखायै। लामा खानानै लामा दिन्थिनानै होगोन। नों बादि मानसिनि अन्थाइ बिखाखौ सिरि सिरि दोफों दोफों खामनानै उनदाहायाव गावहोगोन मानसि खालामनानैसो नागारगोन।
- दावहानि : राधा! I will shoot you
- राधा : (बिखाखौ फोदाननानै मेसेबो) ... गाव...।
- दावहानि : राधा...!
- राधा : गोबाव दाखालाम राजा...। (रैसुमै रावजों)
- दावहानि : राधा! (मेगन मेसेबनानै गावनो बोलो होयो... आखाइनिफ्राय पिस्तला गोग्लैयो) .... आं सोर? राधा आं सोर? उस भगवान... आं सोर? राधा आं सोर?
- राधा : सीमाननियाव सों।
- दावहानि : सीमान! सीमाना माबेयाव? सीमान...! (सीमाननि गोथै सहनि सायाव उप्ले उप्ले दाखाय दाखाय गाबो। सीमान! फंबाय गोबोंनि अनजालु फंबाय बुं-बुं सीमान नों आंनि बे एसे गेदेर गोरान्थिनि थाखाय निमाहा ... उस, नोंखौ आं दिनै गावनि आखाइजोंनो

गावथारनानै खोमानानै लाबाय... बे दुखुखौ आं माबोरै सहायबावनो... आं मायाव थाबावनो? आंनि बे बिखायाव जौनाय दाहा अरखौ नों नडाब्ला सोर खोमोर बावनो सीमान, आंदि थानो हालिया, बिखाया मानोबा दोफो दोफो, हाव हाव... गावनो नागिरबाय (उफ्ले उफ्ले गाबो। दावहा मनश्रि मायांआ हाबफैयो... बिसोरनि गाबनायखौ नुनानै सोमो नाडे- गल' नायहाबबाय थायो।

मायां : प्रेसिडेन्ट दावहानि! राधा!

दावहानि : सोर? (नायहरो)

मायां : आं, नोंथानि बोसोन फालिग्रा डा: मायां।

दावहानि : डा: मायां?

मायां : बे मा जाखो दावहानि?

दावहानि : डा: मायां... (बिखायाव गोबाफैयो) आरो मा जाबावनो, जा जानांगौ जालांजोबबाय। सीमानआ बे संसाराव गैलिया पिस्तलनि बोलोजों देरगानानै सीमानखौ आं दिनै खोमानानै लाबाय... गोरोन्थि, गोरोन्थि डा: मायां, जौनि बे साननाया गासैबो गोरोन्थि। जौनि बे सिलाइ, कामान, बमानि बोलोआ दान्दिसेल', बेयो सुबुंमिनि बोलोखौ फेजेननो हाया, सुबुंमिनि बोलोजों आं दिनै जेनबाय, स्रांखौ आं दिनै मोनबाय, जौनि देरगानाया दैन दोहोफोरबादिसो जों जेबो नडा। सिगांनि ग'बिन दावहानिया उनदाहानि राव हाथफला जालांबाय... जुद्ध! सोरजों? मानसिजों मानसि जुद्ध- बमा गावलायनाय- ओहो ओहो जुद्ध आरो जानाय नंलिया, जुद्धखौ आं खालामलिया।

दावहानि : बुंनो राव फैया... खालि गुदं हांमाल' गयो... नैजि बोसोरनि साननाय, मावनाय, अस्थ्र दानायाव लाख लाख रां बाहायनाय मानसिखौ जुद्ध नांनो फोरोंनाय- बेफोर गासैबो नंखाय गोरोन्थि।

'आं सोर' बेखौ दिनै आं मिथिनो मोनबाय। थांदो नोंथां राष्ट्रसंघनि मावखुलियाव थांनो थाखाय थियारि जाहैदो- राष्ट्रसंघनि अस्थ्र गारनाय खास्थि मालाखौ गाननानै सु गैयि लामार्जों थाबायलांदिनि।

मायां : नाथाय जुद्धखौ माबोरै बन्ध खालामनो हानो नोंथां बे जुद्धआदि जों सानैनिल' नडा।

दावहानि : हागोन नोंथां हागोन। जुद्ध खालामनाया जेसेबां गोब्राब बन्ध खालामनाया एसेबां गोब्राब नडा, थांनानै थानाय, देरहानाय, गोरों गोरा जानाय बेफोर गासैबो सिमां- खोमसियाव आन्दायनाय, ... आं आरो थांनो हालिया थांनानै थानानै आं आरो मा खालामबावनो। खोमसिनि सिमांआव गोमोनानै मालायखौ दुखु होनो आंहा गोसो गैलिया(पिस्तलखौ खनखांनानै)- नोंथाडा मानसिखौ गावथारनो हागोनदा? मानसिखौ गावथारनो हागोनदा? नों आंखौ गावथारनो हागोनदा? न' (पिस्तलखौ जासियो) Please- Please (मायांआ पिस्तलखौ लायो- नाथाय गावा)- आंनि बेबिखायाव। (मेगन मेसेबो)

राधा : राजा!

दावहानि : राधा! ... थैनाय... थांनाय जेबो नडा। Quick please

मायां : (पिस्तलखौ गारनानै) प्रेसिडेन्ट दावहानि, आं जेनबाय...।

दावहानि : डा: मायां! (गोबायो)

मायां : आं थांनोसै- सीमाननि थैनाय आरो जुद्ध बन्ध खालामनायनि रादाबखौ फोसावनो। जुद्ध बन्ध खालामनाया सीमाननि थैनायनि मुडैनो जासिगोन। (मायांआ ओंखारलाडे- दावहानिया गान्धीनि मुसुखाखौ गल' नायो... हांमा सुरो- राधाया थेबिल सायाव गोग्लैनाय थानाय मालाखौ लाबोनानै दावहानिनि सिगाडाव गसडे)

राधा : राजा- दिनै नों गोदान जिउ मोनबाय... आंनि गोसोनि राजाखौ आं दिनैसो मोनबाय। (दावहानिनि गोदोनायाव मालाखौ सोनानै खुलुमो- दावहानिया राधाखौ बोखाडे- माबा सानो)

दावहानि : बे मालाखौ आं गाननो समाया राधा, (खुयो) सीमान नडाब्ला

नों दिनैबो नोंनि गोसोनि राजाखौ मोननाय नडामोन। नोंनि बे मालाखौ गोरबोनि फंबाय, सुबुंमिनि नेरसोन लाबोग्रा सीमानासो मोननांगौ। (सीमाननि आफाडव गसं हैयो- मालाखौ आखाइयाव लानानै) ... सीमान, नोंनि सुबुंमिनि बोलोजों आं जेनबाय... स्रांखौ आं मोनबाय... नों जोंनि स्रां होफैग्रा, फोजाखांग्रा... नों थैनानैबो थैया जाबाय...( राधायाबो स्रें गसंहैयो- दावहानिनि आखिथिं) नाजावदो फोजाखांगिरि सीमान, नोंनि देरहासारनायनि मालाया। (मालाखौ बाउयो।)

### सोदोबथि :

जुद्ध - दावहा

ध्वंस - सिलिंखार

अक्षौहिनी - अनजिमा गैयि फाइखि हान्जा

सेमबार - जग्रा खथा

सोमखि - सोमो नांनाय

डिक्लारेसन - फोसावनाय

नेहाद - हेय, हिन

उफ्ले-उफ्ले - खाथि खाथि थाजाबनाय, गुलि गुलि

दोफों दोफों- दुब दुब मावनाय

जाहि - जारि

### सोंथि :

1. दावहानिया सोर ?
2. दावहानिया मानि बोलोजों दुगाखांदोंमोन ?
3. दावहा लानानै दावहानियानिनि साननाया मा ?
4. दावहानिनि बिसिनि मुंआ मा ?
5. फोजाखांगिरि दिन्थिगासे फावथाइनि गाहाइ आखुआ सोर ? फावथाइनि सल'जों खरसा मुं आरो बिनि आखुआ माबोरै गोरुबदों बिजिरना लि।

6. फोजाखांगिरिनि गुबै मुंआ मा ? बिनि जिउआ मा जादोंमोन ?

7. फावथाइनि गेजेरजों नों मा सोलोंथाइ मोनदों ?

### बेखेवथि :

1. सुबुंमिनि बोलोआ अस्थनि बोलोखौ मुगैयो।
2. जाय बोलोआ बयनिबो ध्वंस लाबोयो बे बोलोखौ मानसिनो मानो नांगौ ?
3. This is the age of competition थानानै थानोब्ला नों मालायखौ फेजेनानै देरहानांगोन।
4. मानसिनि इयुना मानसिनि आखाइयाव- मानसिया थानानै थानो थाखायसो थानानै थायो।
5. कामाननि बोलोजों देरहानाया दसेनि थाखाय नाथाय सुबुंमिनि बोलोजों देरहानाया अरायनि थाखाय।

### फरा गियान :

दावहानि मुंआव बियो बोदोरमोन, प्रेसिडेन्ट गबिन दावहानिया फोथायोमोन दावहाजों बुहमखौ देरहासारनो हायो। सिलाइ बारुदजों गादबना दोननो हायो। बेनिखायनो बिनि मेगना खाथेजाना दंमोन। अस्थनि दुनायजों खोमाना लानांदों गोजोन हास्थायग्रा फंबाय सीमानखौ।

सीमाना गोजोननि थान्दै। सोरांनि थाखाय बिजों गावनि बिखानि थैखौ बाउदों-जिउ गारदों। बिबाजै राधायाबो बे लामानि दावबायारि।

अन्थाइ बिखा दावहानिनि मेगना गेवनायसै राधानि हेंथायाव। दावहानिया गनायनानै लानायसै सीमानखौ 'फोजाखांगिरि' महरै ?

### फोरोंगिरिनिमिम :

फोरोंगिरिया दिन्थिगासे फावथाइनि सोमोन्दै फरायसाफोरनो फोरमायगोन। फरायसाफोरखौ फावथाइयाव फाव लानायावबो थुलुंगा होगोन।

\*\*\*



### **Guarantee Certificate from the Publisher**

Certified that this book is produced as per specification of the Memorandum of Agreement (For publication of Text Book), Clause No. 6

Which states, interalia, that

Text Paper	=	70 GSM
Cover Paper	=	150 GSM
Size	=	1/8 Demy
Binding	=	Limp sewn
Cover Printing	=	Multi Colour
Text Printing	=	Single Colour

If any of the specified mentioned above, is violated than, 'otherwise' the work order will be cancelled and the security money will be forfeited.

Name of the Publisher  
Kitap Samalaya  
A.R.B. Road, Panbazar,  
Guwahati-781001